

**SEVENTH LEGISLATIVE ASSEMBLY OF MIZORAM
(FOURTH SESSION)**

LIST OF BUSINESS

FOR NINTH SITTING ON FRIDAY, THE 21st NOVEMBER, 2014
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * Resolutions

NGURTHANZUALA
Secretary

* Please see Bulletin Part-II No. 62, dated the 17th November, 2014 for relative precedence of Private Members' Resolutions to be moved.

SPEAKER : Lalpa in Pathian chu in zui ang a, amah chu in tih ang a, a thupekte chu in zawm ang a, a thusawite chu in pawm ang a, a rawng te in bawl ang a, amah chu in vuan tlat tur a ni. (Deuteronomy 13:4)

Awle, zawhna 127-na kan la ang a, Pu Vanlalzawma leh Pu K. Sangthuama te zawhna intawm a ni a, tunge kan koh hmasak ang? A hming awm hmasa Pu Vanlalzawma zawt turin i ko ang.

Pu VANLALZAWMA : Pu Speaker, ka lawm e. Higher & Technical Education Minister zahawm tak chhan atana ka zawhna chu hei hi a ni.

- a) National Institute of Technology Mizoram hi khawi hmunah nge din a nih dawn?
- b) NIT Mizoram dahna turah hian eng chen nge hmalak a nih tawh?
- c) Zirna Branch engzatnge awm? Faculty mi engzatnge awm?
- d) Thenzawl a NIT awm tura ruahman tawh Lengpui a sawn tak kha hmalak chhunzawm a ni em?

SPEAKER : Awle, chhang turin Higher & Technical Education Minister zahawm tak Pu R. Romawia ilo sawm ang.

Pu R. ROMAWIA, MINISTER : Pu Speaker, member zahawm tak Aizawl West-III bialtu zawhna chhanna chu hetiang hi a ni.

- a) Lengpui (Kawntengek Ramah). Lengpui Airport atanga Km 3 vela hla ah din a ni.
- b) Topographical & Geo- Technical Survey zawh a ni tawh a, tunah hian boundary wall sak mek a ni.
- c) B. Tech. zirna hi Branch 5 (panga) a awm a, chungte chu : B. Tech. in Computer Science Engineering, Electrical & Electronic Engineering, Electronics & Communication Engineering, Mechanical Engineering, leh Civil Engineering. Tin, Faculty hi 26 an awm a, chungte chu a ngheta thawk (regular), Contract leh Adhoc-a thawk te an ni.
- d) A chung a chhanna ang khian hmalak chhunzawm zel a ni e.

SPEAKER : Zawhbelhna a awm em? Aw, Pu K. Sangthuama.

Pu K. SANGTHUAMA : Pu Speaker, ka lawm e. Thenzawla NIT hmun tur duan sa Lengpui sawn leh tak hi a ram duh tawk a awm lova a zim lutuk a, chuang chuan harsatna a awm niawm taka sawina te hi a awm a. A zim chung chung khuan Lengpui-ah khuan ruahman a nih angin sak mai tur a ni nge Thenzawl-ah hian sawn let leh tumna a awm em? Leng lo chung chung duhtusam loa sak ai chuan duhtusam Thenzawl-ah a hmun an pe thei a, chuta sawn phei leh mai a tha lawm ni. Khutilai chep taka quarter sakna leh inruahmanna pawh duhtusam awm silo, a leina sum awm thei silo, chuangin, enge Mizoram chhung rau rau a nih chuan chhim lam pawh ni se a that lohna a awm chuang em ni. Thenzawl te phei chu kan ram laili tak a ni a, a tha khawp mai a. Saw lam chhim lam zawnz zawnz pawhin an rawn pan thei ang a, keini Aizawl atang pawhin darkar 3 kal a tling tha thum tawh lo a ni a. Chuwangin khulaia hmun chep tak kara NIT din ai chuan Thenzawla dah leh mai hi a tha zawk lawm ni tih ka'n zawt duh a ni.

SPEAKER : Awle, a chhang turin Minister zahawm tak, e Pu Lalruatkima hian a zawtbelh leh duh a ni.

Pu LALRUATKIMA : Pu Speaker, ka lawm e. Higher & Technical Department-ah hian tun hnaiah Group 'C' leh 'D' M.R engzatnge regularized an nih? Heng regularized an nih hnu hian M.R engzatnge lak leh an nih? Chu chu Finance Department-in a hriatpui leh phalna an la em tih ka zawt e.

SPEAKER : Awle, chhang turin Minister zahawm tak Pu R. Romawia ilo sawm ang.

Pu R. ROMAWIA, MINISTER : Pu Speaker, member zahawm tak Aizawl West – I bialtu zawhna chhanna chu NIT hi state sorkar ta a ni lova, a zavaiin central sorkar ta a ni a, Mizoram sorkarah hmun ruak an rawn dil a, Thenzawl-in an duhtawka zau pe theiin an insawi a. Amaherawhchu, Lengpui lam pawhin pe theiin an insawi ve tho a, khuti lama an hotute an lo kal a, airport atanga hnai Lengpui kha an thuthlukna a ni ta a. Ram awm thei tura sawi ve veah an thu tihtluk chu a ni ta a. Hetah hian thuk takin Mizoram sorkar kan inrawlh lo a ni. Thenzawl-a dah loh nih dan tur chungchangah pawh engmah Mizoram sorkar min rawnna leh engemaw kha a awm lo a ni.

Tin, Pu Lalruatkima, Aizawl West – II bialtu zahawm tak zawhna chungchang erawh kha chu hemi supplement anga lo kal angah kha chuan a hla deuh hlek a, ka chhang mai thei lo.

SPEAKER : Awle, Pu K. Sangthuama.

Pu K. SANGTHUAMA : Pu Speaker, khawngaihin. A nih leh tuna Lengpui-a a hmun sorkar-in a buatsaih tak chu leng ngei turin a hmun kha an pe thei ta em? Chanchinbua kan lo hmuh dan leh an sawi danin a leng lo an ti bawk si a. Chu laiah chuan Mizoram sorkar-in an mawh thui tak nilo mahse a hmun chungchangah leng thei turin kan ngai em sorkarin? tih kha ka'n zawt leh e.

SPEAKER : Awle, chhang turin Minister zahawm tak Pu R. Romawia ilo sawm ang.

Pu R. ROMAWIA, MINISTER : Education lam atang nilovin Land Revenue lam atangin ka'n chhang ang e Pu Speaker. A ram kha duh aiin a lo chep deuh a ni tih hriat tak hnu hian Land Revenue & Settlement lam hian remchang tur an han dap sak leh mek a ni a, chu chu an hmu nge hmu lo tih pawh vawiin thlengin kan la hre rih lo a, chu chu ka'n chhan theih tawk a ni e.

SPEAKER : Awle, zawhna dangah kan kal thei a. Zawhna 128-na zawt turin a zawhna neitu member zahawm tak Dr. K. Beichhua ilo sawm ang.

Dr. K. BEICHHUA : Pu Speaker, ka lawm e. Ka zawhna Taxation Department changtu Minister zahawm tak hnena ka zawhna chu - Mizoram sorkar hian contractor – te hnen atang hian Tax a la em? tih a ni e.

SPEAKER : Awle, a chhang turin Finance Minister zahawm tak Pu Lalsawta ilo sawm ang.

Pu LALSAWTA, MINISTER : Pu Speaker, member zahawm tak Dr. K. Beichhua zawhna chhanna chu - Mizoram sorkar chuan Contractor – te hnen atangin Tax a la a, chung a lakna te chu :-

- 1) Professional Tax
- 2) A contract hnathawhna atana a hman bungrua hralhna atangin VAT lak a ni bawktih a ni e.

SPEAKER : Zawhbelhna, Dr. K. Beichhua.

Dr. K. BEICHHUA : Pu Speaker, contract hna tam tak hi Department-in a inzatssem a thawh te pawh a awm a, example-ah pakhat sawi ta ila. Greater Water Supply Tuitlawk-ah khian tuna an hnathawh lai khi Contractor-in 46% a chang a, tichuan Department lamin 54% an thawk a ni. Chutiang angah chuan Tax hi engtin nge kan lak tih kha ka zawbelhna a ni e.

SPEAKER : Awle, chhang turin Minister zahawm tak Pu Lalsawta ilo sawm ang. Contract hna intawmah tihna a nih chu.

Pu LALSAWTA, MINISTER : Pu Speaker, zawhna neituin a rawn zawhbelh hetiang hna inzahsem kha an nih chuan hetiang tak hi kan hre fo lova, mahse an inzahsem a nih chuan sorkar kha chuan departmental-in an thawk a ni tihna a ni ang a, chuan Contractor-in Contractor a nihna angin a thawk tihna a ni ang a, a thawhna ve veah chuan tax kha a pe mai ang a. Tax pek dan hi chi hrang hrang a awm a, kan sawi tawh angin kum khata Professional Tax pek dan a awm a, kha kha chu hmun danga a thawh nen Professional Tax kha chu a pe tho ang a. Tin, tuna hetiang hna bik angah kha chuan a thawh atanga material component kan tih VAT a pek a ngaihna atang khan a pe ve leh mai ang a, chu chu pek dan tur chu a ni a. Hetah hian han sawi belh ila, contractor-ten hna an thawh hi Pu Speaker, a then chu kawng laih ringawt te a ni a. Material component awm lo tawpin chutiangah te chuan VAT an pekna tur chhan kha a awm lova; bungrua engmah socket bolt emaw darthlaling emaw, khatiang thil kha a awm loh avangin. Amaherawhchu an hnathawh kha insak te a lo nih a material component te a lo awm chuan an mahni in an duh thlanna ang a (option) a 2% of the total volume of work ang te pawh khan an pe thei a. An hna kha material hlir a khat chu a ni lo a, mahse material engemawzat a awm chuan 2% pe a an tling tlak theih dan kha a awm ve a ni .

SPEAKER : Zawhbelhna, Pu Rinawma, Engineer.

Er. LALRINAWMA : Pu Speaker, ka lawm e. Kan taxation changtu Minister zahawm tak hnena ka zawhbelh tur chu, Department-te hian VAT registration an ti ve thei em? tih pakhatna ni ta selangin. Department-in lo ti thei ta se engzatin nge ti tawh? Pathumnaah chuan, Supplier-te hian VAT an pe ve em?

SPEAKER : Minister zahawm tak chhang turin i sawm ang.

Pu LALSAWTA, MINISTER : Pu Speaker, Er. Rinawma member zahawm takin a rawn zawhbelhna hi vawiin kan zawhna zingah hian a awm tho mai a, kan thlen hman chuan chiang zawkin kan inchhang thei turah inngai ila.

Kan Mizoram VAT Act 2005 hnuaiiah hian Department-te hi an in register thei a, in register tawh pawh PWD hnuaiia quality control saw an ni a, vawiin thleng hi chuan pakhat chauh in register an la awm a, chu chu tuna kan dinhmun chu a ni. Zawhna dang kha enge ni kha?

Er. LALRINAWMA : Tunah kha chuan a ti tawh zat kha min chhang mai a, a lawmawm a, chuan Supplier-te hian VAT an pe ve em tih a ni.

Pu LALSAWTA, MINISTER : Pu Speaker, supplier-te hian VAT an pe a, amaherawhchu in register lo te chuan VAT an pe lova, hei hi sawina remchang tak pawh a niin ka hria a. In register te hian dawr te hawngin, dawr luah tur te siamin Mizoramah chhiah an chhung tang tang a, chutih lai chuan Department thenkhatah in register lo va supply nasa tak, a nuai tela pe a chhiah pe si lo hi an la awm a ni, hei hi tunah hian kan vei khawp a. Pu Speaker, kan hriat theuh angin kan sum dinhmunte a that loh avangin sum dapna kawng hrang hrang kan ngaihtuahnaah hian engemaw hunlaia kan lo ngaihzam mai mai ang chi hi ngaizam thei kan ni tawh lova. Chuvang chuan chhiah luhna kawng awm thei zawng zawng hi kan thiam angin kan dap ang a, kan dap ril tial tial a, rinaiin ham chhuah tur lian pui pui te pawh hi a lo la awm teuh mai a. Chung ang pawh chu contractor kan tih supplier kan tihten chhiah pe lo a Mizoram-a hna an thawk thin hi chu tun atanga rei vak lovah hi chuan hetiang zawnga kan tih hi a la ngai dawn a ni.

SPEAKER : Er. Rinawma, zawhbelhna.

Er. LALRINAWMA : Pu Speaker, ka lawm e. Zawhbelhna pakhat. Department tinte kha VAT registration ti tura tih an ni lo nge? Anmahni duhthlanna ti a ti lo mai tura remchanna siamsak an nih?

SPEAKER : Minister zahawm tak sawm ila.

Pu LALSAWTA, MINISTER : Pu Speaker, officially a official communication siam a tih phe chu a ni lo a, mahse kal khawmnaah te remchangah hi chuan tun hma atangin thahnemngaihna vangin kan Commissioner of Taxes te leh midang pawhin in register tur hi chuan an lo tawngkeu fo tawh thin a, an ti lem lova. Mahse tunah hi chuan an tih hi a tul dawn a, ti se kan duh a, an tih hi a that pawh kan ring a. VAT chu kan rin angin zawrh leh chhawn atana ti an nih rualin keiniah hian khatiang ang provision remchang tak kha a awm a. Chuvang chuan tun atanga reiloteah hian Mizoram sorkar-ah chhiah an chawi ngei theihna turin kan tilui ang.

SPEAKER : Zawhna No. 129-naah kan kal ang a. Zawt turin Pi Vanlalawmpuii Chawngthu i sawm ang .

Pi VANLALAWMPUII CHAWNGTHU : Pu Speaker ka lawm e. Public Health Engineering Minister zahawm tak chhan atan, Lungchhuan khua hi tui an harsa hle mai a, an harsatna sukiang turin Department atangin hmalak theih a ni em?

SPEAKER : PHE Minister zahawm tak Pu Zodintluanga i lo sawm ang.

Pu ZODINTLUANGA, MINISTER : Pu Speaker, kan Member zahawm tak nula Vanlalawmpuii Chawngthu zawhna starred question 129-na chhanna chu, thei e, tui harsatna sutkian nan hian tui dahkhawlina tuizem (RCC Reservoir) ltr. 3,20,00/- dawng panga (5 nos) siam a ni tawh a. Tui harsatna sutkian nan hman mek an ni a, hmalak chhonzawm zel tum a ni. Tin ka'n sawi belh duh chu Pu Speaker, Lungchhuan khua khi keimah ngei pawn ka han tlawh tawh a, PHE ka chan hnu hian. Tlangchhipah an awm a, an khawngaithlak khawp mai a, tuna reservoir panga kan siam sak pawh hi anni tan chuan an kham khawp lo tih kan hmu a. Amaherawhchu, Mizoram-a kan lak dan pangai thin gravitation a lak tur hian an awmna khi a sang em em mai a, an ram chhung atangin khaw tam takin tui chu an la lawi si a. Tui pumpna tur remchang mai khi a awm lova, Department official-ten Lungchhuan-in tui hnianghnara an neih theih nan an thiam ang tawkin, dap

thei ang angin an dap mek a ni tih kha kan Member zahawm tak nangmah kal tlangin ka rawn hrilh a ni e, ka lawm e.

*Speech not corrected.

SPEAKER : Zawhbelhna a awm lo angah ngai ila, a chhang tha tawk a. Zawhna 130-na neitu Pi Vanlalawmpuii Chawngthu sawm ila.

Pi VANLALAWMPUII CHAWNGTHU : Pu Speaker ka lawm e. Ka zawhna Food, Civil Supplies & Consumer Affairs Department changtu Minister zahawm tak chhan atan starred question 130-na:-

- a) Food Security Act hi Mizoram-ah hman tumna a awm em? Hman ve ni ta se Mizoram hian kan thatpui ang nge kan thatpui lo zawk ang?
- b) Tuna Rel kawng siamthat vanga Mega Block hi engtika zawh tur nge a nih? Mega Block vang hian Department-in eng angin nge harsatna a tawh?

SPEAKER : Zawhna chhang turin Minister zahawm tak Pu John Rotluangliana i lo sawm ang.

Pu JOHN ROTLUANGLIANA, MINISTER : Pu Speaker, member zahawm tak Nula Vanlalawmpuii Chawngthu Starred Question 130-na chhanna chu –

- a) Food security Act hi Mizoramah hman ve tuma hma lak mek a ni. Hman ve ni ta se Mizoram hian kan thatpui ang nge kan thatpui lo zawk ang tih hi chu hman a nih hma chuan hriat theih a ni rih lo.
- b) Tuna rel kawng siamthat MEGA Block hi 01.10.2014 a tan a ni a, thlaruk chhunga zawhfel hman tura ruahman a ni. Tun dinhmunah chuan MEGA Block avangin Department-in harsatna a tawh hriat a ni lo.

SPEAKER : Zawhbelhna Pu Lalruatkima

Pu LALRUATKIMA : MEGA Block chungchang hian thla hlui vel kha chuan Mizoram pum min tiralkhel a. Pu Speaker, kan hriat angin kan buai khawp mai a, sorkar pawh a buai a, mipui pawh kan chia i a ni. Chutah chuan ruahman lawkna awm turin

MEGA Block hi engtikah nge sorkarin information kan dawn tih kha ka zawt a. Tin, inbuatsaih lawkna hun kan neilo hi engnge a chhan tih ka zawt tel duh baw a. Pu Speaker, kan sawibelh duh chu MEGA Block tur hi Tripura sorkar chuan hre lawkin Tuipui lamah buhfate lalut turin an inbuatsaih tih chanchinbuahte kan hmu a. Keini chu 1st October atanga Block tur ti si kha khami dawn hnaiah khan kan ralkhel ta chiam mai kha information kan dawng tlai bik reng em ni tih ka'n zawt tel a ni.

SPEAKER : Pu Rinthanga zawt turin lo sawm leh ila.

Pu K. LALRINTHANGA : Pu Speaker, Food Security Act hnuaiiah hian Mizoram mipui eng percentage-in nge Food Security Act dawng thei tura ruahmanna central sorkar hian a siam?

SPEAKER : Pu K. Sangthuama

Pu K. SANGTHUAMA : Pu Speaker, ka lawm e. Myanmar lam atanga Buhfai lak tum kha ngaihtuah chhonzawm zel a ni nge, tihtawp tak ? tih kha ka zawt duh a. Tin, Food Security Act hi Mizoram-ah hman thuai hi a tha lawm ni ? sum harsat chungchang phe chu kan hria a, amaherawhchu, mi retheiten nasa taka a zar an zo tur a ni a, heta tan hian kan sorkar hian kumthar lo awm turah hi chuan hman theihin a peih thei dawn lawm ni? tih kha ka'n zawt duh a.

Tin, Buhfai FCI atang lova tuna Buhfai kan leidan ang hian chhonzawm zel mai hi a tha lawm ni FCI-ina min pek aia a tlawm zawk theih avang leh Guwahati atanga awlsam taka phurh a ni lo tih kan hriat rual rualin Guwahati-ah khuan Buhfai phur duh motor a sangtel an awm laiin helamah hian tan lak chhoh zel zawk ni selangin kan harsatna pawh hi Burma lam atang chuan kawng a chhia a, a theih loh niin a lang a. Chuvangin tuna kan sorkarin a ruahman ang hian mimal hnenah hian a tlawm zawk baw a, tihchhonzawm zel hi a tha lawm ni? tih kha ka'n zawt duh a ni e.

SPEAKER : Zawhna a tam tawk tawh a, a chhang turin Minister lo sawm ila.

Pu JOHN ROTLUANGLIANA, MINISTER : Pu Speaker, Pu Lalruatkima, member zahawm tak zawhbelhna kha, hemi MEGA Block awm tur hi kan hriatna a rei tawh a, Tripura te nen kan hre rual reng. Keini tan hian hmalak a harsa em em a. Kan ram hi land lock area kan ni a, anni chuan Bangladesh kaltlangin Visakapatnam atangin an la chho a. Amaherawhchu, keini hian kan hriat a hma rual rualin hmalak tehchiam dan pawh a awm lova, theih ang angin sorkar leh department lam ten hma an la a. Kan inbuatsaih theih ang angin kan inbuatsaih a, buhfai a stock theih ang angin kan stock a, tunah hian buhfai hi thla thum ei vel kan stock a. FCI lam pawhin ‘thlaruk chhung tal chu in stock thei lawm ni?’ min ti a, mahse kan kudam neih ten a zir loh avangin thla thum ei aia tam hi kan stock thei rih lo a ni. Kan hre tlai hran lova, amaherawhchu ka sawi ang khan han inbuatsaih tehchiam dan a awm lova

Pu LALRUATKIMA : Pu Speaker, point of order, hre hma si chu IOC, Vairengte Satellite Oil Depot te pawh lo chei that tir awm tak a ni a, tunah hian petrol te hi (interruption)....

Pu JOHN ROTLUANGLIANA, MINISTER : Khutilai Vairengte Oil Depot kha chu buhfai dah nana chei chi a ni lova Pu Speaker, oil dahna lam a ni.

Pu LALRUATKIMA : Buhfai lam ka sawi lo, mipui mamawh a ni a, control item a ni, essential commodities a ni.

Pu JOHN ROTLUANGLIANA, MINISTER : Pu Speaker, ka'n sawi zau deuh lawk ang e. Central sorkar lamin khutilai khu security chungchang avangin min khar sak tawh a, keini state sorkarin kan duh duha hawnga dahkhawl leh mai thei kan ni lo Central sorkar kut a ni a, annin security avanga khulai Oil Depot khu khar a ni e.

Pu Speaker, member zahawm tak Pu Rinthanga zawhna kha - Food Security Act-ah hian mi 701000 chauh min huam dawn a, chu chu urban area-ah 40%, rural area-ah 60% tih a ni a. Chuvang chuan (kan member zahawm tak Pu Sangthuama zawhna pawh kha a chhang tel nghalin ka hria a) Food Security Act hi keini ram tan chuan a nghahhlelawm lutuk lo a ni. Food Security Act-in buhfai min pek theih chu thla khatah mi pakhat tan 5kg chuah a ni a, chu chu kg-ah `3 hisapa pek tur a ni. Tunah hian sorkar hian Zokhaw lamah chuan thla khatah 8kg in mi pakhat tan a pe a, chu pawh chu kan kham si lova.

Food Security Act hi tih tur ti a central sorkarin min rawn tuk lui a nih chuan engkim kan peihfel vek tawh a, tunah hian a guideline kan peihfel a, identification pawh sorkarah approval lak turin Pu Speaker, kan peih tawh a. Amaherawhchu, ka sawi tawh ang khan 5kg chauh mi pakhat tan a ni tawh dawn a, a dang zawng zawng kha pakhatmah quota min pe tawh dawn lo a ni. Chuvangin, hei hi ram mipuite tan chuan a nghahfakawm lutuk lova.

Buhfai man tlawm zawkin tuna kan lei ang hian local purchase-ah FCI buhfai lei lo hian a lei theih lawm ni tih kha, tunah hian kan lei mek a, quintal 30000 kan lei tawh a, hei hi FCI in economic cost a min pek aia a hniam zawk avangin a theih anga tam local purchase-a lei turin ruahmanna kan siam mek a ni. Pu Speaker, Myanmar lampangah hian FCI lam te kaltlangin tender chhuah a ni a, amaherawhchu an tender chhuah kha a rate a sang lutuk a, a chhangtute khan kha kha tihthat leh tur an ti a, tunah hian an la chhuah tha leh chiah lo a niang. Engpawhnise, Myanmar lam atanga la tur kha chuan FCI hnuai atanga tender koh a ni a, state sorkar hian kan hriatpui vak lo, an kut a ni a, min rawn lemlo bawk.

SPEAKER : Awle, Pu T. Sangkunga

Pu T. SANGKUNGA : Pu Speaker, ka lawm e. Food & Civil Supplies Minister hi a active a Buhfai harsatna sutkianna atan hian a tangkai khawp mai a, mipui pawhin an fakin ka hria a, mi ropui tak takten “a va fel ve aw” an tih hi ka hre zauh zauh a, lawmawm ka ti a, chu chu ka’n sawi hmasa duh a.

FCI ten Buhfai an lei hi a grading hrang hrangin a quality hi an ti thin a kan hre theuh a, hemi titu nih hi farmer-te phei chuan an intlawn siak nasa an ti thin a, an buhfai kha a grade tha chi a chhuah leh chhuah loh thuah te khatah khan tuna hetia FCI Buhfai aimaha mana kan han lei te a ropui a, an speed a tha bawk si a, kan minister pawhin fak a hlawh phah a, i veilama mite pawhin an rawn fak hial a, tihchhunzawm zel chi a ni lawm ni te an ti a, a lawmawm khawp mai a. Khatah khan a grading hi siam a ni em, a quality hi Mautam hmasa a American Buhfai, Buhfai uihin an lo thlak tih ang deuh khanin tlawm ringawt mahse a quality a that si loh kha chuan a tha dawn lova, hei hi engtingge an tih aw tih kha kan zawt a ni.

SPEAKER : Dr. K. Beichhua, zawt nghal mai sela,

Dr. K. BEICHHUA : Hman deuhlawk a kan breaking news kha han zawh ka duh deuh a, Kolasib a buhfai quintal 150 MJA in an man khan Burma leh Kolasib vela zinna atan engzat vel chiah nge ni senso tih kha ka zawt e.

SPEAKER : Minister zahawmtak chhang turin sawm ila.

Pu JOHN ROTLUANGLIANA, MINISTER : A hmasain kan member Pu T. Sangkunga zawhna kha buhfai hi kan tender-naah pawh khan fine rice grade 'A' kan ti a, chutiang ang chuan min rawn supply niah kan ngai a. Hetilaia a grade pek dan hi a siam hleih theih chuang lova, amaherawhchu, 'a tha khat, a ei tlak khat e' tih a ni mai. Tin, Kolasib-a buhfai quintal 150 bo leh phaia kan zin expenditure kha fiamthu thawhnan tak min hmang a Pu Speaker, 'buhfai in heh hle mai,' min ti a, a vanduaithlak khawp mai. Kolasib-a kan kal tum khan Bairabi godown zuk en tura kal kan ni a, kan tam lo khawp mai a, mi 10 chiah chiah kan ni. Parliamentary Secretary zahawm tak Pu T.T. Zothansanga leh a PSO pathum te an ni a, kei ka PSO leh ka Driver paruk kan ni a, ka PS Driver leh amah 8 kan ni a, kan Additional Director Pu Lalthansanga a Driver nen 10 chiah kan ni a. Pu Zothansanga, kan Parliamentary Secretary hi a damsam loh avangin Kolasib atang khan min kir san a, tlai lamah phei chuan 7 kan ni. Kan lo ei hnem deuh hlek pawh a ni mai thei e. Chhuanlam atan khan an lo sawi ve a, sawi tham em emah ka ngai lo.

Tin, Myanmar lam zin kha chu Pu Speaker, private a kal kan ni a, kan official tour chin kha chu Zokhawthar thleng kha a ni. A bak kha chu kan private a ni a, House-a han sawi viau chi pawh a ni lem lo e.

SPEAKER : Khaile, No. 131-na kha kan la tawh ang a, Er. Lalrinawma'n zawt sela.

Er. LALRINAWMA : Pu Speaker, ka lawm e, Taxation changtu Minister zahawmtak chhan atana ka Starred Question No. 31-na - Tun dinhmunah Sorkar hnathawkten professional tax an pek dan kalphung hi tihdanglam theih a ni em? tih ka zawt e.

SPEAKER : Awle, a changtu Minister zahawmtak Pu Lalsawta i lo sawm ang.

Pu LALSAWTA, MINISTER : Pu Speaker, Er. Lalrinawma zawhna - Tun dinhmunah sorkar hnathawkten professional tax an pek dan kalphung hi tihdanglam theih a ni em tih chhanna chu - Sub-Rule (1) of Rule 5 of the Mizoram Professions Trades, Callings & Employments Taxation Rules, 1996 angin Mizoram sorkar chuan a hnuai hnathawkte professional tax pek dan kalphung hi a tidanglam thei a ni. India Constitution bithliah chin a pelh loh chuan tih a ni e.

SPEAKER : Zawhbelhna nei chuan zawt rawh u.

Er. LALRINAWMA : Pu Speaker, ka zawhbelhna chu hei hi a ni. Kan hriat angin professional tax chu ₹ 2500 aia tam pek a theih loh a, chutih rual chuan hetilaia order an chhuah 2011-2012 ami ang hian kan han pek dan lai hi singkhat sangnga a pumpuia la leh heta tanga tawpthleng mai khan kan han hrutruak puk mai hi ennawn theih a ni em aw tih ka'n zawt a. A chhan chu keini MLA te pawh kan ni tel vek a, professional tax chu ₹ 2500/- tho pek a ni a, chutihlai chuan hetah tawngmawilo ni lo se, Peon leh Chowkider zawng zawngte nena a inhnut rual a an han pek vek mai hi chu hlawh a in tam hleih si a, an khawngaihthlak deuh lo maw ka ti deuh a. Hei sumdawna thilah hian reitak ka tal a, hetah hian kan turn over atangin min chhutsak a, ₹ 2500/- pe tlinglo dawr te deuh te chuan ₹ 1000 te, ₹ 500 te kan pe a, a dawr lian deuh company atanga agency te chuan a full te hian an han pe a, khatiang deuhhlekkhan ruahmanna min siamsak thin a ni a. Helai bikah hi chuan chhiah hi an la tur anih rual chuan a inkar hi a zau lutuk deuh lo maw tih hi min ennawnsak thei em ? tih kha ka'n zawt a ni e.

SPEAKER : Aw, ngawi rawh aw, Pu T. Sangkunga khan a phar hmasa a.

Pu T. SANGKUNGA : Pu Speaker, ka lawm e. Hei hi Sorkar hnathawkten reitak kan buaipui tawh a, kei pawn vawi tam tak Delhi-ah Federation aiawhin ka lo kalpui tawh thin a. Tin, a maximum hi a hniam lutuk a, chutih lai chuan ₹ 275 nge ₹ 375 vel kha a maximum niin ka hria a, ka hrechiang chiah tawh lo a rei tawh em a. Pi Indira thih dawn tep a lo kal hnuhnun ber pawh khan kan han hmu a, chu ta kan han sawi chu, Madame, kan contractor lian hausa pui pui te leh peon te nena an pek a inang reng mai te hi chu a ni thei lo. Kan sorkar kan han nawr lahin hei hi constitutional provision a nih avangin constitutional a tihdanglam theih loh an ti bawk si a. Kan hausa ho hian nuai tel te pe se, grade-IV leh hlawhtlem te hi awl thung ilangin sorkar hnathawk

lian te hi khawn tam deuh ila kan ti a, an lo hre reng reng lo mai a Dan hi. Chutih laia Home Minister of State Mrs Sinha kha a rawn hruai a, nangni Mrs Sinha hetiang dan hi a awm i hria em professional tax hi kan ti a, ka hre reng reng lo a ti a. An hliahkhuh thiam khawp a, ani hi chu hmanni lawka kan dah a ni a, a la hre hman lo a nih hi, kan hawn velleh kan rawn ngaihtuah ang a ti a. A san zawng hi State ho Tribal Area, Schedule Area amite hi tangrual deuh ta ila, chuti a nih loh chuan kan sorkar hnathawk liante phai an zuk awm a, IAS senior deuh te chuan income tax an zuk pe a, tin, Mizoram ah an rawn awm a, Peon te nen an pek a inzah reng mai a, Chief Secretary te pawh. Khatiang ang kha sorkar hnathawk ang chuan a tha kan ti lo khawp mai a, chu chu tihdanglam theih a ni em ? Kan State sorkar hian khami tur khan State dang Tribal Area amite nen hian tangrualin hei hi up turin Central tan pawh a ui awmlo lutuk a, tax lakna tur a ni a, State ang hian buaipui tlang ta ila, tuna tax kan lak a buaina chhan ber pawh hi a solve dawn a, kan State tan hian a hlawk dawn em em a, hei hi kan Minister zahawmtak hian min buaipui thei angem le tih kha ka'n zawt a ni e, capital letter-in.

SPEAKER : Pu K. Sangthuama, zawhbelhna dang.

Pu K. SANGTHUAMA : Pu Speaker, ka lawm e. Kan ngaithla tui deuh a, a tawp sales tax hrim hrim hi chu sangpui leh engemaw hi chu beiseiawm thei chiamah ka ngai lova, siamrem tur chungchanga an zawhna kha tha khawpin ka hria a. Kei chuan khalam ni lo khan Pu Speaker, tawite ka'n sawi ve ang a, tax lam a ni bawk a.

Tax-ah hian thahnem kan ngaih a ngai a, Sorkar hnathawk hlawn nuai khat/nuaihni dawn dawn hlawn kan tam a, singli/singnga chutiang ang chuan kan ram sum tam zawk hi ti ta mai ila a mawilo zawng ni lovin, kan sorkar hnathawkte hlawn hian a kal a ni ber a. Chuvangin, wawinah hian kan tax pek hi pe lo tluk kan ni a, VAT kan tih lah hian kan zavaiin a rethei ber atanga a lian ber thlengin kan pe a ni mai a, kan va leina atangin, hei hi indirect tax a ni a. Direct tax-ah hi chuan tumah hian phunna khawp tax kan pe lo a ni. Amaherawhchu, kan thingtlang lam an rethei deuhhlekk a, tax hi a san chuan a tha chiah lova. Hei hi chu Revenue lam chan a ni a, nakinah zawhna a la kal ang a.

Tuna ka zawh duh leh thaa ka hriat chu, Tax chungchangah hi chuan kan sorkar hnathawkte atang hian tam deuh lak tum ila thain ka hria a, hei hi a inthlahrunawm

loh ka ti a, ka rilru a ka veina a rei tawh a, tunhma atangin, ka zawt anga, Pu Sangkunga pawh khan a hmang rei viau mai a. Chuvangin Pu Speaker, lo hrethiam la Tax chungchangah hian tun aia kalphung thar tha kan neih loh chuan kan ram hi a ngaihtuahawm em em mai a, chuvang chuan kan hmuh theihna tur Sorkar hnathawk lam atangin inthlahrung lovin ngaihtuahna siam ila, thain ka hria a. Sorkar hnathawk hnen atang hian Professional Tax nilo, Tax ruahmanna dang a awm em? tih kha ka'n zawt a ni.

SPEAKER : Awle, Minister zahawm tak kan sawm anga, khatiang kha Budget Session-ah khan zep hram vek ila chu a tha tur a nia. Question Hour-ah zeh talh kan tum a ni a. Engpawh nise, Minsiter-in a chhang thiam em ang chu maw.

Pu LALSAWTA, MINISTER : Pu Speaker, a zawhna neituin a rawn zawhbelhna hrut rual tih kha ennawn tul a nih chuan kan lo ennawn ang a, mahse kan hrut ruallo niin ka hria a. A chhan chu an lak luh atanga kan han teh khan Peon te khan la lut ve phak an tih a, an pek a tul ve tlat khan an hlawh let riat, a let sariha hlawh tam pawh kha ni sela ₹ 2500 kha an pel thei tlat si lova. Chuvangin ₹ 2500 ah hian a intawngkhawm a ni ber, a nihna takah chuan ₹ 2500 hi engatinge ₹ 2500 a nih tlat mai le tih hi zawhna awm tak a ni a, anni pawh khan an rawn sawi a, a then kha chuan an hre sa vek tawh thova. A awm zia chu India Article 276 na hian Professional Tax Trades and calling kan tih ang chi kha a bill an intuk sa tlat mai a. Tunhma kum reitak chhung kha ₹ 250 a ni a. 1988 khan a let sawmin ₹ 2500 ah an pun a, 1988 atanga vawiin thleng hian ₹ 2500 kha a ceiling a ni ta ngar ngar mai a. Chutiang a nih avang chuan kan sawi tawh angin direct tax-a kan lak theihah chuan professional tax hi direct tax te zing ami a ni a, mahsengin, kan sorkar hnathawkte nuai khat te, nuai khat pel te pawh kha han lak dawn khanin professional tax anga kan lak a, ₹ 2500 kan lak bak kha chu kan la thei lova. Income Tax kha chu kan ti thianga lova. Kawng hranah income tax kan la thianga lo hrim hrim a, central purview a ni a. Chuvang chuan thahnemngaihna te a lawmawm em em rual khan helai hi chutia siamthat mai theih a ni lova. Board Committee-ah khuan kei pawh member ka nih ve laiin a zawh te pawh ka'n zawt a. Hengte hi a tih ve theih lawm ni ka'n ti a. Mahse kan member puite an tui vak lo. A chhan chu professional tax hi income tax pe ten an pek tho ngai a nih avangin anni tan khan nuai hnih/nuai thumte emaw tax kha pe leh dawn se, income tax pe bawk si, professional tax nuai hnih/nuai thum pe bawk si an nih kha chuan an tan a rit lutuk dawn a. Chuvangin keini Mizo ang hi India ramah hian tlemte chauh an awm avangin keini vang ngawr ngawr a India Constitution 276-na han amend kha tul an ti vak lova, tin, a tlangtla lovang tih an hresa bawk a nih ka ring a.

Tin, sorkar hnathawk ngawr ngawr a ni lova, sumdawngte, zaithiam te thleng pawh hian an income atanga lak theih ve vek chu an ni a. Tuibur Industry neite pawh an hlawk viau a, khatiang pe thei tur dinhmuna han din khan chuan Pu Speaker, an pe ve vek tur a ni a. Chu chu tuna kan dinhmun chu a ni. Amahni zing rau rauah hian an tax pek dan hi Peon te hi chuan pe em lo se emaw, khatiang zawng khan an rawn rawt a, a nih kha chuan an hlawn milin kan han chhawp chho ve chu a ni a. Mahse ₹ 2500/- ah hian an thleng deuh rup vek mai a. Officer chin reng rengte chu ₹ 2500/- chin vek an thlen khan sumdawng hausa thlakhata nuai sarhi, nuai riat, nuai sawm turn over nei emaw, profit nei emaw pawh khanin kum khatah ₹ 2500/- kha a ni tho tho mai a. Chuvangin ₹ 2500/- ah hian a intawng khawm rup mai a ni. A limit a nih tlat avang khan. Chu chuan kan member zahawm tak Pu T.Sangkunga zawhna pawh kha a chhangin ka hria a.

Tin, kan member zahawm tak Pu K.Sangthuama'n thahnemngaihnaa a rawn rawt kha a lawmawm ka ti khawp mai a. Sorkarin pawisa a mamawh a, a mamawh a ni tih hrechiantu chu Officer te tho hi an ni a. Anni hian an rilru tak pawhin pek hi an hreh lo a ni, pek hi an hreh lova, mahse an hlawn atanga kan pek tir dawn kha chuan direct tax a ni a, direct tax kha kan khawih theih loh thil kha alo ni leh a. Pek theih dan kawngte pawh anmahnite nen, an Association te nen, an Federation te nen pawh la inrawn khawmin heti taka rilru thain min rawn dawr takah chuan keini pawhin kan lo dawr let ve thiam chu ka ring a. Chu chu sorkar hnathawkte chungchang bik kha lo ni ta se.

Tax kalphung thar tha hi inbuatsaih theih lawm ni tih lai zawhna kha a pawimawhin ka hria a. Kan ram dinhmuna, vawiin dinhmuna pawh, hei hi kan ngaihtuah mek reng a. Pu Speaker, kan lo tih than tawh hian min bawh bet nasa em em a. Kan tih than tawh hi tih reng tur emaw tih te pawh a awm ve thin a, chung chu kalsan a ngai tawh a. Helai House-ah pawh kan sawi tawh ang khan piangthar ang deuh hlek kan nih a ngai dawn a, kan tih thin tih tawh ngai loh te a ngai a, kan tih ngai loh tha si kan tih te pawh a ngai dawn a. Chung angah chuan entirnan, inhmun kan pe a, lehkha phekin kan pe a, a lem te kan zia a, chutah chuan cheng tam lutuk lo te pein LSC te kan pe a, cheng sanghnih sangthum te pawh aniang. Mahse sorkarin Damdawi In sak nan emaw, kawng laih nan emaw, School atan emaw, College atan emaw, NIT atan pawh nise, khatianga kan han lak let leh dawn khan tlemte pe a, an lo neih kha lak let leh dawn khan nuai sawm nuai sawm hnih te a lo ni thin a, he kalphung hi kan tuar nasa em em a. Tun ang renga compensation hi a kal phei chuan kan sorkar hi bankrupt in a awm tir ang tih hi ka hlau khawp a ni.

Chuvang tak chuan mi ramah pawh an tih thin a ni a. Engahnge kan in hmun te hi mimalin in hmun a zawrhna let sawm ang vel te chuan zuar ve ila, sorkar te pawh hian. Mimalin nuai li, nuai nga, nuai sawm te a an zawrh thin te hi chu singli, singnga te pawhin khul ve se, chung chu engahnge kan inthlahrun ve lem ang. Ram hi sorkar ta vek a ni a, sorkarin man lova a pek hi engah nge a thlawn ringawt a kan pek a, kan mamawh a, kan lak let leh dawna to taka kan lak let leh thin hi. He kalphungte pawh hi kalphung tharah chuan tihdanglam tha kan ti a. Chu ang chi te leh kawng tam tak tax kalphung thar tha ti a kan member zahawm tak Pu K.Sangthuama'n a rawn sawi kha tunah hian kan ti tan chho mek a, kan buaipui chho mek a, Mizoram hian chutiang chuan ke kan pen thar duh a ni tih kan sawi duh a.

Hmanni lawk khan kan member zahawm tak, (kan inthlahrung lo teh ang, a zawttu pawhin rei deuh an sawi thova, a chhangtu pawhin kan lo sawi rei ve deuh a nih pawhin pawiti lo ila). Pu K.S. Thanga te pawh an nupain an han zinkualnaah Singapore-ah te chuan ram sorkarin ram man mimal hnena a leitirna ringawt khian kum khatah US dollar billion za te an hmu thei a ni. Chutiang chuan ram nuam tak an lo siam a nih chuan keini pawhin kan tihtharna tur tam takah hian tunhmaa kan tih thin dan ang kalsanin kawng thar kan zawhna turah hian Pu Speaker, House kaltlangin, nangmah kal tlangin Mizoram mipui hnenah pawh he kawngthar kan zawhna turah hian mi ram tha kan sawi ang hi kan it a, nuam kan ti a, chutiang kan siam ve dawn a nih chuan an tih ang leh an inpekna leh an inhuamna ang kha kan inhuam ve a ngai a ni tih kha ka'n ngenna leh ka sawmna pawh a ni nghal a ni. Ka lawm e.

SPEAKER : Aw, a chiang e. Zawhna No. 132-naah kal ila, a zawhna neitu Er. Lalrinawma, member zahawm takin han zawt sela.

Er.LALRINAWMA : Pu Speaker, ka lawm e. Taxation Department changtu Minister zahawm tak hnena ka Starred Question No.132 na chu – Mizoram a Dawrkai zingah hian Non-Tribal VAT Registration nei engzat nge awm tih ka zawt e.

SPEAKER : A chhang turin Minister zahawm tak Pu Lalsawta sawm ila.

Pu LALSAWTA, MINISTER : Pu Speaker, member zahawm tak Er.Lalrinawma zawhna chhanna chu hetiang hi a ni e – Mizoram chhunga dawrkai zingah non-tribal, Mizoram Value Added Tax Act, 2005 hnuai registration nei awm zat chu 162 an ni.

SPEAKER : Zawhbelhna a neitu Pu Rinawma'n zawt se.

Er. LALRINAWMA : Pu Speaker, VAT Registration tih dawn khan tunhma District Council kan nih laia Permanent Trade License leh Temporary Trade License neite kha tih theih a ni a. A chhan chu ILP lamah two year validity an neih theih avang leh purpose of stay 'business' an neih theih avangin phalsak an niin ka hria a. Tah chuan khang mite khan Power of Attorney lain sumdawna an tan ve a ni. Hetah pawh hian tam tak a awm a, helai ka kenah phei chuan 53-ah hian 44 hi Power of Attorney nei kha Trade License inrochhungte kha an ni a. Heng Trade License holder ti mai ila, Power of Attorney hmanga holder te hian Trade License ang chiahin mahni in sponsor-in engkim mai Registration kha an ti thei a. Hengte hi ennawn leh theih a ni em tih leh tuna mi nei te kha a ram pum huap, sawlai District Council 3 te chu ka hre tel lo va, an tel leh tel loh. Khatah khan helaiah chuan 53 an ni a, a bak te kha eng atanga Registration hmu nge an nih tih ka zawt e.

SPEAKER : Minister zahawm tak chhang turin sawm ila.

Pu LALSAWTA, MINISTER : Pu Speaker, zawhna neituin a rawn zawhbelh kha hetiang hi a chhanna tlangpui chu a ni. 162 te kha tute nge tihah chuan kan sawi tawh angin tunhma atanga tlemte lo awm kha an awm a. Khami bakah khan Mizoramah hian Mizote bak hi sumdawng lo hram hram se tih he ram sorkar kan neih apiangin kan tanhmun khawhna a ni thin a. Chutiang avang chuan vawiiinah hian North East-ah chuan keini Mizoram chauh hi mahni rama a hnam tena sumdawna an la vawn nghehna awm chhun a ni a. Meghalaya-ah te, Assam-ah te, Tripura-ah te, Nagaland-ah te chuan Bengali leh Maruari kutah a lut vek tawh a. Chutiang a nih avang chuan kan fet em em a, hna an thawh dawn a kum 2 tal ILP Pass nei an nih chuan tih te har tak tura kan beisei kha a condition-ah siam a ni a. Mahse Mizoramah hian hnathawk nghet, contractor lian kha an lo awm ve nual a. Chungte leh sumdawngah pawh kum 2 ILP daih lo nei te an lo awm ve nual a. Chutichuan Public Undertaking kan tihah pawh hian 2 lek chu an lo awm ve a. Chung zawng zawngte nena belhkhawm chuan 307 an ni a.

Tin, hemi chungchanga keiniin kan va thunun theih loh mahni a Legislature nei ngat Autonomous District Council nei an awm a. Khangah khan Non-Mara emaw, Non-Lai emaw, Non-Chakma emaw an lo tih ve ang a an zuk tihna kha chu kan zuk hriatsak vek lem lo va. Tin, hre tur pawhin min duh vakin kan ring lem lo a, tul an ti lovang a. Chuvang chuan tuna kan dinhmunah

chuan 307 hi a ni a. Work Contractor tihah hian 143 an awm a, Public Undertakings kan tihah hian 2 an awm a. Tin, dawrkai (Dealers) kan tihah hian 162 an awm a, an vaiin 307 an ni a.

Helai chungchang hi sawi a thain ka hria a. Chhiah chungchang kan sawi kan sawi a, chiah pek a tul zia leh sorkarin a mamawh zia te kan sawi a. Chutih lai chuan Personal Way Bill tih a form a kan siam, mahse a danah chuan Section 47-na Mizoram VAT Act, 2005-ah kan neih chu kan indil reng a, kohhran te, mimal pawhin min dil bawk a. Mahse hei hi he House zahawm takah hian an zawhna hrul a ni a, han sawi chian duh a awm a. An zuk lakna Assam emaw, West Bengal a ni emaw, Bihar a ni emaw atanga chhiah an pek si, Mizoram-a chiah pek ta tlat loh mai kha thain kan hre lo va. Kan zin veivah chuan pheikhawk te kan mamawh, personal belongings kan tih ang chu rit khawp pawhin thlawhtheihnaah leh Motor-ah pawh kan phur a, hengah hian chhiah lak kan tum lo. Mahse truck trip a cement te, balu te, iron-rod te, in sakna chi hrang hrang Mizorama chhiah cheng khat pawh pe lo va kan inla hi tha lo kan ti a. Mizoramah hian chiah an pe ve turah kan ngai a, mahse a truck trip ang zawnga chhiah lak kha a rem lo va. Chhiah kan lak dawn reng reng chuan in register a ngai si a. Chuvang chuan mi hrang hrang nakumah a duh leh dawn nge, thla lehah a duh leh dawn nge pawh hriat loh lo Register ringawt kha kan tih tur chu a ni bawk si lo va. Chuvang chuan a damdawi awm chhun chu Mizo hian Mizo sumdawngte kan dawr a ngai a ni.

Mizo hian Mizo sumdawngte kan dawr ang a, iron-rod a ni emaw, cement a ni emaw kan dawr ang a, glaze tile a ni emaw pawh kan dawr ang a. Chutah chuan harsatna awm thei chu, ‘a man a inthlau leh lutuk a, khulama kan leiin a tlawm si a, helama kan leiin sing hnih/sing thum kan help thei si a,’ tih sawi a ni thin a, ka pawm thlap a. Chumiah chuan kan humhalh tum ber kan sumdawngte pawh hian humhalh kan tum a, anmahni lamah kan tang tlang vek a ni tih an hriat chuan an titlawm ve tur a ni. A awm lo lutuk china an tihto avanga helaia lei ngam lo va, Silchar-ah emaw, Guwahati-ah emaw, Kolkata-ah emaw kan lei fo a tul kha chuan, khatiang khan ti vek ta ila chuan helai sumdawng khan hralhna tur a hmu dawn lo reng reng a ni. Tin, ken leh pakhat a neih chu hetiang ti thei mihausa, truck trip ti theiin chhiah pe lo va in a sak a, keini miretheiten kan in sak loan te la a, thil dangte puk a ti ve hram hram ten chhiah pe a kan sak reng ang chi hi thil dik a niin ka hre lo va. Chuvang chuan he ramah hian dikna kan sorkar pawhin luipui angin luang se a tih ang chiahin, mirethei tan pawh, mihausa tan pawh, inangkhat tlang pata kan tih theihna tur chuan Mizo-in Mizo dawr ila. Kan Mizo sumdawngte pawh min dawr dawn avang hian tunhma a put thin ang kha a put dawn tawh loh avangin min dawr tam dawn a, a rate pawh reasonable taka an tih ve a ngai a ni. Kha kha ka’n sawi belh hlek a ni, ka lawm e.

SPEAKER : Ngawi rawh aw, zawhna hun hi a tawp a nia. Pawhsei kha chu a tih chi lovang, tih tur dang kan la nei si a, nakinah kan zawng chhang ang.

Pu R.LALZIRLIANA, MINISTER : Pu Speaker, member zahawm takte information atan hei hi ka'n sawi lawk duh a. Nizan dar 11:36-45 inkar khan (ka sanaah kha chuan dar 11:38 a ni a) lir a nghing a, hriat theih chinah chuan hetiang hi a awmdan a ni. Magnitude 5.4 a tling a, a depth a lo nghinna kha 10 km vel atangin niin a lang a. Latitude 7.50 North-ah a ni a, Longitude 94.25 East-ah a ni a. Epicenter hi 213 kms of Northeast of Chittagong a ni. Heta bearing pek ang hi chuan Epicenter hi Khawhai atanga hla lo tak ni a chhut a ni a. Hriat theih chinah Khawhai leh a chhehvel khuaah lirnghing hi a na viau a. Vanneih thlak takin in leh lo tihchhiat leh inhliam phah erawh a awm lo va. Champhaiah te pawh a na viau a, Hall thenkhat ceiling te chu tam tak a tla niin kan dawng a ni. Kha kha information atan kan sawi duh lawk a ni.

SPEAKER : A lawmawm e. Thu chung hian sawi mai ila. Vawiinah hian chawlh la kan ti mai ang chu, House leave la hi kan Chief Minister zahawm tak Pu Lal Thanhawla hian tih tur saw lamah a neih avangin House leave a dil a, kan phalsak a. Tin, chutiang bawkin Pu Chalrosanga Ralte, ani hi chu chhungkaw lam thil avangin chawlh a dil a. Tin Pu P.C.Lalthanliana, Minister zahawm tak hian official hna a neih avangin chawlh a dil leh a, kan phal bawk a. Tichuan a awmlo sa kha kan Deputy Speaker Pu Lalrinawma, Pu Lalrinliana, Pu S.Laldingliana, Pu T.T.Zothansanga, an zavai hian tunah hian 7 an absent a ni. Hemi bakah hian Pu Lal Thanzara, kan Minister zahawm tak leh Pu K.S.Thanga kha chhim lamah, Pu K.S.Thanga bialah function an nei laklawh a, anni hi chu phalna pek tehchiam ngailo, nakina lokir leh mai tur an ni. Chu chu House ka'n han hriattir a ni e.

Tunah chuan private member's resolution kan la tawh anga, a resolution hi kan chhiar chhuak anga. 'Mizoram chhunga inkalpawhna kawngpui leh leilawn bridge chhe ta lutuk hi tun aia chak zawkin siamthat hna thawh ni rawh se', tih hi he House ah hian a rawn move a ngai dawn a. Tunah hian a resolution neitu, Dr.K.Beichhua, Saiha bialtu member zahawm tak sawm ila, rawn move rawh se.

Dr. K.BEICHHUA : Pu Speaker, a hmasain ka Private Resolution move thei tura hun min pek avangin lawmthu ka sawi e. A hmasain he House zahawm taka Member zahawm tak tak te vawiin 7th Legislative Assembly of 4th Session a he resolution pharh thei tura min duhsakna ka dawn avangin lawmthu ka sawi duh a ni. Vawiina he House zahawm taka member te he kan

Mizoram thatna tur atana in tha leh zung senga in rawngbawlna ropui ka tiin chhuanawm ka ti takzet a ni.

A bik takin kan House Leader, kan Speaker leh kan Senior ten he ram hmangaih taka min lo kaihhruai tawhna zawng zawngah lawmthu ka sawi a, Pathianin chakna leh damreinain malsawm che u sela, tih duhsakna ka hlan a che u. Vawiina he House zahawm taka kei tling lo tak leh politics a piang hlim ve te in he resolution ka rawn putlul hi inthlahrunawm ka lo tiin ka insit hle a, nimahsela, kan zoram tana thil tha tur leh mipui hamthatna tur ni a ka ngaih ve avangin inthlahrung takin he resolution hi ka rawn pulut a. Engpawhnise, member zahawm tak takten opposition kan nihna emaw rulling kan nihna emaw rilru atanga min ngaihthlak sak lova ram leh hnam tana rawng kan bawlna rilru leh thinlung atanga min ngaihthlak saka min pass sak ngei turin ka sawm takmeuh meuh che u a ni.

Tun dinhmuna Mizoram inkalpawhna kawng kan neih tlangpuite chu pakhatnaah chuan National Highway 54 Cachar to Aizawl, Serchhip, Lunglei, Tuipang 850 km a thui a ni a. Pahnihnaah chuanin National highway 154-na Bairabi, Bilkhawthlir, Kolasib leh Aizawl, 180 km a thui a ni a, pathumnaah chuan National high way 150 Aizawl, Seling, Tipaimukh, Churachandpur 700 km a thui a ni. Palinaah chuan NH 44 A, Sairang, Mamit, Phurra 230 km a thui a ni. State Highways kan neih te Champhai atanga N.Vanlaiphai, Lunglei to Thenzawl, Keitum to N.Vanlaiphai, Tlabung to Borapansuri, Kawlchaw to Tawngkawlawng. Aizawl to Mamit, Mamit atanga Vanhmun, W.Phaileng atanga Marpara, Kawnpui atanga Hortoki, Saitual, Phullen to Suangpuilawn. Khawzawl leh Sinzawl atanga Thanlawn leh Kawlkuh, Ngopa leh Mimbung te State Highways kan neih te an ni a. Hengte bakah hian District roads, Town roads, villange roads leh unclassified hnuai kawng hrang hrang kan nei baw a ni. Kan Mizoram chhungah hian kan inkalpawhna kawng angah te hian Leihlawn dawh tawh, dawh mek, la dawh loh leh dawh that ngai tawh tam tak an awm baw a ni. Pu Speaker, Mizoramin kawng tinrenga hma kan sawn ve theihna tur atan chuan kawng tha kan neih a ngai tih hretute vek kan ni.

Vawiina kan sorkarna kalpui mektute naktuka la kalpui zeltu turte eng party pawh ni se, kan tum ber chu zoram tihhmasawna ei leh bar leh kawng tinreng a intodelh taka he zoram hmasawna a hruai zel hi kan thupui ber a ni ti ila, ka sawi sualin ka ringlo. Project lian tham tak tak kan sorkarin hmachhawp a nei a. Naktuka zoram khawvelina project ala neih zel turte hi ropui ka ti a, heng zawng zawng tihlawhtling tur chuan inkalpawhna kawng tha kan neih hi kan tihmakmawh a ni. Chutiang a nih lai chuan member zahawm tak tak te u, vawiina kan inkalpawhna

tarlan te dinhmun a chhiat zia chu kei aia hrechiantgu vek in nih ka ringa, zin veivak tam apiangin kan inkalpawhna kawng leh leihlawn chhiat zia te chu a hrechiantgu kan ni ti ila, ka sawisual awm love. Kan National Highway, kan engkim lakluhna kawng dinhmunte hi entirman, Vairengte atanga Tuipang thleng hi han sawi ta ila, a tha lai aiin a chhe lai a tam zawk emaw tih theihin a awm a ni. A bik takin Lunglei atanga Tuipang thleng motor a han tlan zet chu kan taksa na lo lai pawh hi a awmlo tih theih tur a ni.

SPEAKER : I Resolution kha move phawt la, nakinah i la sawi dawn nia. I resolution kha move phawt a dik ang,

Dr. K.BEICHHUA : Chutiang dinhmuna kan awm avang chuan Pu Speaker, vawiinah hian kan ram dinhmun ka rawn sawi ang anih avang chuan ka resolution ‘Mizoram chhunga inkalpawhna kawngpui leh leilawn chhe ta lutuk hi tun aia chak zawka siamthat ni rawhse’, tih hi member zahawm tak tak ten min pawmpui a, he House zahawm takina min pass sak turin Pu Speaker, i phalnain ka lo move e. Ka lawm e.

SPEAKER : A neituin a move tawha, kan sawiho dawna, mi pakhat tan hian minute 10 kha a tawk mai lawm ni kan tihdan thin a ni a. Awle, amaherawhchu tlemin kan duham leh thina, minute 5 hnuah warning dar a ri anga, tichuan kan inring anga, minute 10 a tihtawp kan tum hram dawn nia. Tunah sawi duh ten sawi tan ang ule. Aw, Pu R.Romawia, Minister zahawm tak ilo sawm ang.

Pu R.ROMAWIA, MINISTER : Pu Speaker, chhuah lawk ka duh dawn avangin a sawi hmasaah ka'n tang ang a. Kan hre theuh a, ram changkang zawk, hman kumah khan Switzerland ramah kan zuk zin ve a, an kawngpui te chu a lo tha khawp mai a, an ram kha 1291 a independent kha an lo ni tawh a, chuvangin kawngpui tha nei tur khawpin an ram an lo upa tawh a, double lane an tih te pawh in hmulo khan Berne ah kan va kal a, Berne kawng kan va kalna kha chu kawng dang a ni a. Berne atanga Geneva kan lo kir lehna chu kawng dang a ni a, insut hlauhawm kha a awmlo reng reng a. Chuta ka ngaihtuahna a lo lang chu kawng tha te hi zan khat thil thu a kawng tha neih mai alo nih loh hi, tihian a lo inchherchhuan zela a lo bel zel a, kawng kawi te pawh a lo bel zel a, hun hi a lo duh em a nih hi, Ram tha, kawng tha nei tur chuan ram hlun tak, upa tak nih a lo ngai a nih hi tih kha ka ngaihtuahnaah a rawn lian khawp a. Chutiang chuan, Rome ah kan han kal leh a. Rome-ah pawh khan Appia Road, Tirhkoh Paula te an lo va hmuah a Rome-a an luhna te kha, kan Secretary Pu Thana te nen hian kan va tlan a. Chu chu hmanlai Rome

lungphah a kha a lo la inphah zar reng a. Chungte chu tha takin tun thleng khan an la kawl a. Khang khan kawngte hi a tha kan duh pawh hian hun hi a lo duh ngei mai a ni tih hi kan intawng harh a thain ka hria.

Kan ramah kan pi leh pu atang tawhin kawng tha duhna a lian em em a Pu Speaker, Aizawl kha Indopui-II na dawnah khan motor-in arawn thleng ve tang tang a, Tea estate ho an laih tir a. Indopuiin a nan avang khan chutiang chuan kawngin arawn pawh ve a. Tin, 1953 emaw daih tawhah khan Lunglei lam tihthlen duh khan Bawngkawn atangin bawngtuthlawha laiin khawtin te kha kawngpui sial tur khan thawhlawm an thawh khawm theuh va. Tiang chuan Lunglei kha motor han tihthlen ve hram hram a ni a. Pu Speaker, 1962-63 kan college kal lai pawh khan Lunglei leh Aizawl inkarah chuan fur lai, khua a chhiat chuan ni 4 kan thang a ni. Chutiang khawp chu kan ram kalphung a ni a. Mahse, vawiinah chuan keini te pawh kawng awm loh laia kalte kawng chhia a kalte ngei pawh he House-ah hian la ding rual kan lo la ni a. Chuti khawpin kan ram hian kawng tha te, inkalpawhna tha te, hi kan vei em em avangin, hnam anga kan vei avang hian kawng tha tam tak kan nei a ni a, a lawmawm hlein ka hria a.

National Highway 54 te kan ti a, National Highway hming dang dang pawh hi kan nei belh zel a. Chutiangan kan kawng lam ngaihtuhtute pawhin theihtawp chhuahin sum awm thei apiang Mizoram pawn lamah pawh World Bank lam a ni emaw, hmun dang dangah te pawh an dap tang tang a. Chutiangan khawpin kawng tha neih hlutna hriaa dapin kawng tha hi kan duh em em a ni. Tin, leilawn tha te pawh kan duh a. Tun hmain inkalpawhna a that tawh loh avangin Chhimtuipui kualkhung chhung bik te phei chu tui thiamlo tan phei chuan inkalpawh zung zung theih loh a nih avangin hnam ziaah te pawh tlema inman tawh lohna, inpawh tawh lohna te pawh a lo awm thin a ni a. Tunah chuan inkalpawhna kawng tha te a lo awm avangin kan ni te, kan pi te, kan pu te Mizoram hmun tina kan intlawhtawn zung zung thei ta hian hnam inpawh tawhna te, inpumkhatna te pawh thui takin min siam a ni tih kan hria a.

Chutianga beiseina sang tak kan la neih mek laiin Rail kawngte pawh Bairabi maia tawp lovin Sairang thleng sela. Tin, Sairang atangin Lawngtlai lamte pawh thleng se tih ngaihtuahna te pawh hmachhawp thui tak tak neih zel a lo ni a. Land transport-na atana hman chauh ni lovin tuikawng (water way) te, tin, thlawhna kawng (air-way) te thleng pawhin kan ngaihtuahnate pawhin a lo thleng pha ta zel hi thil lawmawm tak a ni. Chuvangin, inkalpawhna kawngpui tha te, leilawn te hi pawimawh tak leh kan hnam tan ro tling tak tak tur a ni a. Ramin ro a neih reng reng hi movable leh immovable property a ni a. Immovable property hi leilung nena into

zawm tlat a nih avangin British te pawhin tuna kan Governor bangla sa mah se sap ramah an pempui tawh lova. Kan DC office te khi sa mah se sap ramah an pempui tawh lova. Mizoram leilung nena into zawm tlat a nih avangin Mizoram ta a ni ta mai a. Chutiang chuan kawngpui tha te, leihlawn tha te, airport tha te, leilet tha te, huan nghet tha te hi kan leilung nena into zawm tlat ro nghet, immovable property a ni tih hriain sorkarna changtu apiang pawhin heng lama hmasawna hi theihtawpin kan beih zel hi thil lawmawm tak a ni a.

Kan ram naupan an pui ah, kan state puiah te phei chuan kan zia berin ka hria. Meghalaya te pawh tun hma Assam kan intawm laia kan khawpui ber Shillong a ni chung khan Tura leh Shillong inkalpawhna thlengin tun thleng pawhin an la harsat a, Guwahati lam kaltlanga inkalpawh la ngai te an la ni ve zawk a. Tin, Naga lam te pawh ni se tun hma, sap hunlai atang daih, Japan ral do lai atanga Dimapur atanga Kohima kaltlang a Manipur kawng kha an kawngpui pawimawh a ni a, a diversion ang tak tak pawh hi ala awm hlei thei lova. Tin, chutiingin Manipur lam ni se Jeribam atangin Imphal bulah chauh, kan ramah chuan chutiang nilovin, Mizoram chu kawngpuiin mi a vet nguai tawh a ni mai a. Burma lama kan hnahtlak pui pakhat Champhai-ah a lo zin a heti hian a ti an ti a, 'Lusei fa lam nge nge chu alo lopui ngei mai a, lampui te lam chu a thulin a thul sung mai a,' a ti an ti a. Lusei fa ram chu alo ropui ngei mai, kawngpui te lah chu a thlurin a thlur sung mai si a, a ti an ti a ni. Chutiang chuan, kan hnahtlak pui Tiau ral ami te pawhin min lo awh em em khawpin Mizoramah hian kawngpui te kan lo nei tam a. Chutih lai chuan kan control theih bak thil tam tak a awm a. Ruah sur suh se kan ti thei bawk si lova, lei min suh se kan ti thei bawk si lova. Lei a lo min a, heti lai lei chu tlahniam suh se kan ti thei bawk si lova. Hunthar bulte pawh chu a lo tlahniam veleh thin a, khatieng khan kan control theih bak hi a awm a. Nizanah te pawh lir rawn nghing suh se kan tih ringawt theih lohah khan lir a rawn nghing tlat mai a ni. A nasa lova, kan vannei a, kan nu phei chu a hlau khawp a, lirngin hnu phei kha chuan a muhil ngam vak tawh lo a ni. Chutiange chu a nih avang hian tupawh Minister lo ni se, PWD Engineer tupawh ni sela control theih bak hi tam tak a lo awm a. Khaw chungchang thua te kan thu lova, ram min chungchangah te kan thu lova. Kan thu theih bawk thil tam tak avang hian kan duhsam em em kawng tha, blacktop road, bel hun mai, a fur a thala hnum hlurh mai tuihawk per tur awm eih lo te, neih kan duh em em chungin tunah chuan kan la thleng thei rih lova, tumahin a mawh an phur lovin ka hria. Mizo fa zawng zawng chu kawngpui tha te, leihlawn tha te duh leh mamawh inti em em vek kan nih avangin hengte hi keini House ropui takin a sawia kan sawi vak a, kan resolution pass a thil awmze nei belh vak tur a ni em maw ni le? Kan duh tak tak a nih chuan kan zavai hian tangrual ila PWD te pawh hi kan theih ang ang hian pui ta ila, kan in bula nulla te pawh hnawhtu hlek a lo awm chuan kan chung pawhin va hnatlang ila, va tifai zel ila, kawngpuia

tuihawk kawngbo te hian alkatra te hi a tichhe thuai si a. Khatiang khan keimahni zawk hi inzirtir zawk ta ila, kawngpui kama hnim lo awm, tunhma pawhin kan pi leh pute pawh thlawhlai kawng leh khaw kar kawng hnatlangin an sat fai ang khan PWD labour in an rawn sam fai hma loh chu engmah tih kan tumlo ringawt pawh hi kan hnam hian kan ze tha kha chharchhuah leh tum zawk ila. Khawtin te pawhin kan khaw ram chhunga sorkar kawngte pawh hi va samfai te, tuihawk luankawr te sorkar rawn siam tawh hi lo maintain ve tum ta ila. Chutiangah chuan sorkar lam te pawhin a titha te chu lawmman siamin khawfai lawman kan siam ang deuh hian lawmman siam te pawh kan department-ten la ngaihtuah ta se.

Lengpui khua chuan entirnan, an khaw ram chhunga kawngpui zawng zawng chu maintain an ti tha khawp mai, nulla kawng hnawh pawh a awm lova, leivung te tak te chu an paih mai zel a, hnatlangin Lengpui hi kumin chu cheng nuai 1 lawmman PWD hian kan siamsak dawn a ni te han ti ta sela. Khatiang zawnga kal dan turte pawh he House hi chuan kan ngaituah lam ni ta zawk se. Tute emaw kaw k ran a, tute department emaw, tute emaw ti tura va vauchher hian keimahniah hian kan bial theuhah te pawh chutiang chuan mipuite hi vantlang kawng kan ta vek a nihna lai ngaihhlut thiamna leh hnatlan te hreh lova, pi leh pu a kan tih dan phung angin kawng tha inkawhhmuh ila, kan hlawkpui viau zawk dawn lawmmaw ni le? Chuvangin hetiangte chu thil tha tak mahse, tunge tichuang bik ang? ‘Tunge (SPEAKER: I hun a zo e) zawhte chu dar awrhtir ang tih ang vel mai mai kha niin ka hria a. Chuvangin keimahni homework kan inpek theih theuhna tur zawng zawk ang resolution te ni se chuan phur taka a ni tak e kan han tih tliar tliar turah pawh ka ngai, Pu Speaker, ka lawm e.

SPEAKER : Ngawirawh, midang kan koh hmain nichinah ka puan theihnghilh a, min ngaithiam ula. Kan Leader kha a awmlah chhung zawnga a aiawh turin kan Dy.Leader Pu R.Lalzirliana a ruat a, chu chu House-in hriatpui ila. A tih tur zawng zawng kha aniin a ti dawn a ni. Le, Pu John Rotluangliana.

Pu JOHN ROTLUANGLIANA, MINISTER : Pu Speaker, ka lawm e. Hei wawiina kan private resolution member zahawm tak Dr.K.Beichhua rawn putlulh ‘Mizoram chhunga inkalpawhna kawngpui leh leilawn chhe ta lutuk hi tun aia chak zawka siamthat hna thawh ni rawh se,’ tih hi ngaihtuah thuak chuan Pu Speaker, resolution tha tak a ni. Engpawhnisela Pu Speaker, ka han sawi duh chu, Mizoram hi kan thang chak em em mai a, keini naupang te pawhin kan han hmuh chinah chuan kan ram development hi a ropui a. Kum 2003 khan tuna ka dinna tho Mamit bialah hian ka ding a, chutah chuan Lengpui-ah te kan riak a, Hmunpuiah te kan riak a, campaign te

kha an sawt lo em em khawp a, tunah chuan chung Lengpui te chu, Aizawl khawlai ang mai, veng pakhat ang maia kan lenna a ni tawh a, Hmunpui te pawh, inkalpawhna te a tha em em tawh mai a.

Tin, development kal chho hrim hrim hi ngaiah hian kan nei hma vein ka hria. Kan ramah hian kawngpui tha te kan neihna hi ala reilo lutuk, mahse tunah hian ngaiah kan neih mai, kan zia hi a danglam ve a. Hmanni lawkah T.V te kan nei a, Fridge te kan neia, mobile phone te pawh kan han nei a, hmana nei tawh ang khan kan awm ve hmiah mai a, kan ziaah hian development-ah hian kan thang chak lutuk a ni.

Tichuan Pu Speaker, tunah leihlawn chhia leh kawngchhia an han sawi zawng zawng te pawh hi tun hma ngaihtuah chuan kan inang lo thei khawp mai a. Kawngpui tha tak tak, tunah chuan, Lunglei pawh nilenga kan kalna thin kha, zing taka kal phei chuan lehlan tham a ni tawh a. Chutiingin khawthlang lam pawh kan kawng a lo zau tawh a, tun hma kha chuanin kan kawng reng reng kha single lane vek a ni a, tunah chuan khang kha kan lo duhkawp ta lo a, khawvel thang chho zelah double lane te kan ti a, National Highway 54 te kan ti, 44A te kan ti, kan duh kha a sang cho zel a. Tunah hian siam mek te pawh a lo ni a, siam mek la zawh si loh avang hian thenkhatah chuan harsatna kan tawh mek te pawh a awm reng a ni. Amaherawhchu, hei hi development-in a ken tel chhoh a ni a, tunah hian kan resolution hi han pass dawn pawh ni ila, kan sorkar kal mek a ni a pass kher kha a ngai hian ka hrelo a ni. Kan kawngpui Silchar kawng, National Highway 54 kan tih te khu, tun hma nena ngaihtuah chuan tunah chuan nuam tak a ni. Mahse ka sawi tak ang khan kan duh khawp lo a, kan than chhoh zel tak avangin, tunah an siam chho mek zel a, hmana single lane kha double lane, double lane kha tunah chuan four lane te an tichho zel a. Bridge ni se tunah chuan hmana thir leihlawn kha, tunah chuan RCC bridge kan duh leh zel a, tunah hian kan sorkar hian hma a la mek a ni, kan kalpui mek lai a ni.

Engpawh ni sela, kan ram hi development-ah a insawh ngheh chhoh mek lai a ni a, developed kan la ni lo a, developing state kan la ni chauh a ni. Thang mek kan la ni a, chuang chuan heng zawng zawng hi a la puitling mek chauh a ni. Kan kum ngaihtuahin Mizoram state sorkar hi India ram state sorkar zingah a naupang ber pawl kan la ni. Mahse chuti chung chuan kan ram hruaitu hmasate hma lo lak tawhna zarah hmarchhakah phei chuan state thangchak ber te zing ami kan ni. A lehlam zawngah chuan heti zawng hian han sawi ta ila, kum 20 chhung ram buaiah kan awm a, tah leh ha thialna hmunah, dolung leh tuboh inkarah kan awm a, development a kal theilo a ni. Kum 1986 atang khan development hian hma a sawn ve chauh a ni a, chuangin kan ram dinhmun leh kan thenawm ram dinhmun en hian kan ram hi a thang chak em em.

Kum 20 chung kan than loh lai khan, kan state thenawm zawng zawngah chuan kum 20 in kan ram aiin an lo advance tawh tihna a ni. Chutichung chuan vawiinah hian kan ram hi kan hnufual bik reng reng lo, amaherawhchu duhthawhna zel leh kan than zel avangin ala tawp lo, kan kal zel tur pawh a ni. Kan hriat ve chinah pawh tun hma chuan kawng a chhe lutuk a, motor chuan man te kha a rate mai a ni lo, chuan man bakah tharum a ngai a ni. Khaw pakahtah phei chuan an sawi ka hre thin a, motor chuan man kha ` 100 bakah tharum an ti, a chhan chu kawng a chhe lutuk a, motor kha nawr a ngai a ni. Kea kal leh motora chuan kha a inzat deuhthaw a ni. Keini naupangte pawh tun hma chuan Ngopa-ah khian supply thiarin ka han kal ve a, EGS road a ni a, kawng a chhe em em, motor a leng chiah chiah a, inpelhna tur a awm lo reng reng. Chuvangin, kan inthurual a tumah kal fal bik awih loh kan inti a, kan inzui thin a ni. Chutiang chuan Jeep-in buhfai te kan han thiar ve tawh thin a ni. Mahse tunah chuan Ngopa te chu khiti lai lawk a ni ringawt tawh. Metal road in a tlan tlang vek tawh, chutiang chu Pu Speaker, kan ram dinhmun hi a ni.

Kan ram hi a thang nasa em em, kan u leh nau , kan thenrual kum 15 liam ta a boral ta te kha vawiinah hian lo tho leh ta sela, kan ram hi tun dinhmunah hian rawn hmu ta sela, an hunlai nen khan mak an ti ngawtin ka ring a ni. Chuvangchuan kan ram dinhmun hi tunah hian a tha, kan kawng a tha, mahse duhthu ala sam lo e. Tunah hian transitional period-ah kan awm a, kan inher rem ve mek a ni, kan ram kawng chhia te, kan bridge chhia zawng zawngte hi Pu Speaker, a that dawn vang a ni. A la that dawn vanga chhia mai a ni, siam a nih avanga chhia a ni, amaha khatianga hluihlawna, ngaihsak loh vang leh sorkar chet loh vanga chhe lam a ni lo. Sorkarin hma a sawnna turin theihtawp a chhuah a, khaw tin deuhthawah motor a lut tawh a, tunah chuan, chungte chu siam mek a nih avang khan kan ram hi kawng a chhe deuh a nih pawhin ala that dawn vanga chhia mai a ni.

Keini Mamit District lampang khu kan kawng khu tunah chuan a chhe khawp mai. Kan leilawn te pawh la zawh mumal ala awm lo, helaiah kan member ten an sawi ang khan, hmani lawkah Tlawng leilawn te pawh a chim, a hlui kha a chim, a thar an la zawh si loh vang a ni a. Chutiingin Bairabi lam te pawh an la zo lo, mahse siam mek a ni. Kan kawngpuite pawh an lai zaua, mahse an la zo si lo, kawng a chhe lutuk, tunlaiin Mamit District lam chu kawng chhiat ber lai a ni ang. Amaherawchu, hetih lai hian, Mamit District mipuite hi ka fak vena chu tuman kawng a chhia tiin an phunnawi reng reng lo. Engvangin maw, a that dawn avanga siamlai a ni tih an hriat vang a ni. Kan resolution pawh hi a tha hle nain kan siam mek lai leh kan kalpui mek a ni a, hetilaia House-ah hian he resolution hi pass pawh ni ila, a kal chak thutna tur pawh a awm chuang lo. Kan

ram kal mekah hian Pu Speaker, hei hi kan hmachhawn a ni a, a dang la siam ngai te pawh ala awm ang, la tihchhiat belh ngai te pawh ala awm ang, kan tihchhiat hi kan tihthat dawn vanga awm a ni ka tih kha. Chuvangchuan Pu Speaker, he resolution hi pass kher ngai lovin, a theih pheichuan kan member zahawmtak hian withdraw leh zawk nghe nghe sela, lungawi lohna tur leh resolution han putluh nachhan tur pawh awm hranpain ka hre lo. Kan hotute leh kan sorkarin chak takin, Department ten hma an lak mek lai a ni a, chuvangchuan Pu Speaker, he resolution hi pass kher ngaiin ka hre lo a, chu chu ka han sawi ve a ni e.

SPEAKER : Pu Zodintluanga.

Pu ZODINTLUANGA, MINISTER : Pu Speaker, ka lawm e. Kan member zahawmtak Dr.K.Beichhua Resolution hi, ‘Mizoram chung inkalpawhna kawngpui leh leihlawn chhe ta lutuk hi tun aia chak zawkin siam that hna thawh ni rawh se’, ti lo hian, Mizoram chung inkalpawhna kawngpui leh leihlawn ang te hi sorkarin chak taka mipui tana tha zawk tur atana hmalakna hi lawmthu i sawi ang u, tihrawn rawt ni selang chuan ka support ka ringa, tunah hian siamthat hna hi an thawk meka. Pu Speaker, MNF Legislation Party atanga an member-in, hetiang kawngpui chhia te leh leihlawn te anrawn veive ta hi a ropui ka ti khawp mai. Kawngpui tha kan rama kan neih reng reng te hi Congress sorkarin an hmalakna a ni deuh zel a ni. Kawngpui tha, tuna World Bank kawng leh Aizawl inkar kawng te hi, Congress sorkar hmasa Pu Lalthanhawla kaihruai sorkar-in ruahmanna an lo siam vek a, kum 10 an awmluh chung khan, an la zo hman lo a ni. Kum 2008 ah sokar thar a lo piang a, chumi hnuah kawngpui kha a hawn theih chauh a ni. Kum 10 chungin World Bank sum externally aided project sum tam tak mipuiin hma an sawn theihna tura ruahmanna an siam pawh kha kum 10 chung khan an peih hman lo a ni Pu Speaker. Chutiang ang tena kawng pui tha kan neih theihna tur te, Leihlawn kan neih theihna tur atana resolution anrawn move ve thei hi hma an sawn ve ka ti hle a, an chungah hian lawmthu ka sawi duh a ni.

Saiha bialtu member zahawmtak hian a la hriat reng ka ringa, sawng Leihlawn an dawh hma te sawn keini te pawh political thilah kan kal thin a. Tui a len chuan Saiha ni hnih/thum te kan cham thin a, amaherawhchu sawng te saw tu sorkar laia siam nge ni le, wawiinah Congress sorkar, Lal Thanhawla kaihruai ina an sorkar laia an siam te kha a ni tlat. Hmani lawkah pawh Tuipui ‘B’ Leihlawn siamna tur chu hman atangin Aizawl atanga Saiha kalna turte pawh kan resolution neitupa hawn kawng te pawh Kawlchaw atangin an leh luh a ngai a, sawng Leihlawn te saw awm se chuan Aizawl hi

hnai takin an lo thleng thei a ni. Chutiang ang chuan Congress party chiahin manifesto an nei ngam, kan sorkar chuan he Leihlawn hi kan rawn siam ang ti party a ni tlat. Pu Speaker, Leihlawn kawng te veitu tak tak chu Congress sorkar hi a ni tlat. Chutiang chu mipuiin rinna an nghat a, chu rinna nghatah chuan a tak ram bawhzuiin Department-te nen DPR te siamin sanction hmu turin central sorkar-ah te an kal a, tunah sanction hmuin tunah hna an thawk a ni. Chutiang ang chuan hma nasa takin kan sorkar hian a la a ni.

Khawthlang lamah tunah a insial thla hun hun a, tun hnai maiah pawh khan World Bank atangin Aizawl Club agreement an rawn sign a, Mizoramin kawngpui tha te, Leihlawn tha te kan neih theihna tur atan hian Congress sorkar hi a pian a ngai tlat a ni. Tun sorkar reilote chhungah pawh hian Chhungkhum atanga Chawngte kawng thawh theih turin tender te chhuah a ni leh tawh mawle, chutiangin Champhai atanga Zokhawthar panna tur te kan member-te pawn an ngaih pawimawh em em border trade kawngpui tha a awm loh chuan a hlawhtling tak tak thei lo ti a an sawi thin kha world bank atangin sum tam tak hai chhuakin wawiiinah an tifel a ni. Chumai a ni lo, kan bial ang chhengchhe tak te pawh Rawpuichhip atangin Buarpuiah a rawn lut anga, Buarpui atangin Thenhlumah, Thenhlum atanga Phairuankai lo lutin Lunglei, Tlabung National Highway rawn fin turin ruahmannate an rawn siam a ni. Heng angte hi lawmthu sawina zawk tur, kan sorkar chak takin he kawng siamna tur atana an hmalakna te, a tak tak thawktu chu Congress sorkar hi a ni.

Kan member zahawm takin a rawn sawi Aizawl atanga Lengpui kawng Congress-in a siam laia khulai kawng kal duh lova mipuite fuihpawrha a kawng siamtu an hal lai te kha wawiiinah ka mitthlaah ka hmu tlat mai a paw ka ti. Pu Speaker, hnathawktu kawngpui tha an neih theihna tura midum camp te an hal a nih kha. Khatih laia an Party President chuan kan sorkar vaih chuan he kawng hi kan titawp ang a, kawng pangngaiyah kan kal ang a tih te kha an election au hla a ni ti raw. Amaherawchu, Congress sorkar hnuaiah chuan mipuiten hma an sawn theihna tur atana ruahmanna an siam chu chak takin a kal a, nichina kan sawi tawh ang khan Lengpui pawh hun reilote chhungin kan thleng zung zung thei ta a ni.

Ka Bial saw ka'n sawi lut ve ang a Mizoram kawngah chuan tun dinhmunah chuan kawng chhe ber a nih ka ring. Engvang nge le, Congress sorkar hmasa khati lai khan Pu P.Lalbiaka Minister a ni a, chutih hun lai chuan Phairuang atangin Thenhlumah,

Bunghmunah PWD in kawng an sial a, an black top a, Bunghmun atangin Changpuiah te an black top a ni. Kum 1998-ah Congress sorkar a tla a, kum 10 chhung kha enkawl lovin kan kawng khu a awm a, chumi chhung chuan kal ngaihna pawh awm lovin nikum pheichuan opposition party te pheichuan an pute vanga chhia tih hre lovin kawngpui chhe laiah Buh te an ching a, sanghate an chhuah a ni. Kha kum 10 chhung khan a repair te kha lo ti ve se chuan khutiang khu a ni lo tur a ni a. Amaherawhchu, kum 2008-ah congress sorkar a lo pianga, nikum mai pawh khan Phairuang atanga Zawlpui thlen theihna tur atan sum tam tak an dah a, mahse duhtu a la sam lo hle. Tun kumah pawh dah leh a ni a, Thenhlum atanga Bunghmun panna tur te pawh thui tak black top leh tawh a ni. Chutiang ang zel chuan kan ram hian kawng tha kan neih theihna tur chuan Congress sorkar atang chauh hian a theih a ni Pu Speaker. Kan member zahawm takin he Mizoram inkalpawhna leh Leihlawn chhe ta lutuk siamthat ni rawh se a tih hi in withdraw a, hetiang ang hi chu kan sorkar hian an ti tha tawh a, nichina a rawn sawi Kolasib leh Kawnpui kawng siam chungchangah pawh House chhungah ngei kan House Leader-in siamthat a ni dawn a, ruahmanna a awm tawh a ni a tih te kha lawmthu sawina tur zawk a ni lawm ni tiin he Resolution hi k a thlawp lo a ni tih ka rawn sawi ve duh a ni e.

*Speech not corrected

Pu K. LALRINTHANGA : Pu Speaker, ka lawm e. Dr.K.Beichhua resolution rawn move Mizoram chhunga inkalpawhna kawngpui leh Leihlawn chhe ta lutuk hi, tun aia chak zawkin siam that hna thawh ni rawh se tih hi han sawi ve ka duh a.

Chhe ta lutuk a tih hi, tunhma ai chuan a tha zawk a ni lawm ni ti ang zawnga rawn sawi ka duh a ni. A hmasa berah chuan 2008 inthlan kuma Congress party-in sorkarna kan han chan ve khan Serlui bial te, Tuirial bial te khu ka kal chipchiar hle a. Serkhan to Bagha kal kawng chungchangah zirlai pawl ten min hmu a, 'kan kal kawng siamthatna tur nuai 600 vel a bova hemi zawn chhuah hna hi min pui rawh,' tiin MLA min rawn ngen a ni. Pawisa chu hemi kawng siamthatna tur hian PWD-in an hmu ngei mai a. Nimahse, hna tlem te, tawi te an thawh a, Serkhan atanga Lungmuat thleng vel, a bak kha siam awm ta lovin, a thawhna tur pawisa khawiah nge a awm tak tih kha zirlai pawl ten an zawng a, a awmna kha kan hre zo lova, tichuan, zirlaipawl te khan harsatna eng eng emaw pawh an han siam ve a. Chutiang karah chuan PWD a kan Engineer te pawh suspend an nih kha. Chu chu sorkar hmasa-a thil awm dan, kalkawng siamna tur, hman leh si loha a bo thlau dan kha a ni a.

Amaherawhchu, hun a lo kal zel a, PWD bawkin Serkhan to Bagha kalkawng (Saiphai tlangdung saw) kaltlangin siamthat hna thawk turin survey an han nei a. Chumi survey an neih lai chuan a hminga bialtute ka nih ve angin, kan term chhungin an zawh hman loh kan hlauh avangin Department te pawh theihtawpin kan han nawr ve a. Chutiang chuan PWD pawhin an theihtawpin an thawk a. Tichuan, tender te an han call a, hna an han thawk a, kawng tunah an lai mek a. Hmun thenkhat Saipum leh Bagha inkarte chu tunah an metal zo tawh a. Amaherawhchu, chutih rual chuan, PWD in harsatna an tawh chu hmanni-a kan puin a sawi ang khan, ram neitu compensation beisei an tam tak luattuk avang khan Mizoram sorkarin hna a thawk chhunzawm hleihthei ta lova. Chutiang chuan PWD in kawng a siamthat tur kha thawh chhunzawm hleihtheih lovin a lo awm ta a. Hengte hi sorkar leh PWD in hna an thawh that loh vang a ni lova, anni chuan theihtawpin hna thawh that an tum a. Sorkarin a phak bakin compensation pek a ngaih tak avangin harsatna kan tawh ta kha a ni a. Hetiangah hian kan inmahpuih tur pawh a ni lova.

Tunhma, kalkawng an inlaihpawh hma chuan kalkawng thla kha video camera-in ka la a. Kalkawng tawn tawnah hian luang hi a insi khup mai a, chu chu kan su pawp a, chutiang chuan a awm a ni. A film pawh ka la kawh reng a ni. Chutiang dinhmun-a kan awm chu tunah chuan thenkhat chu an lai zo tawh a, an metal tawh a, a then chu an la lai zo chiang lova. Thenkhat chu laih theih lohin a awm a. Chutiang thil te chu kan nawr chuk chuk dawn em ni tih hi ka ngaihdan a ni.

Tin, thil pakhat dang ka sawi leh duh chu, tun dinhmun-a Mizoram kawng that loh chhan hi kan ngaihtuah chian a thain ka hria. 1998 – 2008 thlenga Chief Minister khan Mizorama National Highway zawng zawng kha Mizoram PWD kutah hlan turin central sorkarah a zuk ngen a. Chutichuan, Mizoram PWD hnenah hlan tura an rawn ruahman khan keini party kan lo sorkar ve tawh a. Hotute theihtawpin an tang a, ‘kan enkawl seng loving,’ an ti a. Nimahsela, Chief Minister hmasa ten an lo ngen a, Mizorama hlan turin an lo ruahman vek tawh si a, tan hleihtheih a ni lova. Chutichuan, National Highway tam zawk Mizoram PWD kutah a lo awm ta a. PWD ten staff te an neih tam phah bawh si lova, pawisa an neih tam phah bawh si lova, a hna an ngah a, a thawktu an tlem a ni. Chuvang chuan, he kawng tam pui mai, hetiang a nih takah hian an enkawl zo seng lo. Tha takin an enkawl seng lo a ni tih hi kan hriat a tha-in ka hria. Chuvang chuan, nawr chilh a, tun aia tha-a thawk thei tura kan han ngai ringawt hi chu kan ngai sual deuh niin ka hria a. Chuvang chuan, kan kalkawngte hi tuna kan duhthusam ang hian a tha lo a ni tih kha kan hriatte pawh hi a tha ve-in ka hria.

Tin, ka han sawi duh chu tun term kal ta-ah khan PAC-ah kan awm ve a. PAC-a kan hotute kaihhruainain PWD hnathawhte kawng tam takin kan en a ni. Chuta kan dawn tam ber chu kalkawngte siamthat a nih loh chhan thenkhat te hi kan ram leilung tenderer-ten an hriatchian loh vang a niin ka hria. Mizoram-ah chuan thil tih a harsa em em a, tlang ram a ni a, kan kalkawngte a chhia a, kalkawng thar lai tura hmanrua han lakte pawh a harsa a. Kolkata atang te leh hmun hrang hrang atang te, state hrang hrang atangtein kan kawng siam turin tender te an rawn chhang ve a, hniam te tein an chhang a. A chhangtuten an state a an ram dinhmun ngaihtuahin Kolkata atanga 100 km chu awlsam taka bungrua lak theihna a ni a. Chutiang bawk chuan, kan capital chu Aizawl a ni a. Chutiang deuh chuan, Mizoram-a tender an rawn chhan hian a percentage hniam deuhin an rawn chhang a. Chutia hna an han tan a, an han thawh leh tak si-ah chuan thil harsatzia an rawn hmu a. Thenkhat chu in withdraw leh hial te pawh a lo ngai ta a. Pawisa an dil chhuahna a lo rei tawh si a. Chutiangte chu a nih avang chuan kan kalkawng siamtute hian an tum ang hian an siamtha thei chiah lo a ni. PWD in Departmental work in an han la a. Pawisa hlutna te a lo tlahniam a, khatiang khan hnathawh tha a awm tak tak hleithei lova. Chutiangte a nih avang chuan, kan kalkawngte hi a tha lova, han nawrchilh tehchiam pawh kha a tul lo niin ka hria.

Tunhma chuan Mamit te khu kan kal changin nikhat kan thang a, Silchar kan kalin nikhat kan thang a, Lunglei kan kalin nikhat kan thang a. Tunah chuan, kalkawng a that tawh avangin Mamit-ah te, Kolasib-ah te chuan office kalte hi an lehlang tawh a ni. Heta a ziahah hian ‘a chhe ta lutuk a’ tih a ni a, a tha ta lutuk zawk a ni lawm ni? Chhe ta lutuk ni lovin, tunhma ai chuan a tha a ni lawm ni? Chutiang a nih avang chuan tun ai hian tlemin han tang leh deuh sela, kan tha leh deuh zawk ang tih te chu ni sela, a puibawmte pawh a awlsam deuhhleik zawk ang a. Tunhma ai chuan kan kalkawngte hi a tha a ni.

Thil pakhat lang chiang reng mai chu 2008 kum khan Bagha leh Kolasib inkar-te, Kolasib leh Kawnpui inkarte khu metal work hna an thawk a. Bilkhawthlir leh Kolasib inkar-te khu mipuiin hnathawktute an nawr ve miah lova, anmahni tih ang angin tha takin an siam a. Tun thlengin kan la tlan zur zur a. Khulai kalkawng khu Mizoram kalkawngah chuan kalkawng tha ber a nih ka ring a. Amaherawhchu, Kolasib leh Kawnpui inkar khu Kawnpui atanga Bualpui inkar thleng khuan NGO ten an nawr lovin an lo siam hman a. Nimahsela, NGO ten an siam zo hman dawn lova an hriat avangin an nawrchilh a, nasa takin siam zo thuai thuai turin an nawr a. Bualpui atanga Kolasib inkar thleng khu nasa takin tunah khuan a chhia a ni. An tha phak tawh baka an nawr avangin ruahsur hnuaiyah pawh an siam zel a, pawr phengphungin an siam a, chhe takin an chhuah a, kal pawh kal hleihtheih lohin a awm a ni. Chutiangte a nih avang chuan heng kalkawng

siamtute hi chuti tehchiamaw naurchilh chi an ni lem lo a ni tih kha ka han tarlang duh a. Chuvangchuan, kan Resolution neitu hian pass kher hi beisei lo ta zawk sela a tha-in ka ring a. Hetia an hnathawh pangngai hian theihtawpa an thawh ang hian tha takin thawk chho zel se tha-in ka hria a, ka han tarlang ve duh a ni e. Ka lawm e.

SPEAKER : Sawi turin Pu Sawta i lo ko ang.

Pu LALSAWTA, MINISTER : Pu Speaker, member zahawm tak Pu Beichhua resolution, “Mizoram chhunga inkalpawhna kawngpui leh leilawn (Bridge) chhe ta lutuk hi tun aia chak zawkin siamthat hna thawh ni rawh se” tih hi a rawn pulut a, pass pui te pawh a rawn dil a. Hetah hian sawi tur tlem ka nei a. Pakhatnaah chuan i dinglawa awm Congress ho hi thusawi hi kan thiam lo khawp a. Kan zingah hian thusawi thiam tak hi engtik lai mah hian an awm ve ngai lova. Thil a ni reng pawh a nih anga sawi chhuak thiamlo, mi min puhna te pawh hi kan tuar mai mai tlang ni te hian ka hre thin a. Party thenkhat hi chu nilo deuh pawh hi ni ang taka sawi thei a ni pawh nilo chiah maia chhuah thei te hi an tam a. Chuvangchuan, a inhnial zawng ang hi chuan party dang hi kan zuamlo khawp mai a. Kan thiltih that pawh hi a nih ang pawh hian kan sawi chhuak zo lo deuh zel a. Chung vangte pawh chu a ni mai thei a, tuna kawng tha hen hun kan neih te pawh ‘chhe ta lutuk’ an han ti a. Chhe ta lutuk anga ngai tur tam tak hruai luh theih an inbeisei te pawh a ni ve thei turah ngai ta ila. Chuvangin, thiamlo takin rilrua awm angte chu kan sawi lo thei lova.

Resolution dawt lehah hian sawi chakawm tak, kan ram tan pawh nghawng tha nei tur sawi chakawm em em mai kan nei a. Hei hi sawi ngei ka duh a, chuvangin, kan resolution neitu Dr K. Beichhua hian ‘sawi chin tawhah pawh khan a tawk e, tih loh loh ka lo ti a ni, a infuih zawng hian in ti teh ang, ka resolution hi ka withdraw mai ang e,’ han ti hlahh sela chuan a dawt leh han sawi hi a chakawmin ka hria a. Amaherawhchu, kan member dangte pawh hian an sawi chak ve tho te pawh a ni ang a. Engpawhnise, ka thu a ni lova.

Pu Speaker, kawng chungchang hi han sawi thui deuh hlek pawh thain ka hria a. Nichinah khan kan member zahawm tak Revenue Minister khan hmanlai atangin a rawn chhui chho va. Khatiang zawng pawh khan ka lo ngaihtuah pha lo va, mahse a lo dik khawp mai a. Mizoramah hian Sap an lo kal hma khan, Vai an lo len hmate khan kan

kawng hi chu ke-a kalna kawng, ‘kawngtum’ tih kha kan neih chhun a ni mai a. Anni kha Sakawr hmangete khan an han zin vel a, mahse kawngpui tha tak tak, motor han tlan theihna ang zawngte kha kan nei hran lova. Chu chu 1890, 2000, 2010, 2011 tih vel chauh kha a la ni a, a la reilo khawp mai a.

Mi kawng tha kan tih Europe-ah a ni emaw, America-ah a ni emaw ang chi emaw hi chu an lo rei tawh khawp mai a. Motor kan han tih ang chi Vehicles an tih an hmuhchhuah hma pawh khan Sakawr-tawlailir tal hian an lo zin thin a lo ni a. An lo bei nasa a, an lo bei rei tawh khawp mai a. Lal Isua pian hma fe pawh khan Sakawr-tawlailir hi chu an lo hman thin niawm tak a ni. Ben Hur thawntu te kan hria a kan han chhiar chuan Sakawr Tawlailir intlansiak hmuhdawm tak te pawh kha hmun sang takah an lo nei thei tawh a.

Anni pawh engemaw chenah chuan America ram angah te phei chuan motor te pawh hi a chhuah tih chuan hnawk an ti ve tho va. A kawngte an laih sak thin nain historian-ten an han sawi thin, lehkhawbua te pawh an ziah thin chu a mihring zawk khan mihring hi hnawk an ti tlat mai a. Motor chu a kal dawn chuan a hmaah flag sen vaiin a tlan tur a ni tih kha an ram dan statute-ah khuan a awm a ni. Chu chu 1900 tih velah te pawh a ni awm e. 1860 chhoh vel khan America rama Abraham Lincon hun lai khan scientist ropui tak pakhat khan motor siam chhuah tur te a lo hre chhuak bik lo a ni chek ang. Tun atanga kum 20, 30, 40-ah hi chuan sakawr ek hi kan kawngah hian a tam lutuk ang a, kal hleih theih loh khawpin sakawr ek hian min la tibuai dawn a ni, tih kha fing takin a lo sawi a. Mahse, motor te a lo awm tawh kha chuan khang kha chu kan pumpelch cho chu a ni ta zel a. Tunah hian saphovin thingtlang kawng sakawr nen an kal hram hram thinna kha tam tak hi chu motor-in a tlawh pawp tawh a. New Lungrang te pawhin motor kawngah hian in sawn teh ang tih lam aiin, kan khuaah hian motor kawng a lut tur a ni tih zawka kha an buaipui em em a nih kha, kawng a pawimawh zia chu.

Chutiang khawpa kum 2000 velah te pawh motor kawngte leh kawng tha kan tih ang chi, Sakawr-tawlailir kawng tha an lo neih tawh lai chuan keini chuan 1900 hnuah kawng kan han nei chho tan a ni a. Ka pa an transfer avangin keini pawh Lungleiah kum 1954 khan kan phei a, chumi lai chuan Leite thleng chauh sawn motor kawng a kal a ni. Chuta tang chuan kein kan kal a, engkim kha mihringin phurh vek a la ngai a ni. A la reilo hle mai 1954 chu. Kawng tha tak nei tur chuan nichina kan ngaihthlak tawh ang khan

zawi zawia tihthat ve tial tial hi a ni hrim hrim mai a. Aizawl-ah ngei pawh kan hmuh hi, kan Temple vel ami saw tun hma chuan kawng ulh chho te reuh te kha a ni thin a. Engtin nge an siam ka hre lova, a thiamten an han siam chuan kawng zau deuh zal nuam deuh, a lo ni ta mai a. Helai Governor Gate North lam kawngpui te pawh hi an han tizau va, an han tizal a, kawng nuam deuh a lo ni mai a. Kha kha kum 20/30 chhung lek a ni.

Durtlang kawng te pawh khi tun hmain kal laiin lungin min delh ang tih hlauhawm khawp kha a ni thin a. Vawiinah chuan khiti khian kawng nuam tak khi a lo ni ta duai mai a ni. Mission Vengthlang ngeiah pawh sawn hmanni lawk khan kan han tidanglam a, hotute thahnemngaihna zarah zawi zawi hian a lo tha tial tial a, zawi zawi hian a lo nuam tial tial mai hi a lo ni a.

Tin, a thawktu lam tan hian kan resolution hi a ngai ngai hian kalpui ta ila a na duh awm mang e ka ti a. Kan nupuite hi “thingpui han siam teh,” kan tih lai hian, “I thingpui siam lah hi paw relh rulh, thlum chiang mang si lo, i siam fo mai si a, tun tum chu tui deuhin han siam teh,” ti fo ila chutiang chuan siam tir ta ila, a siamtu tan pawh hian a chakawm tehchiam awm lo mang e. Chu ai chuan a resolution hi, ‘Mizoramah hian kawng tha tak kan nei a, kan nei zel dawn te pawhin kan ring a, a thawktute hian phur taka an siam that leh zual theih nan leh kum 2000/3000 ami kawng tha te angin tan han khawh teh se’ tih te chu ni sela chuan vawiinah hian i dinglana thute hian kan pass-pui ngei ngei ka ring a, tih tur awm tak pawh a ni a. Tuna mi hi chu a nih ang ang hian han ti dawn ila a thawktute rilru tih nual thei zawng kha a rawn zawng ngar ngar emaw tih mai palh a awlin ka hria a. Hetiang hi chu mihring inkhalh dan hi chu a ni lo deuhvin ka hria a ni. Chuvang tak chuan a dawt ami kan sawi vat theihna turin tuna resolution neitu hian, ‘in sawi hi a taw k e, ka hrechiang ta, heti zawk tur hi a lo ni, ka withdraw mai ang,’ han ti sela chuan kan thaw huai vekin ka ring a.

Tin, sorkar mek sawichhiat leh han tihpawrh deuh hi chu a nuam ve reng reng a. Ram pumin min lo ngaihthlak lai pheih chuan nuam ve tak a nia. Enge a chhan kan tih chuan an duh tak kha kan neih mek lai kha a ni ve a ni. Sorkar laia kan duh tak mai a ni a, nei ve lo tan chuan ngaih zawng intawm ang hi a nih ve na deuh lai a awm a. Chuvang chuan a tha reng pawh han sawichhiat tum ve ngar ngar pawh hi a awm ve thei tho a. Thingtlang khaw thenkhatah khuang vuak te pawh hi a lo hlu ve viau a, lo inchuh theih a, engemaw tia khuang chang lo in a vuak ve chak siin a bula mi hnenah, ‘khu a

nawn loh hunah a nawn leh tuk tuk khu' tih ang deuh te pawh hi Opposition role-ah hian a awm ve thei a ni. A tha reng pawh tha loa han sawi ve chakna hi a awm lo thei lova, khami lo awih tawk kha a lo awm ve theih mai bakah nichina a tira ka sawi ang khan tute emaw hi chu thil sawi hi an thiam khawp a, EVM-ah pawh hian patling pui, officer pension tawh te pawh lo awih tawk an awm ve tho mai a. Chuvang chuan, vawiina kan sawiah hian an rilru tak takah chuan tha an ti, an kalna leh an kawng zawhna te, an bial an fanna kawngte pawh hi a tha an ti. Zan riak mang lova langa an kal thei te pawh hi tha an ti. Chuvang chuan an rilru lo deuh hlek a helai Resolution han in pass tir tum hi member-te pawhin kan tuipui lo deuh a niang a! Han in withdraw sela, tichuan a dawt leh hi sawi thuai thuai tawh ila tih kha Pu Speaker, ka sawi duh a ni.

Pu VANLALZAWMA : Pu Speaker, ka'n chuh ve leh zawk mai ang a. Dr. K. Beichhua Resolution "Mizoram chhunga inkalpawhna kawngpui leh leihlawn (Bridge) chhe ta lutuk hi tun aia chak zawkin siamthat hna thawh ni rawh se" tih kha Pu Speaker, i dinglama mite khan an la ulh deuh emaw ni chu aw ka ti a. Khati zawnga lak tura a tih ni pawhin ka hre lova. A thehluh dawn pawh hian ka'n enpui thuak a, 'ruling lam te tan pawh a helhawm zawnga tih nilo sela, kan zavaia tan tlanna tur leh he ram mamawh a nih avangin nem deuh khan i ti dawn nia,' kan inti a. A nem viau a ka hriat kha kan han sawi kan han sawi a, kan Minister thenkhatte pawh an bial kawng a chhiat thu sermon pah si khan tul lo riau te khan an rawn sawi a. A Resolution siamtupa rilru leh kan sawi dan kha a inmil ta chiah lo mang e aw tih te kha ka ngaihtuahnaah chuan a lo awm a. Kan tan tlanna tur leh kan zavaia kan hmalakna tur leh he House-in kan tih a, a nihna takah chuan kan hre vek a, kan kawngpui leh thil dang kan siamna zawng zawng hi keimahni sum a ni tak tak lova Central lama zuk dil tur te a ni hlawm a. Chuvang chuan hetia House Resolution a kan pass tlan hi chuan khulam zuk nawrna atan a remchang e tihna atanga lo zi chho niin ka hria a. Mahse Pu Speaker, i dinglama mite rawn react dan kha chu a Resolution move-tu rilru a ni chiah lo deuha ka hriatpui avangin kha kha ka'n sawi hmasa duh a.

Tichuan kar hmasa lamah kan member zahawm tak Pu Lalruatkima Resolution te pawh tiang khan kan han pass chho a, la kalpui zel tur pawh a nih ka ring a. Tiang deuh hlek khan kan lo ngai deuh a. Kan kawngpui that loh zia te nichina kan sawi tawh ang khan kan Transport Minister zahawm tak leh kan Sport Minister zahawm tak pawhin an bial kawng chhiat zia thu an sawi kha kan hre vek a, anmahni pawhin an

pha lova. Khatiang a nih mek lai khan hmalak lehzel te pawh a tul a. House hian lungruual takin hei hi pass ıla hma kan la chak anga tih ngaihtuahna atanga lo kal a nih avang khan pass ngei tur chi a ka lo ngaih kha kan la helh deuh hret emaw ni aw ka ti deuh a.

Engpawhnisela, kawng hi a pawimawh zia kan hre tawh a, a bik takin Mizote hi kawngpui pawimawh zia hre tak hnam tunah chuan kan ni tain ka hria a, a lawmawm em em mai a. Thingtlang kilkhawr fe fea awmte pawh an huatthu suhah, an khua hi motor kawngpuiin tlawh se ti a thahnemngai em ema hotute rawn dawr hi an ni vek a ni.

Tumkhat a rei tawh deuh hlek a, Baktawng kan kal tumin an lo sawi chu ‘kan VC hmasate an mawl lutuk deuh a, BRTF in kan khaw paltlang a kawng an rawn zawn khan Buhkangkawn a chhukthla khuan a grade hi a tha em em tho a ni an ti a, mahse VC te khan khatih lai khan kawngpuiin min paltlang chuan ar pul leh ilo fahranah kan him lovang tiin chhuah lamah khan an zawn tir a, tikhan keini hi kan buai kan buai ta a, churang chuan Baktawng leh Buhkangkawn kawngpui laihpawhna tur fund min ngaihtuah sak rawh,’ an ti a. An sawi an sawi a, an VC hmasate kha an rel nasa lutuk dawnin ka hria a, ‘Ngawi rawh u, VC hmasate kha i dem vak lovang u, an ngaihtuahna kha a hunlai chuan a awm ve tho a nia. Engpawh ni se, tam tak kan inpe thei lo a nih pawhin Buhkangkawn chhuahtlakna tur hi chu pawisa kan inpe dawn nia,’ kan in ti a, kan inpe a. Chumi ka’n sawi duhna chhan chu, khatihlai kha chuan kan khua kawngpuiin a paltlang tul lo tih ngaihtuah dan te kha a awm a ni, dem ngawt theih a nilo an VC te pawh kha, an ngaihtuah dan a dik tho dan kha a awm a ni. Amaherawhchu, tunah chuan Mizote hi zia leh chhiar lama kan san vang te a ni ang chu kawngpui tha a that zia te hi kan hre ta em em a, a lawmawm hle a ni. A hre ber, keini ang hnamah chuan kan ni hial awmin ka hria a.

Nichina kan sawi tawh ang khan Mamit pawh khu ka kal hmasak ber tuma pa pakhatin a lo sawi chu, ‘nakinah fur a lo ni leh ang a, kan khaw motor kal thin jeep-ah te chuan nula hmeltha tak ai chuan pa sek tak hian chuanna chu kan hmu thei leh zawk dawn,’ a ti. A chhan chu nam a ngaih huna nam tur kha passenger atan khan an lo duh zawk vek mai a, nula hmeltha tak phurh ai chuan. Chung hunte chu ala rei lo em em a, tiang chuan kawngpui tha duhna hi kan lo nei chho zel a, a lawmawm takzet zet.

Chung avang chuan he Resolution pawh hi thahnemngaihna atanga lokal a ni tih zawng khan ngai ila, pass mai theih a nih te ka'n ring a.

Chutihlai chuan kar hmasa lawk khan Chhimtuipui District ti mai ila, Lawngtlai District-ah Estimate Committee kan va zin a, Kaladan Multimodal Project tlawhin kan va kal a, kan va tlawhchhuak vek a, a tawp thlengin ramri kan va kai a. A tuk zinga an DC te leh Council hotute nen kan inkawm honaa ka sawi chu, 'tun tum kan lo zin chu ka lawm hle mai, he kawngpui hi Aizawl atanga kan thlir khan tlang zo lo dawn hian ngaihtuahnaah hian a awm a, thim riau hian ka hria a. Mahse tunah chuan ka lawmna em em chu, a tlang dawn hian ka hria a, a hun chu thu dang ni se, he kawngpui hi a tlang dawn a ni tih hi ka sawi ngam a ni, chu chuan min tilawm a ni,' ka ti a. Chu chu ka'n sawina chhan chu sawng kawngpui te saw a tha dawn lutuk a, he ram tan hian a pawimawh lutuk dawn a ni. Tunah sawn a sorkar ang pawha pressure kan pek pui deuh a nawr deuh chuan a tlang hma lehzuall ang a. Amaherawhchu, hmannia an lo sawi chu ka zawt ka zawt a kan PWD lam te pawh kha, 'DC ang te pawh hian an rawn tlawh tawh em in kawngpui te hi?' ka ti a, 'tlawh lo' an ti a. 'A nih, a Council angin official deuhin an rawn tlawh tawh em?' ka ti a, 'tlawh lo' an ti a. Chungte chu ka'n sawi duh chhan chu thahnemngaihna atang hian official a va tlawha va sawi phurpui te saw an ngai mang e, kan contractor-te leh kan PWD te pawh saw. Tin, sorkar ang pawh hian va tlawh hi a va tha em, Estimate Committee angin kan va tlawh a, chungte pawh chu an lawm thiam em em a, sawlaia a contractor-te leh PWD hna lo enkawltute kha. Sawngte saw phur lehzualla han nawr puia tlang mai thei, mahse an tih tiha an tih chuan nakin deuh a la nih theih hmel a. Chuvang chuan ngaihtuahna hman a ngaiin ka hria a.

Chung zawng zawng chu kawngpui tha duhna atanga lokal vek a ni. Leilawn te pawh kan hria a. Hei, tunah ka hriatsual loh chuan S. Vanlaiphai leh Sangau lamah khian tlawmngai pawlte hmalaknain office te dan niin ka hria a. Chu pawh chu leilawn tha duhna vang a ni a, a lawmawm zawnga ngaihtuah theih niin ka hria a. A tul zia an hria a, sorkar kut tihchak nan an ti ve niin ka hria a. Chuvang chuan, wawiina kan Resolution pawh hi khati zawng khan ngaihtuah a ni dawn lawm ni aw ka'n ti a.

Tin, hei ka'n sawi leh lawk duh chu ka pianna khaw chungchang, Chhipphir khuaa piang ka ni a, Thenzawl atang sawn Zoteah Km 20 vel leka thlen theih a ni. Mahse kumin chhung zawng hian kawng a that tawk loh avangin Haulawng lama kual a ngai a ni. Km 20 leh tlema thlen

theih kha hmanni lawk pawhin kan chungte an lo kal a, Haulawng lamah kan la kual, km 50 aain a thui ang, a letin a thui ang, chutiangte chu a la ni a. Sawngte pawh saw PMGY a formation cutting te pawh tih tawh niin ka hria a. Han tihthat hlek a Thenzawl leh Chhipphir inkar darkar khat emaw leka thlen theih tur kha kual vak te saw a la ngai a. Tiang te te kha han sawi khan he Resolution hi a negative a thlir lova kan tan hona tur a ni ti zawnga thlir ni se a pass theih mai lawm ni tiin Pu Speaker, ka'n rawn pui a ni. Ka lawm e.

SPEAKER : Aw, Pu K. Sangthuama.

Pu K. SANGTHUAMA : Pu Speaker, ka lawm e. Hei, kan tam lo khawp mai a, kan Resolution hi a pawimawh khawpin ka hria a. Tuna ka hmaa mi rawn sawi ang khan vawiina kan Resolution hi sorkar tan pawh a tha lo zawnga ngaih turah pawh ka ngai hauh lova, kan thahnemngaih tlan vang zawkah ngai ta ila.

Kan kawng hi a tha han ti dawn ila nichina an rawn sawi ang khan a tha a, a that em avang hian a lawmawm a, a aia tha zawkin kalpui ni se tih lampanga tih kha chu ti dawn mah ila a awih lo hlir kan nih ka ring a. Vawiinah hian a chhiat thu sawi sawi lam aain engtin nge kan tihthat ang, vawiina kan kawng tha lem lo tak hi engtin nge kan tihthat ang tih zawka kha kan point tur lam ni zawk turah ka ngai a. Ka hmaa miten thil thui tak an sawi a, ram changkang zawk kawng te chu kan pha hauh lova, chung chu sawi sawi mah ila kan damchhungin kan pha chuvingin ka ring lova. Amaherawhchu, kan neih ve chhun chhun, tuna kan enkawl ang chhun chhunah hian tun ang lo deuh hian kal nuam deuh zawkin, tha deuh zawkin hma la ila tihnaah ngai ila a that ka'n ring a.

Kan kawng hi a tha tehchiam lova, kan hre theuh a. Chuvangin, hei hi engtin nge sorkar hian tan a la lehzual thei deuh em, tun ai hian tan han la deuh selangin a tha ang e tihna lamah ngai ta ila a that ka'n ring a. Kan hmu theuh a, kan zin theuh a kan kawng kalphung chu kan hria a, kawng tha tak a vang viau a. Chu chu sawi nawn ngai lovin kan hre turah ngai ta ila.

Nichin khan kan kawng chhiat chhan an rawn sawi 1998 a kan Chief Minister zahawm tak khan Central sorkarah national highway te hi PWD in la se tih kha a zu dil a ni hauh lova. Cetral sorkar hian duhthu angin BRTF te hian national highway te, kawng reng reng hi an thawk tha thei lova chuvangin State ho hian national highway hi PWD in lak deuh vek theih ni sela tih ngaihdan an siam atanga lo kal a ni a. Arunachal lam tih loh hi chu hei hi PWD in lak vek tum rawh u an tih atanga lo kal zawk a ni, a hranpaa dil a awm lo a ni tih kha kan House zahawm takah

pawh hian hriat ni se a that ka'n ring a. Hei hi zu dil a zu chhuh luih a ni lo, min rawn hnawn avang zawka lak a ni. Arunachal lam khi chu ramri pawimawh tak a nih avangin BRTF te hian la la sela, a dang zawng hi chu State highway zawng zawngte pawh hi, national highway pawh hi state sorkarin la thei sela tih rawtna Central sorkarin a siam avanga hei hi lo kal a ni a. Chu chu hrechiang ila a that ka'n ring a.

Lawmthu sawina tur tam tak phe chu a awm tho e kan sorkarah hian, theihtawp an chhuah a kan hria a. Amaherawhchu, thil hi a tak tak ram zel hi a pawimawh a, sawi ram hi a ni lova. Sawi ringawt hi chuan a sawi zung zung theih a. Mi tam takin an sawi thin a, kum 20 chhung rambuai kan ni a, kum 20 chhung kan buai avang khan kan ram hian nasa takin hmasawna min dal a ni an ti a. Kei chu kan ram buai avang khan hmasawna hi a kalah ka ngai ve tlat a. Vawiinah hian a dik taka kan ngaihtuah duh chuan buai hma kan hria a, buai hnu kan hria a, hmanlai deuh pawh hre ve pha kan ni a. Chuvangin, rambuai kha kan chhawr hlein ka hria a, rambuai ni lo se Aizawlah hian kan awm pawh ka ring lo. Thingtlangah Headmaster-ah te ka la tang a ka pension ve mai maiin ka ring tlat a ni. Kan Speaker zahawm tak te nen hian 1961 ah khan Champhai High School-ah te kan kal tlang a ni a, Aizawla luh hi chu har tak a ni. Aizawl kan luh thlak ve hian buai kum khan mi 2500 vel chauh kan la awm a ni, tunah hian nuai 3 dawn lai kan awm ta a. Chutiang chu a ni a, vawiina hetilaia thu pawh hi ram buai ta lo ila ka rin dan tak chuan MLA ni lo tur pawh hi kan tam thoin ka ring. Kan Speaker zahawm tak pawh hi Speaker te, MP te, MLA te, Minister te, Deputy Speaker kha a ni lo ve maithei bawk a ni. Chuvangin, kan rambuai avang hian a dik chiah chuan kan veng te zawng zawng pawh saw thingtlangpa pem khawm vek kan ni a. Concrete building hi Electric Vengah sawn a sa hmasa ber 1975 khan kan sa tan a, chu chu kan ni a. Buai ta lo ila Electric Vengah leh Aizawlah inhmun lo ram ka nei kher lovang. Chuti zawnga chhut chuan chhut ve ta ula ka'n duhpui che u a. Chuvangin, kan rambuai avang hian Mizoramah hian development tam tak a kal a ni.

Saiha lama awmhmun kan va khuar lai 1974 te chuan kea kal la ngai te a ni a. Sawng damdawi in te saw ka va sak a ni a 1974 khan, kum 40 kal dawn tawhah khan. Chungah chuan a phurha kan phurh chhuah vek a ni thingzai te hi. Tichuan, BRTF a lo kal a 1978 vel tham kha chuan a lo chhuak ta mai mai a ni a. Tin, rambuai avang khan 1967 ah khan chak taka kawnglaih a ngai a ni e tiin Central sorkarin Seling atanga Champhai hi a lai zar zara, tichuan kum hnih khatah khan a lai zo ta mai a. A hma te chuan kan kal tha hleithei hlei nem. Khi Aizawl bul lawk km 82 Sihfa khua a awm khi kan ni a, motor te hi a kal thei tawk tawk a, a tih hleithei loh a ni. Champhai-a lehkha zir lai phe chuan Pu Rozinga te Chanmari an ni a, jeep an nei a, chu chu a

lo thleng chho thei ngawr ngawr chauh a la ni. Hman ai chuan vawiinah chuan hma chu sawn tehreng mai. Kawng pawh a tha, sorkar tinin theihtawp an chhuah.

Vawiina sorkar pawh chuti zawngin kan dem lutuk chuang lo, theihtawp a chhuah a, kawngah pawh theihtawp a chhuah tho a ni. A hmaa sorkar zawng zawng pawhin theihtawp an lo chhuah a, khang theihtawp a chhuahna zar khan vawiinah kawng tha tak tak te pawh kan nei a. MNF sorkar lai pawh khan PMGSY ah khan km 2000 chuang lai kawng hi kan lai hman nghe nghe a. Vawiinah pawh engemawzat chu chhunzawmin sorkarin a lai a. Khatiang ang kan kawng awmsa vawiina kan laih belh zela te hi duhthu a sam lo ta deuh a, kawng a chhia a, han kal dawn ila a sawh bawp bawp mai a. Chuvangin, tunah hian sorkar hian tan la deuh se tun ai hian hma kan sawn ang a, a nuam deuh zawk ang. Chuvangin, vawiina kan Resolution rawn puluttu hian kawng hi a chhe ta deuh hlek a, leilawn te pawh hi a chhe ta deuh a, chuvangin, tun ai hian sorkar hian tan la selangin tih thu a rawn pulut a ni a. Hei hi han hriatthiam loh vak turah kei chuan ka ngai lova, a nih tak hi tiin tunah pawh hian pass ta mai ila. Theihtawp chhuahin sorkar hi han tang se vawiin ai hian kawng tha te, leihlawn tha te kan nei ang tih hi a chiang sain ka hria a. Chuvangin, ngaih loh lama ngai lovin he kan Resolution hi kan House-ah hian lungrual tak chuan pass thei ila a tha mai awm mang e aw ka'n ti a.

Nichinah khan kan Minister zahawm tak khanin Airport kawng te pawh kha a'n sawi a. Airport kawng te khu a kawng hnai zawkah laih a ni a, a tha viau reng a. Khatiang ang khan hei Durtlang kawng te pawh an sawi a, khatiang ang khan Sorkar hmasa khan an lo lai a hetiang hian tha tak takin a kal ta a. Chuvangin, vawiina kan kawng lo laih sa tawh tun Sorkar pawhin a lo laih tawh leh hman kum rei tawh taka a lo laih tawh te, term hmasa hmasa leha Congress Sorkar pawhin kawng a lo laih tawh te, tam tak MNF Sorkar-in a lo laih ve leh tawh te vawiina chhe tawh zawng zawng hi tun ai hian sorkar hian tan la se kawng tha zawkah min kal tir se tih duhthawhna kha a ni a. Chuvangin tuna Sorkar hi dem ta viau emaw a that lohna kawngah hian va sawi vak emaw lam zawngah hian ngailo ta ula thain kan ring a. A hranpain Sorkar hi kan dem em em ta emaw a tha lo ta em em emaw kan va tihna a ni chuang lova. Pu Speaker, helaiah hian khatiang zawnga ngaihndan a awm anih chuan a tha lo viauin ka ring a, chu chu kan tum pawh a nilo tih kha min hriatpui turin vawiinah hian ka'n sawi duh bawka.

Tin, leihlawn chungchangah pawh hian a dik chiah chuan kan leihlawn te hi a hlauhawm tawh hlawm khawp mai a, khawthlang lampang te, khawchhak lam pang te, saw lamah te pawh a awm a, a chin chhuakin a hming kan sawi vek senglo ang a. Heng kan leilawnte hi hun

rei tawh tak tak ami tawh te an ni hlawm a, Motor a kan han zawh thin hian tlak mai hlauhawm te pawh a awm nual a, chuvangin hengte pawh hi enchian a, tha zawka a tih theih lai lai awm hi chu kalpui theih ni selangin. A theih chuan RCC a thlak vek theihna hi awm sela.

Hei Champhai lam phei chu leilawn a tam mai a, khitilai Tuichang khi chu nikum lam lawk khan thawhzawh niin ka hria a, tin a chhakah Tuipui a la awm a, hei Tuivawl te a la awm a, Tuirini te pawh a la awm a, heng chho te pawh hi ngaihtuahna hmang ta ila. Tin hetah Darlawn tlangdungah leihlawn pawimawh deuh kan nei a, hei pawh hi tuna a dinhmun chiah ka hre lova, a dawhna a rei tawh a, khingte pawh khi kan ei leh bar lakna kawng ber anih avangin ngaihtuahna berah nei ta ila.

Tin, khawthlang lampang hi harsatna kan tawk fo reng a, tunah pawh Tlawng leihlawn a lo chim a, khungte khu Christmas hma ngeia dawh theih chu ni sela a lawmawm ngawt ang. Tin, a bakah leihlawn a awm ve zut bawk a, Bairabi lamah leihlawn pakhat thui tak thawh tawh la thawh zawh loh a awm a, khungte khu an problem a nasa tawp mai a, khulam atanga Kolasib lama lo kal duh tan pawh awlsam te a lo kal theihna mai a awm a. Mahse vawiin thlengin khungte khu dawhzawh a la nih loh avangin helama rawn hel a ngai a.

SPEAKER : I hun i hmang zo a, mahse hei a laklawh a i hmang zawm leh mai dawn nia.

Pu K.SANGTHUAMA : Pu Speaker, nia a laklawh a, tawite min pek theih chuan ka lawm khawp ang. Chuvangin vawiinah hian he kan kawng thalo tam tak awm te, kan leihlawn thalo tam tak awm te hi khatiang zawnga Sorkar va dem emaw, Sorkar hi an chak lo em a hetiangah hian ti a mualpho zawnga va sawi tumna a ni hauhlo tih kha min hriatpui pawh kan duh a. Sorkar beih ngawr ngawr kha kan tum hi a ni vaklo tih kha ka'n sawi duh a, tuna keini opposition ho hi tam tak phei chuan House-ah te hian in nem lutuk a, an ti a. Ni e nem chang a awm ang a, rum changte a awm ang a, Sorkar hi a hranpaa va beih ngawr ngawr emaw, an that lohna lai ringawt va sawi tura ding kan ni lova. Tankhawmna te, a thatna sawitlang a ti tlanga ding turte kan ni a. An that lohna lai kan hriat chuan kan sawi ang chu, amarawhchu Sorkar tha reng an nih lai a va chuk vak vak tur a opposition hi ding ringawt kan nilo te ka ti ve thin a. Chuvang chuan vawiinah hian he resolution hi pass avanga Sorkar a mualpho em emna tur hi awmin kei chuan ka hre lova. Hei hi tluangtlam takin pass ta mai ila, tichuan kan tan laknaah khan tun aia chak deuh zawkin Sorkar pawn tan kan lo la ang e. Engpawh ni sela, Sorkar-in kan theihtawp chu kan chhuah zel a, kan tih

theih tawk bak hi chu kan thei chuang lova, chuvangin theihtawp kan han chhuah ang a, tun aia tha hi chuan kawngte, kan leihlawn te pawh hi kan ti dawn a lawm, theihtawp kan han chhuah chho zel ang tih ni mai ta se a that ka'n ring a.

Tin hei khawpui chhungah pawh Pu Speaker tawite ka'n sawi belh leh ang a. Keini Electric Veng kawng Church Street kan tih saw a chhe kumhlun ringawt mai a. Sawng pawh saw kan PWD lama changtute an awm lova pawi ka ti khawp mai a. Kumin thal chhung hi chuanin minrawn siam ve ngei se ka duh a. Kan Biakin atanga tuikhur thleng kawng saw tawite a ni a, KM chanve pawh a tling lo, metre 200/300 lek a ni a, keimahni ho kalkawng phei a ni a, saw saw kumkhuain a chhe mai a, a thalo hlein ka hria a, kan Minsiter zahawm tak PWD changtu bialte pawh a lo ni bawk a, amah awm ngei se han ngen deuh te pawh ka'n duh a.

Hei Aizawlah hian Pu Speaker, kan bial lam tlak lam hi tlemin kan la hnufual deuh a, kan tawng tu nuihzat suhah. Khu khu minrawn ngaihtuah sak deuh te pawh ka'n duh a, kawngah hian a dik chiah chuan tunah khuan harsatna tam tak kan tawk a ni. Ramrikawn atanga PTC kalkawng khu tun aia tha deuhhlekkhuan ti ila. Pu Speaker, fur ruahtui a lo thleng leh ang, buaina namen loin vawiiinah kan buai a, khu pawh khu ka bial Rangvamuala Inhmun an laih khu a ni a. Chuvangin Sorkar hian Disaster lam pawh hian min ngaihtuahsak deuh hlek se ka duh a, a in hmun neitute khu an inseng nasa tawh khawp a, tunah hian an khawngaihthlak vein ka hria a, Sorkar pawh hian a leivung paihah te pawh hian theihtawp han chhuah ve se thain ka hria a. Kan chaw lakna ber a ni a, fur pui a lo nih lehzel chuan tuna a awmsa khu thal chhunga kan paihfai a ngaiin ka hria a. Chu chu kan Sorkar hian min hriatpui ta ula, khulai kawng khu a bik tak pawhin thain ka ring a. Anmahni kuta kan dah ringawt khu chuan furah harsatna lian zawk kan tawkin ka ring a, chu chu ni lovin, kan sorkar hian a vung paihnaah te pawh hian theihtawp an lo chhuah tawh a, cheng tam tak a nuai tam tak vawiiiah khulai Inhmun neitute khuan an lo seng tawh a. Chuvang chuan kan Sorkar pawhin vawiiinah hian min hriatpui turin ka'n ngen duh nghal che u a ni.

Tin chumi kara a chhiata hemi a chhak lam tuna kan sawi Ramrikawn atanga Sakawrtuichhun, Sakawrtuichhun atanga PTC khu black top zen zun pawh kan ti chuang lo, mam deuh hlekin a kawr chhia leh eng ilo khu bolder nen Road-Roller nen han ti ila, tha takin a kal ve theih mai a ni. Black top te chu a harsa cheng tam tak sen tur a ni a, a theih loh vang tih chu ka ring tho. Mahselangin, mam ve deuh hlekin kawng khulai a lo pin pawha car kal theihin kan sorkar hian siam ni sela tih kha ka'n sawi duh bawk a ni e. Awle, Pu Speaker, ka lawm e.

SPEAKER : Hei dar khat a ri dawn a minute khat chu a la awm a, kan chawl rih ang a, kan kal tha leh dawn zawk em ni? A nih aw nakin chawhnu dar 2:00 a thu leh turin i bang ang u.

2:00 PM

SPEAKER : Resolution sawihona kan chhunzawm ang a, chawhma khan 7-in an sawi, 8-na tur tuin nge sawi hmasa ang le. Pu Ngurdingliana.

Dr. NGURDINGLIANA : Pu Speaker ka lawm e. Kei chu ka sawi rei dawn lova, damlohna leh thihna vangin ka tlaivar a, lawmthu sawi ka duh a, keima tawn china ka hriatah.

A hmasain ka sawi duh a, motor khalh nuam ti chi hi ka ni a, zoram dung leh vangah kan kal chhuak chu a ni deuh ber mai a, a kawng hi a chhe lai chu awm mahse siam that zel hi a ni a. Nichina kan Transport Minister zahawm takin a sawi ang khan developed state kan ni lova, developing state kan ni tihah hian a chiang a. Kan PWD te pawhin a chhe lai siam thain, tin kawng awmlahnaah te pawh hma an la zel a. Keima bial bikah ka experience-ah ka tawn hriat, thla tin deuhthaw ka kalna kawng ka rawn sawi duh a. Kan hotuten duhsak takin tunhmaa hmar thingpui hmasawnnain a thlawhkhum tih kha tunah chuan, khi, Phullen atanga NE Tlangnuam ₹ 50,000 lakh chuangin tunah hian company 2 in min thawh sak a. Tin, kan bial pumpui khi PMGSY in min cover zo tawh a. Pavement work la tih loh, Tualbung, Buhban, Lungpher khi kan la bak a ni mai a. Tun atanga kum 4 ah chuan kan bial khi blacktop bial a ni thei mai awm mang e ka ti a. Hemi kawngah hian lawmthu ka sawi duh a, lawmawm ka ti khawp mai a. Road communication lamah chuan hmasawn tak kan ni. An hmachhawp mek tunah Suangpuilawn – Zawngin te pawh ka lo hriat angin PWD atangin hmalak tumna a awm a.

Chutiang chuan he Resolution Pu K. Beichhua, Siaha bialtuin a rawn putluh hi, a thu ang ngau ngau hi chuan kei chuan ka pawmpui theilo tluk a ni a. A chhan chu ka tawn chinah ka lawm tlat mai a, a engemaw a wording te siam that a nih erawh chuan ka pawm thei tho ang a. A chhan chu sawi ang khan kan bialah nasa taka hma min lak saktute hmalakna tiphurlo zawnga Resolution rawn lut hi chu kei chuan ka pawmpui theilo a. Mahse kan han ti ti ho ang a, a wording te thlak anih chuan thu hran ni se.

Tin, Kolasib tlangdung kan tih hmanni a Select Committee te kan zinah pawh khan, a kawng tha lai tam zawk a ni a, Kawnpui – Kolasib khulai tawite khu tlemin a chhia a, amaherawhchu chungte pawh chu tunah hian repair tumna a awm tih te pawh kan hria a.

A ram pumpui thua kawng thalai leh kawng chhe lai a awm a, season 4 in min tlakbuak a, fur kan zo hlim hlawl a ni a, duhthusam chuan a tha lovang tih a hriat theih a. A tlangpuiin kan kawng enkawltute hmalaknaah chuan kei chu ka lawm a ni tih kha ka han dinpui ve a ni e. Ka lawm e.

*Speech not corrected

Pu LALTHANLIANA : Pu Speaker, ka lawm e. Tuna kan thu inchuh hi, ti mai ila, Dr. K Beichhua resolution hi ka ngaihtuah a. Kan han sawiho a, a then chuanin, Pu Chala testimony sawite pawh ka ngaihtuah chhuak a. A sawi bul thei rat rat khawp mai a, ‘Ka nu leh pa te an inthawi thin’, tih atangin a han tan a, a rei duh khawp mai a. A point a han chuk chawt mai hi, kei, ka ngaih ve dan deuh a ni a.

Ka ngaihtuahnaah chuanin, sorkar hrang hrang alo piang a, hma mahni theih ang tawkin kan la theuh a. Hmanlai atang chuan kei pawh, ka pian tirh lai ai chuan ka lo upa ta deuh angin, hman ai chuan tunah hian Mizoram hian kawng engkimah hma a sawm hrim hrim. A fin pawh kan fing tawh a, hma kan sawn a. Tin, hetiang ram siamthat te hi sorkar mawh a ni a, development thil reng reng hi chu. Eng sorkar pawh ni se kan tih tur vekah ka ngai a. Chuvang chuan va chhuan em em tur a awm chuang em ni, tih ka ngaihtuahnaah a awm a. Sorkar hmasate pawh an tha a, tuna mi pawh an tha ka ti tho a ni. A tha hi chu ‘a tha’ tih mai hi thain ka hria a, an hmalakna pawh lawmawm ka ti a.

Tunah kawng chungchangah pawh hian sorkar kal lai mek pawh hian nasa takin hma a la a, kan budget speech-ah pawh kan hmu a, thil lawmawm tak a ni a. Amaherawhchu, ‘hma a la lo, hna a thawk miahlo’ tihna ni lovin, ‘hei aia chak zawk hian hma i la tlang teh ang u’ tiin resolution hi rawn putlulh ni maiin ka hria a. Ka hmaa sawitute khan keimahni kan inbel lutuk em, kan la ulh lutuk em aw, tih te kha ka ngaihtuahnaah a awm a. Chuvang chuan, la-ulh lutuk lo ila, kan pass pui thei mai lawm ni aw, tih te ka ngaihtuah a. Han ngaihtuah vang vang ila, thil tha chu a ni phawt mai a. Ka ngaihtuahnaah chuan committee-ah te pawh hian, thenkhatin a tilo zawngin an han sawi nak nak a, a thenin a ti zawngin an han sawi leh a, kan pawm tlan theih deuh hlek lo hi chu a thalo tih thutlukna han siam theih deuh mai hi a awm ve a. Mahse, kan Resolution hi thil tha

a nih tlat avangin, a tha na na na hi chu, ‘Nia maw le’ han ti tlang thei mai ila chu a van duhawm dawn em aw, ka ti a.

Tin, thil lawmawm tak ka han sawi leh duh chu, MLA zahawm tak tak thusawi ka han ngaihtlak khan, kan bialah kan lungawi tlang kha lawmawm ka ti a. Khawvelah hian lungawina hi kan zawn chu a ni mai a, tunah pawh hian kan beisei chu lungawina hi a ni mai a. Ka hmaa sawitu MLA pawh kha a bialah a lungawi a, ka lawmpui khawp mai. Kan lungawi tlan hi a pawimawh ka ti a. Lawngtlai lam bialtute hi enge an an aw ka ti a. An bial kawngah te an lung a awi em? Tin, ka ngaihpawimawh pakhat leh chu, internal road-ah te pawh hian kan bial theuhah kan lungawi tlang em? Chuta tang chuan hmasawn zel tur kan ni a. Tin, hetiang ang, kan siam mek a, kan siam chho zel ang a, sorkar pawhin hma a la zel ang a, a hma ai chuan a tha zel ang. Amaherawhchu, a lo chhe ta a awm chuan a hmain a tha tawh tihna a ni a. Nichina an sawi ang khan, a hma khan tha kha a lo awm tawh a, tunah a lo chhe ta a, a siamthatnan hma i la ang u tihna kha a ni a. “Hma kan la mek’ an ti a, a dik a, amaherawhchu, Pathian thute pawh hi kan sawi loh chuan hre ringawt mah ila, pa pakhat thusawi ang deuhin, ‘A hlui lo, a thar zel thin’ tih thupui hmangin Pathian thu a sawi a. A ngai reng si kha han sawi khan kan in bat ve a, kan chak phah a, hma pawh kan lak phah a.

Tin, vawiinah hian PWD lam Officer-te pawh an lo thu a, khangte khan vawiinah hian kan ngaipawimawh a ni tih an lo hriat phahna tur atan te, tin, kan mipuite pawhin kan ngaipawimawh a ni tih an lo hriat phahna tur atan te pawh hianin a tha hrim hrimin ka hria a. Vawiinah hian sorkar hian hma a la lo ka ti lova, a la a, a tha ka ti khawp mai a, lawmawm ka ti a. Ka bialchhung te pawh ka ngaihtuah hian siam ngai hi chu a tam ve khawp mai a, mahse kha kha a hma chuan a lo tha tawh thin a ni tunah chuan a chhe ta a, kha kha siamthatna tur atan hma hi chak zawkin ila teh ang u a tih kha pawm thei ila chuan a va lawmawm awm e aw tih kha ka ngaihtuah a, chu chu ka duhtusam pawh a ni a.

Pu Speaker, member zahawm tak takte i veilama thute leh i dinglama thute hian kan Resolution zahawm tak mai hi pawm thei ila tih kha ka duhtusam a ni a, ka’n support ve a ni e, ka lawm e.

SPEAKER : Pu John Siamkunga

Pu JOHN SIAMKUNGA : Pu Speaker, ka lawm e. Vawiina kan Resolution Dr. K. Beichhua-a rawn neih hi ngun deuha han ngaihtuah chuan ‘chhe ta lutuk’ han tih hi a mawilo deuh mange aw, ka ti a. Chhe ta lutuka han awm kha chu he sorkar hi a chhe ta lutuk emaw ni chu aw a tih theih a. “Mizoram inkalpawhna kawngpui leh leilawn (Bridge) chhe ta lutuk hi tun aia chak zawkin siamthat hna thawh ni rawh se” tih a ni a. He chhe ta lutuka thil lo awm ta niawm anga helai Resolution-a lo lang ta hi, helai te hi a warding hi a mawi lova, chhe ta lutuk a ni nge ni lo te pawh hi kan sawi a ngaiin a lang a ni.

Kawng titha tur chuan pawisa kan mamawh tih kan hre theuh a, chumiah chuan tunah hian sorkar pawhin hma a la nasa a, Mizoram road fund hnuaiia lut turin heng kan POL chungchangah te, entry tax chungchangah te leh thil dang dangah kawng tha kan neihna tur atana hmasawna tur hian ke a chhep chho mek a. Tunah hian India Road Transport hi kan GDP atang hian 3.69% an luah ve tawk a ni a. Khawvel ram changkang ni tur chuan communication a that a ngai a ni tih hi India hian a hrechiang a, chumi avang chuan pawisa pawh hi a dah tam chho tial tial a, tunah hian kan kawng neih zawng zawng atanga 47% hi kan hriatthiam dan tur zawng chuan metal road a ni a. Tin, tunah hian nasa zawka hma la turin 2014-2015 chhung hian road project hnuaiiah a bikin North East state 7-te tan cheng vaibelchhe 53,706 dah a ni. Hemi a nih avang hian tuna kan Resolution hi lo lut lo ta zawk sela, central sorkar pawhin sum tam tak a rawn dah tawh a, sorkarin a hmalak mek a ni baw si a, chuangin Resolution-a nawr kher a ngai em ni, North East state-te tan cheng vaibelchhe 53,706 lai lo awm tawh siin tih kha ka’n sawi duh a.

Tin, hmun dangte kan en chuan kawng hi an nei tha lemlo hle a state dangte pawh hian; Mizoramah hian kan kawng neih zawng zawng hi 7548 km a ni a, helai record atanga kan hmuh dan chuan 5870 km hi PWD hnuaiia awm a ni. Tin, central sorkar order angin boundary-a kawngte, lamliante hi border road (BRO) ho lak tir tum an ni a, thenawm ramte nena kan inrina kawng vel hi chu BRO hnuaiiah dah chhoh mek zel a ni a. Anni hian chak takin hma an la turah kan ngai a. Mahse, kan duh angin thil a kal thei lova a paw takzet a ni. Anni hian kawngpui lian tak, tha tak, defence thilah pawh hmantlak tur atana hma lain tunah hian hmun thenkhatah pheih chuan hna an tan tawh niin kan hria a, lawmawm takzet a ni.

Mizoramah hian a dung leh vang, chhim leh hmar zawngin kawng tlan a tam tawh a, kawng hi chu kan nei thui viau a ni. Mahse, chutih lai chuan a chhak thlang zawnga kawng erawh hi chu a la tlem deuh a, kan bialah pawh Lunglei tlangdung atanga Champhai tlangdung kal duh tan pawh Selinga rawn kual kher emaw, Keitum-a rawn kual a, chhaklam/chhimlam pana hetia kual kawi kual kawi a ngai thin a. Mahse, tunah chuan N.Vanlaiphai leh S.Chawngtui te lai tlangin direct takin a kaltlang dawn a, chuvangin, kan sorkar hmalaknaah hian chhim leh hmar zawnga kal te lai zelin, thlang zawng/chhak zawnga hma la turin nasa takin hma a la a ni.

Tunah he Resolution neitu hian kawngchhia an tih hian a pavement chungchang a sawina a niin ka ring a. Kawng hi chu kan nei tha khat hle a, a tam pawh a tam a, a thui pawh hi a thui tawh a. Tin, chutih lai chuan helaia pavement chungchang hi a nih chuan pavement titute hi tam tak hi chu Mizo tho kan ni a, ram kan hmangaih a tihtakzetna thinlung nena pavement hna pawh hi kan thawh a ngai a ni. Vawiinah hian mipuite hi kan kawng that leh that loha mawhphurtu kan ni a. Pavement kan tih hian Granular Sub-Base (GSB) kan han tichho a, Water Bond Macadam (WBM) te kan han ti chho leh a, hengah hian bill hrang te te a lo awm si a, kan contractor rinawmlo deuh ten bill an la a, a awlsam lai an han thawk a, an hna an kalsan leh ta daih thin a, chu chuan kawng hi a tichhe tam em em a ni tih hi kan chiang tlang a ni. Chung chu Department lam pawhin tunah chuan hma lain an kalsan tawh lohna tur atan hian hma an la mek a ni tih te kan hria a, a lawmawm takzetin ka hria.

Tin, lei chungchangah hian lei hi 38 nos. lai tuna ka chhinchiah ve theih chinah chuan kan neih tawh leh kan dawh mekte a ni a. Chungah chuan han sawikai duh ka neih chu Mat lei National Highway 54 ami te, Tuirial lei 54 ami te leh Tuirini lei National Highway 150 ami te leh a dang dangte a tam em em a ni. Tha tak tak tam tak a awm laiin 'chhe ta lutuk' ti a kan zu ko hi chu a diklo ang a, engemaw zat chu chhia chu a lo awm ang, tha erawh hi chu a tam a ni tih hi kan hriat a pawimawh a.

Tin, Darzokai lei saw tlem han sawi ka duh a. Sawlai saw BRTF Road a ni a, Mizoram sorkar hian siam kan bo lo a ni. Amaherawhchu, kan sorkar chak tak hian kan Chief Minister hmalaknain tuirial ami te harsatzia hriain "E, lei i dawh teh ang u" tiin NLCPR hnuaiyah Mizoram sorkarin sum a dil a, vaibelchhe 2.25 dil a ni. Tichuan, original estimate kan han siam ta a, vaibelchhe 2.66 zetin siam a ni a, tahchuan state sorkar hian

cheng nuai 50 in kan do a, kan pe vek tawh bawk a. Tichuan, tuna an thawh lai saw an zo tep tawh a, lei pawh an dawh pheih zur tawh a, a cross zawnga thir zamphei saw an ti mek a ni. Hmanni lawka chanchinbua thil lo lang kha a fello hlein ka hria a, Hnahthial leh Thingsai inkar siamna tur sum an divert tih te a lo chhuak a, a pawh takzet a ni. Hei hi thudik a ni lova, tunah hian cheng nuai 222 kan pe tawh a, heng zingah hian Hnahthial atanga black topped sorkarin a thawh tirna Hnahthial atanga Tuichang saw thawh zawh a ni tawh a, a thawktu pawh Tluangte-a a ni a, sawlai Darzokai lei dawh saw kan hmanhmawh si a, zawh thuai thuai kan duh si avangin a final bill tur hi Pu Tluangte-a pawisa hi an lo puk mai a ni, divert engmah a awmlo. Chuvangin, hmanni lawka chanchinbua lo langah khan an divert ta ni ang a sawite a awm a, hei hi a pawh takzet a, hmundang ami hi divert engmah a awm lova, Darzokai lei saw a pawimawhin tural ami te an lainatawm si a, chuvangin kan dawh zawh thuai theih nan tiin hmun danga lo awm kha hotuten an puk mai zawk a ni tih kha ka'n sawifiah leh duh bawk a ni.

Tin, Pu Speaker, kawng tha nei tur chuan sum kan neih a ngai a ni kan tih tawh kha, hmundangte kan en chuan ram thenkhat Virginia-ah te chuan an budget 40% chu kawngtha siam nan an dah a, khatiang khan kawng a lo tha mai thin a. Tin, kawngchhia han tih hian India ramah pawh hmun tam takah kawngchhia a awm, a zawng a zain a chhe vek lova, Mizoram ah pawh hian kawng tha tam tak a awm, chhia a awm bawk. Chuvangin vawiina kan Resolution leihlawn kawng leh leihlawn chhe ta lutuk tih hi chu a wording hi a dik lova, chuvangin hei hi thil support har tak niin ka hria a.

Tin, a tawp bera ka sawi duh chu, hei kan ram a lo buai tak avangin nichinah kan hotu hrang hrangten an rawn sawi a, eng eng emaw nghawng a nei thin a, a pawh takzet zet a ni. Ka ngaih ve danah chuan kan ram kha lo buai lo ta se, kan Missionary Sap te khan min chhuahsan lo sela, Zoram hi sakhua lamah, rinna lamah hei ai hian nasa fein kan changkang ang a. Kan hnathawhna black top kan beihnaah emaw, contract hna kan thawhnaah te pawh kan rinawm ang a. Tichuan Sap hovin min awmpui ang a, Saptawng leh Education lamah te changkangin kan moral te pawh hi siamthat niin hei aia nasa hian hma kan sawnin ka ring. Vawiina kan Resolution helaia "Kawngpui leh leihlawn (Bridge) chhe ta lutuk hi tun aia chak zawkin" tih hi chu a chhiat tak lutuk kei chuan ka hre lova. Hma kan sawn nasa, tha tam tak a awm a, chhia tlema zawng a awm ve mai thei e. Mahse, sorkarin siamthat hna thawkin naktuk lawkah hian thil kha kan hmu leh zawk dawn a ni tih kan sawi duh a ni. Ka lawm e.

SPEAKER : Pu Zothangliana.

Pu H. ZOTHANGLIANA : Pu Speaker, ka lawm e. Saiha bialtu zahawm tak Dr. K. Beichhua zawhna Private Resolution chungchang sawihona kan nei thei hrim hrim hi thatna tam tak a awm dawnin ka hria a, lawmawm ka ti. Pass leh pass loh lam chu thu hran daih a ni.

Ka sawi hmasak duh chu, tunhnaiah Koladyne Multi Modal Transit Transport Project Road chungchangah Chanchinbuah nasa taka thil ziak a awm a, chutah chuan he kawngpuin a paltlang tura compensation claimed-tute claimed area hi Mizoram pumpui aiin a zau zawk tih te a ni a. Hei hi thu belhchian dawl lo, thil hriatsual leh tihsual palh avanga sawlai area ami te inchhuah mualphona angah te pawh a ngaih theih a, Pu Speaker, pawl ka ti khawp mai. He report lo chhuahna hi Anti-Corruption Bureau atangin niawm a ni a, anni hian an tihluiha an sual vanga an ti a nih chu ka ring miah lova. Ram hiacre te, hectare te, bigha te, square feet, square meter, square kilometer tih te a convert kual theih vek a ni a. Chutianga conversion an siam lai chuan khawilaiah emaw khan tihsualpalh a awm ni berin a lang tih Pu Speaker, nangmah kaltlangin Zoram mipuite ka han hriattir duh a. He kawngpuia compensation claimed-tu zat hi 1024 an ni a, hmana Tuirial-a compensation claimed-tute ai kha chuan an tlem zawk daih a, a area hi a zau zawk fe tih kha ka'n sawi lang ve hrim hrim duh a ni.

Tin, Lai Autonomous District Council Area thuneihna hnuai a ni a, ram an inpek dan tlangpuiah chuan engemaw special purpose lutuk te a nih loh chuan mipakhat tan hectare 5 bak pek a ni lova. Mi 1024 te hi a zau thei ang ber hectare 5 pek theuh ang pawhin lo chhut ta ila, hectare vaiah hian 5120 a ni dawn chauh a, chu chu a square kilometer a chantir dawn chuan square kilometer 51.20 chauh a ni. Mizoram area hi kan hriat theuh angin Square Kilometer 21081 a ni a, he Kolodyne Multi Modal Transit Transport Project Road hnuai compensation claimed chungchanga sawilan kan unaute duham leh huamhap lutuk, khaw hmulo lutuk anga ngaihtheih tura thu chhuak awm palh chungchangah hian Lai Autonomous District Council Area-a thuneitute pawin ACB leh thuneitu dangte hnenah ennawn tura an thlen tawh thu hi ka han sawi hmasa duh a ni.

Tin, nichin khan member zahawm tak South Tuipui bialtu Pu John -a khan Darzokai chungchangte pawh kha a rawn sawi a, a thusawi kha ka rawn thlawp nawn ve

duh hrim hrim a. He kawng (Hnahtial - Sangau tiin sawi mai ila) hi BRO hnuiaia awm a ni a, chuvang chuan lei dawh that a ngai emaw, Marboat siam that a ngai emaw pawh ni se a nihna takah chuan BRO mawh a ni. Chuti chung chung chuan kum 2008 inthlan dawn lai te khan kan hotuten a bik takin vawiinah he House-a kan Leader zahawm tak Pu Lalthanhawla, kan Chief Minister ni bawh leh kan hotu dangten khilai vel area harsatna, kan mamawhzia te min hriatthiampuiin central sorkar-a Congress hotute hnenah an sawi a. Tichuan 2008-ah khan thlan tlin kan nih hlawm chuan sorkarna kan siam theih chuan he lei dawh hi chak takin kan bawhzui dawn a ni tiin keini te pawhin kan sawi ve a. Chumi rah chhuah kal zelah he lei hi dawh a ni a. Tunhma deuh atang tawh khan he lei dawh a tul zia hi wawi tam tak hmun hrang hrangah, forum hrang hrangah sawi a lo ni tawh thin a. Nimahsela, Congress sorkar hun tih lohah chuan heng kawng leh lei pawimawh tak takte hian a nih tur ang taka ngaih pawimawh hi a hlawh zawk thin lo mai a ni tih ka'n sawi tel duh a.

Tin, tunlai hian khilai area vela NGO thenkhatte leh Opposition V/C lamte huaihawtin bandh huaihawt a ni tih min hrih a, office te leh zirna School te pawh dan/khar a ni nual a ni tih te kan hria a, hei hi thahnemngaihna vang a ni a. Hetianga thahnemngai zual an awm lai te hian lawmna chang hria kan bial mipuiaih te, Lawngtlai East mipuiaih te, South Tuipui bialah te leh hmun dangah te khian za tam tak, sang tam zawk an awm a ni tih he House hi ka han hriattir ve hrim hrim duh bawh a ni.

Tin, PMGSY hnuiaia lei dawh zel tur estimates te siam a, buaipui mek hovah hian pawimawh em em ka tih kan Bial chhung a, kan bial chauh pawh ni lo, Bial dangten an hman tangkai tur Thingfal-Mamte- Lungtian Road PMGSY leh BRO suma laih tawh Chhimituipui Lui kana lei dawh tur hi tuna ruahmanna awmsaah hian a rawn lang chiah lo deuh niin ka hria a. Cheng vaibelchhe tam tak sengin kawngpui tha tak laih a ni tawh a, chu kawngpui hman tangkai tak tak a nih theihna tur atana pawimawh em em mai lei dawh a ni si lo emaw, a lo berah pawh Marboat tal te dah anih si loh hi chuan he kawngpui tha tak mai hi mipuiten a nih dan tur ang takin an hmang tangkai thei dawn lo niin ka hria a. Chuvangin, estimates te siam a, investigation te kalpui mek ho lei 21 dawh tur tarlan piahlah hian emaw, siamrem in emaw he lei tuna kan han sawi mek hi min dawh sak theih dan a awm ang em? Awm thei se kan va han duh em tih te kha ka han sawi tel duh bawh a ni.

Tichuan, kan Private Members' Resolution chungchangah ex-Minister leh senior member zahawm tak Pu K. Sangthuama te pawh khan rambuain development tam tak kan ramah a thlen a ni ti ang deuh khan thu a sawiin ka hria a, a dik a ni tih hi kei pawh ka pawm dan a ni. Chutih rual chuan thil tha lo a thlen hi a tam zawk daih, a buk a rit zawk daih, tih hi ka hmuh ve dan a ni tih hi ka'n sawi duh a.

Tichuan ka bial Lawngtlai khawtlang kawng te pawh PWD in sum a indaih lo chung chungin kan mamawh em em a ni tih hriain nikum lam te khan min han siam that sak hram hram a, kan lawm em em a ni tih te ka'n sawi tel duh a.

Tin, nichina member pakhatin a han sawi zawk tawh, Mizoram Road Fund chungchangah khan kan hotuten ruahmanna tha tak tak an siam a. Heng an ruahmanna siam te, Taxation Department-in entry tax an buaipui mek, tuna bill stage-a awm mek hi road fund atana hman theih tura siam ni se tih te leh a dang tam tak Motor Parking fee te pawh road fund atan chhun luh dan ngaihtuah theih ni se tih te, rawtna tha tak tak a awm a. Hengte hi kan hotuten nakinah a taka ngaihtuahdan tur an la rawn duang chhuak ngei turah ka han beisei a. Chutih hunah pawh chuan kan state sum mamawh dan te leh kan kawngpui leh lei thenkhatte siamthat a ngaih ziate zawng zawng haider lovin public leader chin te chuan heng kawngah hian tan kan lak a ngai a ni tih rilru pawh pu thar theuh ila a tha lawm ni ka ti a.

Chutichuan, he Private Members' Resolution hi thahnemngaihna avanga putlulh a nih mek lain hotuten, thuneituten an bawhzui mek mawlh mawlh a ni a. Nichina kan Law Minister zahawm takin a sawi ang khan nupuite thingpui lum tura tih a, an lum mek mawlh mawlh an mawngtama pet zui talh tih ang deuh zia zanga, ti mawlh mawlh a, thawk mawlh mawlh a, thawk rawh u, ti rawh u, in tih kher hi chu a chuang tlai deuhin ka hria a, chuvangin he Resolution hi chu pass kher lovin hetia kan sawiho hi a tawk viau mai lawm ni tih kha Pu Speaker, ka ngaih dan a ni e, ka lawm e.

SPEAKER : Pu Lalrinawma.

Er. LALRINAWMA : Pu Speaker, ka lawm e. Vawiinah Saiha bialtu zahawm takin Resolution, 'Mizoram chhunga inkalpawhna kawngpui leh Leilawn Bridge chhe ta lutuk hi tun aia chak zawkin siamthat hna thawh ni rawh se', tih a rawn pulut hi a lehlama ngaihtuah chuan rawn putlulh awm tak ni pawhin ka hria a. Tun dinhmunah kan mamawh tak niin ka hria a.

Tin, Pu Speaker, i dinglama mite pawh hian tha an ti ve khawp chuan ka hria a. A chhan chu word pakhat 'chhe ta lutuk' tih lai hi an la na deuh mai mai niin ka hria a. Hei tunlai chu MLA kan nihna angin khawi khawiah emaw vah chhuah a tam em em mai a. Sawtah Chhim tawpah te, khawchhak tawpah te, khawthlangah hmar lamah te kan kal a, a bik takin chhim lam pang bialtute pawh an rilru chu a nui var varin ka ring a ni, an thlawp ngawtin ka ring. Chutiang bawkin chhak lampang Champhai North leh South te, Tuipui East te khatiang zel khanin Kolasib bial lampang Bairabi te, an vai mai hian an thinlung chuan a thlawpin, tih awm tak a nih hi mawle an tih ngei hi ka ring tlat a ni.

Tin, helaia kan member zahawm takin a rawn pulut pawh hi putluh awm tak a ni a. Keini sorkar kha kawng ngaipawimawh kan ni a. Kan puin a sawi ang deuhin 'Economic Backbone' a tih ang deuhvin PMGSY ah pawh khan nasa takin hmalak a ni a. PMGSY ah pawh Phase 7 thleng kha hma kan la hman a, amaherawhchu, phase 7 erawh kha chu kan tlak tak avangin tuna Pu Speaker, i ding lama thute hianin a hna kha chu an tender chho ta a, a theih ang angin hei an han bawhzui chhova, a lawmawm hlein ka hria. Amaherawhchu, chhe ta lutuk tih lai tak hi kan tuar na mai mai niin ka hria a, tunaia chak zawkin siamthat hna thawh ni rawh se, tih lai te hi a pawimawh takmeuh meuh a, wawiinah hianin a chhe ta lutuk kan tih avangin a hma aiin a chhe ta zel tihna a ni lova, ka hmaa mite sawi ang khan. A lo tha tawh thin ang tih pawh a rinawm a. Amaherawhchu, siamthat hna hi a muan tak lutuk avang hian a chhe ta lutuk a ni tih lai zawk hi a rawn sawi tum niin ka hria a.

A nih leh vawiin Zoram dung leh vanga kan buaina zawng zawng hi Project kal lai a huna kan zawh loh avang a ni dawn lawm ni? ka ti a ni. Tuipui South bialtute pawh a bial chhungah vawiinah chuan Office khar, school khar te a ni a. Heng zawng zawng pawh hi a bul ber chu Project a zawh huna kan zawh loh vang a ni. Chu chu vawiinah hian kan ngaihtuah dawn lawm ni ? Engvanga zo lo nge kan nih? Eng Project hi nge? Kawng laih a ni emaw, formation cutting a ni emaw, thildang building pawh ni se, engati nge a slipulated period chhunga kan zawh theih loh tih lai hi kan ngaihtuah hi a ngai a ni, vawiinah hian. A hranin kan en anga, an zawh loh ang ang hi kan pawm mai dawn em ni ? kan ti deuh a. Chuvang chuan Project a zawh huna kan zawh theih loh avanga buainain vawiina min rawn nanchin hi a tam em em a ni tih kha ka'n sawi duh bawk a ni.

Hmanniah Aizawl District level Vigilance and Monitoring Committee-ah khan ka tel ve a, chuta an rawn report-ah chuan, Aizawl District road-ah hianin a District RD Block-ah

hian sawi ta ilar, Phullen RD Block-ah khian 2008-2009 atanga bul tan tawh vawiin thlenga la zawh loh hi Project thum a awm a ni. Darlawn RD Block-ah khian Project 3 a awm a ni. Thingsulthliah ah khianin project 4 a awm a, Tlangnuamah hianin project khat a awm bawk a ni. Chu chu Aizawl District ringawtah a ni.

Chu chu hna kan thawh hi tun aia chak zawkin tih kha kan mamawhna lai tak zawk chu a ni. A vai hian Aizawl District-ah hian Project 10, 2008 leh 2009 a hmalak tawh a ni a. Project pakhat erawh hi chu 2007 leh 2008 a hmalak tawh a ni. Chu chu Thingsulthliah-ah formation cutting a ni. Chutiang chuan kan Project hi a muang em em a, hei hi thaah kan pawm dawn a, vawiinah hmalakna tha zawk hi kan tum lova, vawiinah kan en dawn a nih chuan kan Project a lo muan hian vawiina Assembly Committee a kan va kal hian kan va tlawhna zawng zawng hi kan hre vekin ka ring, ka member pui zahawm tak takte hian. Kan va kalna chhan erawh hi chu a Project a khawtlai avanga pawisa pekbelh awm thinte leh khatiang en tura kal kan nih hi kan hretlangin ka ring a ni. Chuvang chuan he Resolution hi Resolution tha deuh mai a niin ka hria a. Vawiinah hian Pu Speaker, i dinglama mite tan pawh hian han huat emaw a, han ngaih huat tur awmin ka hre lova, chuvang chuan pass ngei hi a thain ka hria a.

Heng kawng pawimawh zia leh kan economic-a awmzia a neih zia chu kha PMGSY, in hunah te pawh a niang, kan hunah te pawh a ni anga, kan laih ten Zoram hmun hrang hrang a paltlang a, Sawhthing hralh ngai lo te pawhin vawiinah hian an rawn hralh a. Kan Tuivawl bialtu MLA zahawm tak Pu Piana pawhin a bial chhungah nuai za chuang an lalut tawh a ni tih kha a rawn report theih phah a ni. Chung zawng zawngte chu a nihna takah chuan kawngpui thain a pawh tak avanga a rah chhuah zawk a ni. Chu vangin mipuite hmakhua kan ngai a, kan GSDP te pawh a kang a, ram leilung hausakna haichhuak tur hi chuanin Project hi chak zawka kalpui a ngai a ni. Project avanga pawisa kan sen belh tam lutuk pawh hi titawp tur chuan vawiinah hian heng hi chak lehzual zawka nawr a ngai dawn lawm ni? vawiinah hian kan pass lova, vawiinah hianin lehlam min hawi san a nih chuanin Pu Speaker, vawiina an bial chhung kawng laih zawng zawng leh leihlawn dawhna zawng zawngah te pawh hian an bial mipuiten an thiam bik dawn lo a ni tih kha ka'n sawi duh a ni.

Vawiinah kan Bial sawi ta ilar, khi tah Chhawrtui, Rullam inkar te pawh, ka ngaihtuah a vawiinah hei min rawn phone a, E, kawng siam hnathawh mek a ni, in thawk lo kan ti lo, in thawk, theihpatawpin in la, mahse, a muan avangin vawiinah hianin Lungpho pawh Sumo pawh a kal hlei thei tawh lo, a kawng a khuar lutuk. Sawhthing chawh a lo hun anga an phur

chhuak thei dawn em ni. Vawiinah hian Sawhthing thar tam avanga kan pawisa lei tam thu chu kan chhuang hle a ni lawm ni, vawiinah hian Pu Speaker. Amaherawhchu, hmalakna chak zawk chu engati nge kan duh si loh. Chuvang chuan Pu Speaker, vawiinah hian he Resolution tha tak mai hi, ‘a chhe ta lutuk e’ tih hi kan la ulh mai mai a ni. A chhe lutuk a ti lova, ‘a chhe ta lutuk ta’ a ti mai zawk a ni. A hma kha chuan a tha ang, a hma khan a tha lo a ti lo. Chuvang chuan Pu Speaker, i ding lama thute pawh hian hei hi han chhiar chiang deuh selangin, Resolution tha tak, Ramin a mamawh, kan harsatna sum leh pai nasa taka kan tlakchhiat laia project a kan sum sen belhna te venna tur Resolution tha a ni tih hi hre tlang ila, hawh u i pass ang u tih kha ka’n sawmin ka’n thlawp nghal bawka a ni tih ka sawiduh nghal a ni, ka lawm e.

SPEAKER : Le, sawi tur dang kan awm tawh lo a nih chuan, kan leader, kan Deputy leader kan sawm ang a. Tunge, Pu Z.S.Zuala.

Lt. Col. Z.S. ZUALA : Pu Speaker, ka lawm e. Vawiin Resolution Dr.K.beichhua rawn tih ‘Mizoram chhunga inkalpawhna kawngpui leh leihlawn (Bridge) chhe ta lutuk hi tun aia chak zawkin siamthat hna thawh ni rawh se’, tih hi, a Resolution tum hi chu a that hmel viau a. Mahse a wording kha a hmaa rawn sawitute sawi ang khan a fel lo lai deuh te chu a awm lawm maw ni le. Practical a kan tih leh helaia a rawn sawichhuah dan hi a inmil lo deuh ka ti a ni. Tin, Pu Romawia, kan Minister zahawm tak leh kei te hi hmanlai generation a awm kan ni a. Kan hun lai chuan bawngtawlailira Sairang atanga thil an phurh kan hre pha a. 1956 khan Khuanglengah khian Aizawl atang hian kan kal a, ni 7 kein kan kal a. Hmanni deuh khan Khuanglengah chuan ka han kal leh a, darkar 8-ah kan thleng chho a ni. Chungte kan ngaihtuah chuan a rei viau tawh na a, tunhmaa motor gate system awm lai hmu phak lo tan chuan hriatthiam pawh a har viau ang a. Improvement leh Development hi chu a nasa a. Tin, Mizoram geographical configuration hi kan hriat angin chhim leh hmar zawng hian kan mual te hi a kal vek a. Tin, kan lui te pawh chhim luang leh hmar luang a ni a, Tiau atangin Tuipui a ni a, chutah Tuichang, Tuirial, Tlawng. Chutiang bawka chuan kan kawng laih dan pawh hi kha khan a dictate a. Tin, chubakah a mihring pawh hi Tuichangral leh Aizawl mite hi chu kan inang lo. Tin, Tuipuiral phei chu an dang deuh. Khatiang dinhmun kha a mihring, a society kal dan pawh hi a ni a, kan kawnglah dan pawh hi kha khan a zir a. Tunhmain leihlawn te kan neih that loh avangin Tuichangral leh a thlang lampang inpawh dan te chu a tha vak lo. Tin, khitalai Seling tlangdung leh Aizawl tlangdung phei Sateek, Sialsuk tlang an inpawh dan pawh chuti takin a tha lo. Term hmasa khan Muallungthu atanga Baktawng kalkawng leilawn, Tuirial-a leihlawn Pu Lal Thanzara, Minister zahawm takin a hawn khan kan va tel ve a. Sawngte saw kan sorkarin ngaihtuahna fim tak hmanga khawchhak leh khawthlang inkalpawh

awlsam zawk nan hetiang hian hma nasa takin a la a. Chutichuan khawchhak leh khawthlang inkalpawh dan pawh saw a awlsam sawt a ni, a hnai ta em em bawk a.

Kan sorkar hian tuna kan Chief Minister zahawm tak hoa kan hmalaknaah hian chi hrang hrangin PWD hian kawng hi 4884 kms a enkawlin a maintain mek a ni. Tin, a maintain-na pawisa pawh hi a tlem khawp mai, pawisa 76 ang vel hian 1 km hi a maintain a ni. Heti chung pawh hian kawng tha tak kan nei a ni lawm ni a tih theihin ka ring. Tin, fund kan hmuhna source te pawh hi a tha lo tih kha mi tam takin an rawn sawi tawh kha. Kan Minister, Chief Minister ni bawk hoa hetiang fund tha zawk, regular zawka keimahni state chung atang pawha kan hmuh theihna turin Mizoram Road Fund Board te an din a.

Ka hmaa miin a rawn sawi tawh ang khan contractor-in security deposit an dah, an thawh that leh theih si loh a PWD in road maintain nana an hman theihna turin tih te leh Parking Fee te pawh hi kan road maintain nan hian hman theih ni se tiin theih tawpin hma an la a. Chubakah kan state-in fund, source hrang hranga road a maintain hi a tam khawp mai. National Highway Project hi 33 a maintain a. Heng kawng finance-tu chu hetiang hi a ni. NEC hian project 5 a finance a, tin, NLCPR atang hian project 4 a ni a, NABARD in project 2, World Bank finance in project 2 a ni a. Tin, Asian Development Bank hian 1 a ni bawk a. Chutiang bawkin PMGSY hian project 44 vel an enkawl mek a ni a. Hengte ngaihtuah hian Highway-ah hian leilawn 17 kan nei a, tin PMGSY-ah hian 21 kan nei a. Heng hi kan PWD hian tha takin an maintain a, bridge phei hi chu a tha hlawm khawpin ka hria. Tun hnaia bridge an siam thar Tut, hmanni khawthlang lama kan zuk kala an Tut lei te chu a lo tha tawh khawp mai. Tunhmaa thing leilawn a kan tlan rik phei bawp bawp ang kha a awm tawh lo. Tin, khawchhak lamah Tuirial, Tuirini, Tuipui leilawn an dawh ringawt te pawh khi a tha em em a. Chuvangin leilawn pawh hi kan kal zau deuh lo emaw ni chu aw. Resolution neitupa hi Mizoram hi fang chhuak ta se a Resolution rawn put chhuah hi a withdraw leh duh mai awm mang e aw te pawh chu kan ti rum rum a. Tin, a Resolution hi Mizoram-a all round development a chak lehzuall nan kawngpui leh leilawn te hi chak taka siam that zel ni rawh se, tih ang zawngte hian rawn ti se chu ka amen pui theih mai chu ka ring.

Member zahawm tak khan buai avang hian hma kan sawn a tih kha point pakhat chiah han sawi ka duh a. Sipaiah hian buai avang hian kan tuar nasa em em a ni. Buai lai khan sipaiah a tan theih loh a, sipai tang duh kha an tang thei bawk si lova, tin, a la tur kha an lo kal thei bawk lova, khami avang khan sipaiah hian kan tlahniam em em a. Amaherawhchu, buai a lo reh a, Remna leh Muanna kan neih hnu khan kan thalaite sipaiah an han lut ve leh a, tunah hian kan

recover chho leh tan zawk chauh niin ka hria a. Hmun dangah chuan development, buai avang khan kan nei a ni maithei a, amaherawhchu hemi chungchang ah kher kher hi chuan kan tuar khawpin ka hria.

Chuvangin, hemi a resolution han putlul hi a thahnemngaihna hi a lawmawmin ka hria a. Amaherawhchu, hetiang wording ka han suggest ang khan han ti se chuan ka pawmpui thei mai ang a. Mahse hetiang hi chuan kawng siam leh leihlawn dawha hma an lak mek laia, theihtawpa kan PWD department te leh kan Minister hoa hma an lak mekna a kal zel laia hetiang resolution han pass hi chu nichina kan sawi tawh ang khan a department-te tan pawh a tlawm thlak deuh lo maw tih khan ngaihtuahna a kal a, kei chuan hetiang ngau ngau hi chuan ka pawmpui thei lo a ni e.

Pu K.S. THANGA : Pu Speaker, ka lawm e. A hmasain kan rawn lut tlai a i hnena phalna kan rawn dil angin kan Health Minister zahawm tak Pu Lalthanzara nen Mizoram College of Nursing graduation day leh lamp lighting ceremony, a hminga bialtu ka nihna laiah Falkawn-ah va hmanpui a ngai a, min phalsak a. In thusawi zawng zawng ka rawn ngaihtla hman lova, mahse sawi ve ka duh avangin ka rawn thleng leh hman a, hun min pe a, ka lawm a.

Tin, keini Parliamentary Secretary-te hi dinna hun a vang angreng a, Session-ah file engkim confidential zawng zawng kan hre ve vek si a, han zawh tur a awm mang silova, chhang turin Minister kha a chhangtu tur kha an ni leh bawk si a, chuvangin ka lai deuh riau a, heng hunte hi kan han lak ve deuh mai loh chuan thiltha sawina hun, ngaihtuahna hun te a ni bawk a, chuvangin kan lai riau a, kan ding tlem deuh anga min lo ngaitute tan pawh hian question kha va zawt ve ngawt dawn ila, kan hriat sa kha kan va zawt dawn nge tih lai kha a ni a. Chuvangin heng hi kan tilo deuh a, engpawh ni se, khang kha kan hna dinhmun vang a ni tih kha ka'n sawi duh a.

Hei kan resolution rawn putlul, 'Mizoram chhunga inkalpawhna kawngpui leh leilawn chhe ta lutuk hi tun aia chak zawkin siamthat hna thawh ni rawh se' tih Saiha bialtu MLA zahawm tak Dr.K.Beichhua'n a rawn putlul hi a tum hi enge ni ang aw tih ka ngaihtuah a. A thalo a ti tak tak a, a veia a sawi nge ni, House-ah hian sawi tur an nei lo em mai a, engemaw private resolution han tih a, kan right a ni a, hun kan nei ve a, a ti a, a rawn sawi ve mai nge tih te ka ngaihtuah a. Kan session tan tir lamah khan opposition group leader MLA zahawm tak, Pu Vanlalzawma khan tun sorkara kawngpui tha lutuk tawh avanga toll gate te pawh siam a, tax lak te pawh kha a lo it kha a ni si a, tuna anmahni leh anmahni i veilam amite hi Pu Speaker, an

‘integrity’ hi a thalo hi ka ti a, discipline an nei lo, anmahni leh anmahni an in contradict an in contradict a. Hei hi chu kan la inzir tlang vek tur a nih rualin, hmannah group leader-in kawngpui that zia, vairam ang te pawh khuan chhiah lak ve a ngai tawh a tih kha hei hian a rawn cross a ni.

Nakin zelah khang kha kan fimkhur nan pawh tulin ka hria a. Tin, a thu hrimah opposition kum 10 chhung khan Mizoram hi a zin nasa ber zing ami ka nih ve ka ring a. Chhim leh hmar, chhak leh thlang, kum 10 MLA kan nih loh lai khan i vei lam amite sorkar lai khan kan zin viau a ni. Nichina ka hma lawka MLA zahawm tak Col.Sangzualan a rawn sawi khing khawchhak lamte khi Gypsy kan nei a, 4 door a ni a, chutiang chung chuan diakah khan nem a ngai a, motor kha mihring kan chuan theih loha kan nawrna kha a tam viau a ni. Tunah hi chuan Farkawn tlangdungah te pawh khian han kal leh ta ula, furah pawh in hmu mang tawh lovang. Tin, Champhai tlangdung chho zawng zawng khaw dung chho khi lei hi alo awm thar leh a, tunah phei chuan an zo deuh vek tawhin ka hria a. Concrete lei tha em em tunhma kan thiante ruling laia lei awm miah lo kha tunah hian a vaiin concrete vek a ni tawh a, concrete zau em em mai, motor pawha inpelh theih zur zur khian concrete lei kha 5 vel a niin ka hria a, a awm vek tawh a. Khing aia tihthat leh khi a la duh a ni ang em le tih kha ka ngaihtuah deuh a. Engtia tha lehzual tur nge ni ang, a leiah hian air condition dah sela, han thutchawlh vel nan a nuam ang em aw tih lam te kha a ni ang tihte ka ngaihtuah deuh a, churang chuan helai hi enge ni a tum hi ka hriatthampui chiah lo deuh a.

Tin, kawngpui te pawh tuna a hminga ka Bial Aizawl S-III hi tunhma chuan khaw 23 a ni a, tunah khawpui chhung khua 3 alo lut ve a, 26 a ni a, thingtlang khua saw ka MLA chiah khan, 2008 kum tawpah MLA ka ni a, Muallungthu dai thleng saw black top a ni. Muallungthu saw a khua saw a thleng chiah a, a hma kum chho zawng zawngah khan Muallungthu pawh thleng ngai lovin tuna Falkawn chho te saw, tuna Referral Hospital te dah kan tumna zawng zawng saw sumo passenger-in sumo kha an nawr luh luh thin a ni.

Tuna Resolution rawn puluttu member zahawm takte pawh hi chung lai chuan Aizawl-ah lo kal dawn se, sorkar hna a la thawh lai a ni a, helai tlangdungah hian a lo kal peih reng reng lova, khi lam khawchhak tlangdungah lo chuan. Chung zawng zawng chu tun sorkar kum 5-ah te khan Mizorama kawng tha berah siam chhoh vek tawh a ni a. Tunah chuan khilamah chuan chhungkua leh tih tur pawipang neih loh chuan an kal peih miah tawh lo thung a ni, Tlungvel tlangdungah chuan.

Chutiang chuan hmun tin maiah hian kawng tha leh hmasawna hian min um a. Hetiang ram pachhia atang hian kan sorkar hotute pawhin tih tak takin kan sorkar hnathawkte pawh hi felhlel leh thalo lai deuh te chu a awm maithei, mahse a pumpui thua lak hian kei chu a tha thlawt a ni tih hi ka sawi ve duh a ni. Northeast hi kal lohna ka nei tawh lova; tin, India ram khawpui state lian te hi chu ka tlawh nasa ve viau a, a bik takin Northeast-ah hian Mizoram hi kan tha hle a ni. Thingtlang hmun reng rengah Northeast kan state-pui dangte ho hi a chhe nghal ringawt a ni. Manipur hi helai atang hian chho ula, in hre mai ang a, tikhan Nagaland te pawh va kal deuh ula, Meghalaya te pawh thingtlang deuh hlek va kal ula, in hre mai ang a, chutiang chuan Assam khawpui Gauhati ngei te pawh khu eng eng emaw tiin hun rei tak ka cheng thin a ni, chawlhkar khat aia rei rei te, khumi Gauhati GS road tih sir chhak lawkah te khuan chhe deuh deuh hi a awm reng a ni. Chuvang chuan Mizoram hi nia, MLA te pawh thahnem kan ngai a, mahse phunchiar lutukna hi kan sim a, a ram mipui ang pawh hian kan ngaihtuahna hi tlema kan inen hi a tha ve hrim hrim hian ka hria a.

Chuvang chuan kan MLA zahawm takin a rawn sawi ang khan hmasawna chak taka kalkawngpui tha te, bridge tha te kan neih mek lai hian engemaw tia khawilai emaw duhthusam lo deuh te chu awm thei a ni a, chungte chu menah thlak chinte pawh neih a ngai ve a ni. Hetiang zawng hian ngaihtuahna hmanng ila, hetiang resolution ngai ngai ang hi chu support chiah kei chuan ka ngai lova. Chuvangin, member zahawm tak pawh khan anmahni hrim hrim an thawhpui, an group leader pawh kha inrawn se'ng chuan hetiang hian tih loh tur a tih ve ka ring a. Hmanni lawkah kawngpui that zia leh hmasawn, toll gate te siam a, pawisa lakte pawh it hial leader an neih laia hetia mahni leh mahni inhnial vak vak te kha a zahawm lova, chuvangin, khang kha support theihah ka ngai lova ka'n sawi ve a ni e. Pu Speaker, ka lawm e.

SPEAKER : Pu Robiaka a phar hmasa.

Pu LALROBIKA : Pu Speaker, ka lawm e. Vawiinah private members' resolution kan han sawiho chho hi a ngaihnawm hle mai a, amaherawhchu, heta thil langchiang tak chu opposition party-ah integrity a awmlo hle mai tih hi a ni. Opposition lamte hi tlem tawh nak alaia la inlunguallo lehngal phei chu inthlan lehah phei chuan hei ai hian an la tlem mai awm mang e tih ka lo ngaihtuah mek a ni. Tin, hei kan hotute duhsakna leh mipuite duhsaknain term hmasa atangin kan thu ve tawh a. Chutih lai atang chuan thil tha a nih chuan Congress legislature party hian tute party resolution pawh ni sela kan tihpuitlinsak fo a ni. Term hmasa te pawh khan ZNP party president zahawm tak han thehluh te pawh kha kan tih hlawhtlin sak a ni. Tin, tun term-

ah ngei pawh hian member-te resolution kha kan han tihhlawhtlin sak tawh kha a ni a. Chuvang chuan, vawiina resolution lo lut hi thiam taka thil tum neia buan leh he ram tana tha tura ngaihtuahna nei ni awm taka lang a, ni silo leh inpuhmawhna thil lo awm thei chutiang word hmanga rawn dinchhuah niin a lang a ni. Chuvang chuan, sawi tur tam tak a awm theiin ka hria a, mahse, Pu Speaker, kan hun kha a chep khawp a, sawi tur hi sawithiam a har dawnin ka hria a.

Kan sorkar chak tak Pu Lal Thanhawla hruai sorkar 2008-ah a lo ding chho va. Chumi hma zawng chuan a chian lehzualna turin mahni Bial lamte pawh han sawi ve ila thain ka hria a. 1982 khan Phaileng – Marpara BRTF hoin an siam a, chu mi bak chu MNF ho ram hmangaih tak taktu inti sorkar-ah khan bawngtuthlawh cheh 1 pawh khulai kawngah khuan hmalak a awmlo reng reng a ni. Chumi avang chuan khulai khua ho an mangang em em a, Presbytery thlengin resolution an nei a ni. Amaherawhchu, vanneih thlak takin kan hotute remhriatna vangin NABARD atangin km.80 lai `43.14 crores hmangin tunah hian kan siam chho mek a ni. A harsat lai tak tak, khatih laia MNF president leh Chief Minister a zuk kal tumin Pukzing putar pakhatin a lo dil chu, ‘ka pu, lawngleng min pe rawh, Aizawl lo zin nan,’ a ti. Lawngleng a dil tawp mai a ni, Aizawl kal nan, a chhiat lutuk avang khan. Amaherawhchu, vawiinah hian zuk kal teh u, khatih hunlai khan state transport bus ni se a kal hlei theilo. Vawiinah chuan harsatna pakhatmah a awmlo a ni tih ka’n sawi duh a. He sorkarah hian bial angin kan lawm a ni tih hi ka sawi duh a ni.

Tin, hmasawna chi hrang hrang piah lamah kawng kan sawi rualin CRF fund atangin Aizawl – Reiek – West Lungdar tunah hian hma lak mai theih turin km.37 lai cheng vaibelchhe 11.56 in siam turin contractor te kan han select fel leh ta der mai te hi bial angin kan lawm a. Tin, hemi hma hian Lungphun – Kanghmun engtik lai maha kawng tha hlei thei lo kha siam a lo ni tawh bawk a. Chumai piahlamah chuan World Bank project-II atangin Tuahzawl – Kanghmun – Lawngtlai te hi verification te, survey te tih mek a ni. Pu Speaker, i hriat angin hmasawna kawng lam hrim hrimah leh thil dang infrastructure-ah hian he sorkar leh he party-in a tih loh hi khawi nge awm le? Han ngaihtuah vang vang teh u, ka bialah ringawt pawh hian a hmasa a lo tihlema lo chhe leh tawh ho pawh kha Congress hmasa a tih vek a ni. Chuvang chuan vawiina kan thil discuss laia ka rilrua awm chu hmanlai hla phuah thiam Pi Hmuaki khan hla kha a phuah thiam lutuk a. Khatih laia lal leh upa ho khan a phuah thiam lutuk avangin thangthar ho tih ve tur a awm lo vang tiin a nung chungin an phum an ti a. Tichuan, an phum hnu pawhin, ‘naua te u, nauhaia te u, dim te te in min phum rawh u, min vur rawh u,’ ala ti hram e an ti a. Khatiang deuh khan kan opposition lam khan tih ve tur hi an haihchham deuh mai ang tih hi an hlau emaw ni chu aw, tih hi ka lo hmuh dan a ni. Chuvangchuan, thil tha hi he sorkar hian a ti thin a, tin, hmasawna

chi hrang hranga kan hmuh theih, rural a ni emaw urban area a thil chi hrang hrang infrastructure ah te pawh hian, hmasawanna tam tak kan nei tawh a.

Tin, lui reng reng Hydro Electric siam nan investigation tih loh kan nei lo kan tih ang deuh hlekin, PMGSY ah te pawh a tam mai a, Pu Speaker, i phalnain han chhiar chhuah nghe nghe kan duh a. PMGSY ah te pawh hian (rang deuha han chhiar kan tum ang a, a rei loh nan) Chhingchhip, Hualtu, Phullen, Phuaibuang, Khawlian, Zohmun, Tinghmun, Khamrang, Mualkhang, Chawngte, Hmunlai, Ngengpuitlang, Kawrthindeng, Chawngtetui, Mualbu, Diltlang, Chawngte Lui., Tlabung, Dilubak, Vanlaiphai 'S', Muallianpui, Thenzawl, Zote, Mauzam, Puankhai, Tawipui 'N', Mualcheng 'S', Thingfal, Mamte, West Phaileng, Damparengpui, Zawlnuam, Zawlpui Rd, Lengpui, Hmunpui, Niawhtlang, Chahkhung, Serkawr, Tuipang, Rawlbuk, Lungtian, Theirit, Tuisih, Chhingchhip, Hmuntha, Chhingchhip, Thentlang, East Lungdar, Sailulak, Hmuntha, Khawbel, Rullam, Lungpho, Lungpho, Hmunzawl, Chhawrtui, Vanchengpui, Lengpui, Serzawl, Zohmun, Palsang, Zohmun, Mauchar, Sakawrdai, Zohmun, Khuangleng, Bungzung, Khuangleng, Lianpui, Puilo, Chhawrtui, Chhawrtui, Rullam, Haulawng, Bualpui, Tawngkawlawng, Lawngmasu, Niawhtlang, Chahkhung, Sechangkawn, Vawmbuk, Kawlchhaw, Serkawr, Bungmun, Thaidawr, Bungmun to Mualthum te, PMGSY ringawt ah pawh khangte khan tun sorkara kan hmalak te, tin, NABARD ah te, World Bank ah te, Development Bank te leh state plan atangtein nasa takin hma kan la chho mek a, vawiinah hian vung thar khawi hmunah pawh hian a chhuah terh turh mai a ni. Bamboo road tih lam a nilo, hei hian hmasawanna tam tak a thlen dawn a ni. Chuvangchuan kan opposition lam te khan lo hrechiang ula, helaia ka sawi ang deuh khan, in ngaihtuahna a awm chu kan khawih ve hman lo ang tih hlauhna vang te pawh hi ni nghe nghein ka hre deuh a.

Engpawhnise, helai Mizoram chhunga inkalpawhna kawngpui leh leihlawn chhe lutuk han tih hi, vawiinah hian a chhe lutuk a nilo. Kan Bial atang ringawt pawhin example ka rawn sawi tawh a, MNF kum 10 chhung khan, Pu Speaker, tawi te in. Khami chhung zawng khan, a hmangaihtu in ti, Nationalist in ti khan cheh khat pawh an chek lo reng reng a ni. Khawpui chhung pawh kan hria. Amaherawchu, a neitu an lo kir leh tikah chuan vawiinah hian a that zia hi, group leader pawh khan toll fee pawh kha lak hial a duh a ni tih kha kan hria a ni. Chuvangin, helaia hetiang rawn awm ta ringawt mai hi anmahni party chhungah pawh hian integrity hi a awm lo a ni. Chuvangchuan inthlan leh tur hi chu chiangsa ni mai tur awm angin anmahni zawk hian an rawn tilang niin ka hria a. Pu Speaker, a nihna ang ang hi chuan han pass pui chi niin a lang lo a, lehlamah hi chuan tun hma atangin a lang lo lama ti rek rek chi, chhim lama an kal chuan, hmar

lamah an kal lo ti rawh u, ti chi kha an nih avangin, hetiang ringawt hi chuan keini lam hi chuan kan pass pui ngam ngang lo a ni tih hi ka sawi duh a ni e, ka lawm e.

SPEAKER : Pu Nihar.

Pu NIHAR KANTI CHAKMA : Pu Speaker, ka lawm e. Saiha bialtu zahawm tak Dr.K.Beichhua Resolution, “Mizoram chhunga inkalpawhna kawngpui leh leihlawn, bridge chhe lutuk hi tun aia chak zawkin siam that hna thawh ni rawh se,” tih a ni a. A Resolution move tu nen hian Legislator home-ah kan awm ho a, ka support emaw support lo emaw, chu thu dang ni se, tawite tal sawipui loh chuan a tha lo ang tih vangin tawi te ka lo sawi ang e.

Kan naupan lai, ka pa politics a luh hma kha 1962 atangin Assam sorkar hnuaiiah Gram Savak-in a thawk ve thin a. Min hrilh dan chuan Tlabung atangin Aizawl hi kein an lo kal char char thin . Chumi hun lai ngaihtuah chuan tun dinhmunah chuan Aizawl atangin khawi hmun pawh nikhatah kan ban thei a ni. Chuvangin hemi resolution chhe ta lutuk hi tih hian kan member zahawm tak hian enge a tum tih hi kan hre lo a. Kei hi Tlabung mipui khawngaihna zarah, he Assembly rorelna sang berah hian 1998, ka pa boral hnu khan ka lut ve a. Chulai chu hmanah pawh kan sawi a ni, Tlabung mipui tan Tlabung to Lunglei kawng hi an lifeline a ni. Khumi lai chu BRT ah pawh tha takin an enkawl a, a tha lutuk, khumi line khu, sawiselna pawh ala awm lo a, sorkar hmasa hun lai a ni a. A hnu ah BRTF atangin Mizoram sorkar hian a la ta a ni. Chutihlai chuan keini opposition kan ni a, kan hre vek a, maintenance pawh chutiang lutuk an nei lem lo a, a hnuah hei kan sorkar chho ta a, 2008 ah. Eng eng emaw hi PWD atangin engemaw re-plan na chu kan hmu ve thin a ni a, kan sawi lai, hemi kawng chhe lutuk erawh hi chu an nei ngai lo. Chhe lutuk ni ta se chuan motor pawh a kaltlang thei dawn lo a ni a.

Hei Tlabung mipui aiah sawi ta ila, kan vanduai em maw ni le, World Bank-in an khawih hma chiah khan, Highway-ah an puang ta a, chuvangin an khawih hman ta lo a ni. Hmana an lo laih tawh chu chutiang lutuk a chhia ala ni lo a. Pu Speaker, helaiiah hian kan sawi lan duh chu development hi continuous process a ni a, Tlabung mipui khawngaihna azarah term hmasa a Minister ka nih laiin MLA zahawm tak Pu T.Sangkunga nen China ramah kan zin ho a ni. A kawng chu a tha lutuk, ka rilruin ka ngaihtuah a, ‘E khai! Kan Mizoram kawng hi hetiang hian ni thei se a va nuam dawn ve,” tiin. Chumi hnuah Mizoramah kan lo haw ta a, Mizorama kan lo haw hnu ah ka ngaihtuah leh a, development chu nikhat thil thu pawh a ni chuang lo a, China chu an rei tawh a, an ram din chhuahna pawh a rei tawh a, Mizoram chu China nen khaikhin chi pawh a ni lem lo a.

Kawng siamna emaw engpawh ni ta se, khawvelin kan ngaihpaawimawh chu pawisa a ni. Pawisa a awm loh chuan engmah hma a lak theih loh a ni. Mihring ang zawnga kan mamawh ber chu tui leh inkalpawhna a ni a, nikhat thilah engmah a siam that theih lova, tun sorkarah hma kan sawn chho zel a ni a.

Pu HMINGDAILOVA KHIANGTE : Pu Speaker, ka lawm e. Dr. K.Beichhua Resolution hi a ngaihtuah chiang tawh lo deuh a ni mai thei a, kei chuan siam dawn ila ti hian ka siam hmelin ka hria. Mizoram chhunga inkalpawhna kawngpui leh leilawn chhe lutuk hi a tul lova kan PWD ten an buaipui mek hi a tha tawh tih hi ka resolution tur niin ka hria a ni. Pu Speaker, kan hotu thenkhatte khan hun hmalam an sawi a, pawl kua ka nih kum khan Khawbel hi nikhat a ban kan tum, Pu K.S-a bial Melriat khua atang sawn zing nichhuah atangin kan han kal ta tak tak mai a, a thlen chu kan thleng a, tlai deuh hlekin ka hria. Ka ke hi hmun hnihah a durh a, ka khai va va mai a, thlen loh ka hlau si a, a hmasa berah ka kal a ni. Pawl kua ka nih kumin Khawbel kein ka ban tawh a ni. Vawiiin chuan Saiha te pawh kan ban tlang tawh a, kan riak tha duh tawh lo a ni. Chuvangin PWD leh staff te hian kan kawngte hi an maintain tha tawh a ni tih hi sawi sawi a ngai lo in ka hria.

Manipur-ah operation-in ka han kal a, ‘a kal theih maw?’ ka ti a, kan kal a, darkar 6 chhungin km 8 chiah kan kal thei; kan tang a, kan chawl ringawt a, chaw kan ei ta, chu dinhmun chu Manipur-ah hian a la ni deuh nual a ni. Imphal khawchhung ka kal tam khawp mai a, furah pheih chuan a hrehawm khawp mai. Kan Aizawl khawchhung nen pheih chuan khaikhin chi a ni lo reng reng. Nikum mai khan Assam Regiment center Shillong atangin an Commandant kha a lo chho va, by road-in a lo chho va, ‘Mizoram lo thlen chin chu a nuam hle mai,’ a ti a ni. Chu chu kan ram awmzia a ni.

A figure te te tel lovin han sawi ila, 2008 MLA inthlan hma kum khan he rama hnathawktu tha tak BRTF te kha hnawh kan ti nge kan hre fuh loh zawk Mizoram PWD hnen atang khan kan take-over thei ti khan anni khan lawm takin min hand over a, chu problem chu vawiiin hian kan nei a, amarawhchu chu problem chu vawiiin hian a lang ta mang lo a ni. BRTF in min kalsan a kan zam deuh kha tunah chuan a lang ta lo reng reng mai a. Man power nei tlem zawk mah ni se ram neitu an nih hi a chiang khawp mai, hmun tinah hian lungawi thlak vekin hna an thawh tawh tih a chiang a ni. Tin, hunin a daih loh miau chuan a zawh ngawt theih loh. Entirnan, Tuirial bial ah chuan Serkhan-Bagha

road sorkar kan neih tan atang khan laih chu a ni a, mahse compensation leh thil dangin a nangchin avangin vawiin thleng khuan a laih tur zat kan lai thei lova, amaherawhchu kan laih theihnaah chuan harsatna kan nei lo. Chuvangin kan sawi fo thin angin House zahawm tak chungah hian Hortoki kawng pawh kan buaipui rei, Mizoram sorkar an rawn pek SPA vbc 200 zingah khan 3.5 crore kha year mark a ni a, mahse a tlan bo tak miau avangin a vai khan tu thiam loh mah ni hek lo tihngaihna a awm lova, mahse PWD in crore khat min pe leh a, Rel kawng te a lo kal dawn bawk, Rel kawng siamtute nen remchang kan siam hmel viauin ka hria a, kawng chanve vel khu an rawn siam a nih chuan crore khat pawhin kan daih mai thei a. Khua a that hunah hi chuan kan tan vat dawnin ka hria a lawmawm ka ti khawp mai. PWD te pawhin, 'ka pu, lo lungngai suh,' min tih ve avangin ka lungngai lo a ni tih kha ka'n sawi duh a. Tin, PMGSY te pawh khan Khamrang atanga Mualkhang pawh hi tunah hian an khawih mek a, 'May thla chuan kan zo ngei ngei ang,' an ti a, chungte pawh chu ka'n sawi lang duh a. Tin, kan hriat tawh kan tlan zur zurna Kawnpui to Khamrang, Khamrang to Buichali, hengte pawh hi PWD ten an siam a ni, kawng tawi zawka nuam zawkin kan tlan tawh a ni. Kawng zawng zawng siam tha tur hian pawisa a nei lova, central kan inngahna a ni a, amarawhchu tender an float a, chutah sumdawng lian chi thawh chi te a lo awm a, Delhi atangin an rawn thlir a, Mizoram hi an rawn hre fuh si lo va, terrain awmzia hre lovin an rawn chhang a, an rawn kal, an huphurh leh si a, chungte chu kawngte duh hun huna sial zawh loh a nihna chhan chu a ni.

Leihlawn chungchang pawh investigation chung pawh a rei, hmanhmawh avanga dawh zawh ngawt theih ni lo tih kan hria a ni. Heng zawng zawng kan en hian kan PWD hian an enkawl tha tawk a, amaherawhchu harsatna an nei, shortage of fund an nei, chung chu kan harsatna a ni, a bakah chuan PWD hian harsatna reng reng an nei lova. Chuti taka hmanhmawh taka kawng a chhe em mai ti a kan en chuan kawng chhia reng reng a vaiin tumahin a rualin an repair zo dawn lo, a dawt te tein thawh a ngai a ni. Pu Speaker, kan sawi tawh ang khan kan resolution hi lungngawi tak chuan a pass theih lo va, ka support lo a ni e. Ka lawm e.

Pu LALRUATKIMA : Pu Speaker ka lawm e. Vawiinah Dr. K.Beichhua, Member zahawm takin Resolution pawimawh tak a rawn pulut a. 'Mizoram chhunga inkalpawhna Leihlawn leh kawng chhe ta lutuk hi tun aia chak zawkin siamthat ni rawh se' a rawn ti a, ropui hlein ka hria. Kan ram chung zawng Saiha tlang atangin a rawn vei

vek mai a, a bengvarin MLA viak tha tak leh ram leh hnam ngaipawimawh mi niin ka hria. Kan resolution kha an han sawi viau va, ruling MLA zahawm takten an bial kawng chhia mitthla reng si a sawi an nih avangin sawisel harsa pawh an ti a ni. An bialah an kal ang a, mipuiin an lo chhuahchhal leh dawn a, chuvang chuan krismas hma hian an bial tlawhin an zin ngam pawh ka ring chiah lo a, chutiang vel chu a ni a.

Resolution neitu hian a ngaihtuahnaah hian awm ni a ka hriat ber chu vawiinah khaw hrang hrang YMA leh tlawmngai pawlte JCB nei lo sum leh pai pawh nei lo, tha chauh nei, kawng chhe siam hian an hnatlang zing tawh si a, an hah tawh em mai a, chuvangin chhawk tur hian hmalak a ngai a nih hi, sorkar hi Wheelbarrow ang maia kan awm hi a dik lo a ni, chuvang chuan nawr lirh kan ngai a, nawrtuah i tang ang u a ti a ni. Economic survey, Mizoram 2013-2014 in a tarlan danin road density hi National level-ah 96.57 km/100 sq.km (Approx) in a ni a, chutah chuan Mizoram road density chu 37.03 km/100 sq.km (Approx) a ni thung a, chuvangin tan lak kan ngai nasa hle mai a, nichina i dinglam ami ten kawng kan siam nasa an tih pawh kha a dik ang, kan la ti zel ang a, kan la thawk zel ang.

Amaherawhchu, a awmsa, khawthlang kawng NH 44 A kawnglaih hna Gayatri ten Lengpui, Mamit leh Langkaih kawngah vung an han chhuah a. Tunah chuan an excavator khawl Hitachi crawler mounted kan tih ho, ke chain neihote khu a tuiek zo vek tawh mai a. Khungte khu i nawr nung leh ang u kan tihna ki zawk a ni a. Chuti a nih lova, an chawlh rei lutuk chuan, revise estimate an rawn beisei leh dawn a. Chutiang chu kan ram dinhmun a ni a. Chuvang chuan, working season kan lo thleng chiah a, he working season-a an thawh loh chuan kumthar fur a lo kai leh ang a. Tun atang hian a ni dawn lawm ni thingtlang atanga kan u leh nau te bazar turin an lo kal ang a. Hritlang reng reng leh awm nuam lo sil them thum a Christmas bazar, Aizawl khawpui-ah te, Lunglei, Saiha-ah te an han bazar tur kha han ngaihtuah khan a hrehawm a ni. Chuvang chuan, chu mi hma chuan a thawm hna hi i tan teh ang u a tihna-ah min ngaihsak ula. Chuti a nih loh a, a tul lo ve tih ringawt lam khan min ngaihsak lo ula. Chuvangin, kawng hi an laih mek bakah, kan zawh mek a awm a. Kan laih mek chu kan laih mek a ni kan hrethiam lutuk. Amaherawhchu, kan laih mek piah lamah hian, kan zawh mek te hi cubic lung pawh lo awm se a mam phei put mai a ni kawng tam tak hi.

Zoram dung leh vang han fang ila, nimin lawka Kolasib leh Bilkhawthlir kawng chhiat zia-te, Kawnpui leh Kolasib kawng chhiat zia te leh hnatlang an neih thu-te kan hria a. Hetah Kanhmun atangin han ti ila, khawchhak lam tlangdungah Sialkal tlangdung phei chu sawi pawh

hian a siak lo. Sumo pawh a service tha duh love an ti a, Pu Speaker. Chuti khawp chu a ni a. Chutiang chuan tan i la ang u kan tihna ki kha a ni a. Chuvang chuan, kan bial kawng hi a la chhe lo ve, a lungawithlak a ni han tih kha chu a fuh lo deuh hlek ni khan ka'n hre deuh a ni.

Pu Speaker, a bik takin mahni Bial-te kha kan han sawi a. Assembly-ah ka bial kawng chungchang ka zawt a, min la chhang dawn nge dawn lo chiah chu ka hre lova, zawhna a chhuak dawn nge dawn lo. Keini bial-ah khuan kum 5 chhung kha kawng resurfacing, khatiang maintenance kha a kawng hnuai zawk, Maubawk Hmuia veng, New Luangmual (MHNL) kawng khu kan la khawih miah lo a ni. Chuti a nih chuan naupang kum 5 mi lo ni tawh, khatih laia kum 5 mi khan tunah kum 10 a lo nih leh tawh hian Road Roller hmel pawh hi a la hre lo reng reng a. Sikul-ah a lem ziaik rawh ti dawn sela, ziah ngaihna a hre lovang. Chuvangin, Sikul-a an zirtirtute pawhin kum 10 chin hi chu Road Roller lem ziah tir dawn se hriatloh ve theih tak a ni. Ka bial thenawm ami PWD enkawltu bial lamah chuan a ri vut vut mai a. Kawng hi thal tin mai hian an siam sak a. Min ngaihtuah se, a chhe em a, tun thal chhunga kan tih loh chuan fur a lo kal leh mai ang a kan tihna zawkah khan an beng kha khati zawng khan ngaihtuahna min lo hmansak se thain ka hria a.

Tin, Pu Speaker, October 31, 2014-ah Tlawng Sihhmu lei hi a chim a. Tuipui D Lei avanga harsatna mipuiin an tawh te, Thingsai kawng chhe lutuk avanga harsatna an tawh te, Bairabi a Tlawng lei dawh rei lutuk-te, Sihhmu lei dawh rei lutuk te pawh kha kan hre vek a. Chuvang chuan, kang kha tun thal chhung hian tui tlem lai hian han thawk sela, hna hi tan leh se kan duh a ni. An thawk lova, a tam zawk hi an chawl thup mai a ni. Kan hmuh theih Sihhmu a Tlawng lei dawh pawh khu an chawl a ni, Pu Speaker, i hriat angin. Chu mai a ni lova, kan House Leader zahawm tak bial Mat lei te saw han zawh ila, Indopui II-na vanglai ang maiin a rik hian a ri rum rum mai a. Chuvangin, kang kha siamthat a ngai a ni kan ti a ni. Khang siamtha tur khan tun hun hi ruahtui tlem lai hi a ni dawn lawm ni kan ti a. Lalnu Estheri ang khan tun hun hi a ni dawn lawm ni, fur a lo thleng leh ang a, fur chuan engnge a rawn ken tel? Tuilian bakah Pu Speaker, Malaria a rawn keng tel baw si a, hnathawktute tan harsatna a tam thin a ni.

Tin, Mamit kalkawng Dapchhuah lei an dawh mek bula lei awm sa Bailey Bridge te khu dai fuh ngai ve tak a ni. Dai sual vaih chuan motor ke hi a tla hawlh ve thawh mai ang tih a hlauhawm a ni. Chuvang chuan tun hunah hian i siam tha teh ang u kan tihna ki-ah khan min ngaih sak sela. Chutiang chuan tih tur tam tak a awm ang, kan ti vek seng lovang. Khatiang kha kan dinhmun a ni a, kang kha min hriatsak sela.

Tin, One Ton vanglai te, Bedford leh Jeep leh Jonga kan neih laite ai khan kan kawng hi a tha dawn lawm ni? Tunah SUV motor kan nei a, kan motor pawh power steering, power brake a ni tawh a ni. Kawng kan neih sa tal hi chu theihtawp chhuaha maintain hi sorkarin kan tih tur, kan mawhphurhna ni tlat hian ka hria a. Chuvang chuan, Pu Speaker, kan Resolution neitu hi a bengvar a ni, a titha khawp mai tih hi ka'n sawi nawn duh a.

Tin, Burma kawng nen kha chuan tehkhin theih pawh kan ni lo Pu Speaker. Kan kawng kha a inthlau tur a ni. Engkimah kan inthlau a ni. A chhan chu sipai rorelna hnuaiah rei tak an awm a. Tin, kan kawng chhial chhan zawng zawngte kan sawi a, kan ngaithla tam tawh. Amaherawhchu, ka'n sawi duh chu 2012 – 13 chhunga kan Scheme of Financing a kan Annual Plan, Special Programme for Road Development ` 200 crore kan hmuh loh te kha Plan sum a ni si a, han hmu phei ila chu wawiina Resolution hi putluh a ngai lo tur a ni a. A hun lai khan kan lo ti si lova. Planning Commission member, Chaturvedi pawh khan hmanhmawh a ngaih thu kha a rawn ziak a. Khatiangte kha kan dinhmun a ni a, mahse, kan ti si lo. Chuvangin, tun hun hi a ni dawn lawm ni? Kan la tlai hma-in, working season a ni a. Zoram dung leh vang kawng hi repair a ngai a ni, i repair ang u, i thawk ang u. Kal la, thawk rawh tih ang khan tun huna kan thawh loh chuan Pu Speaker, kan tlai thei. Furin min rawn nang leh mai ang a, harsatna kan tawh thei a ni. Heng hian motor mai a ni lo, thil phurh man te, hriselna te a rawn keng hrim hrim a ni.

Kan member zahawm tak Thorang bialtu khan a rawn sawi tawh. A Bial mipuiten an rawn sawi chu, Thorang bial kawng thenkhatah chuan vawkpui pawh kal se fur lai phei chuan a tang an ti a sin. Chutiang khawpa kawngchhia chu siamthat a ngai a ni. Kum 10 chuang MLA a ni tawh, ngaihsak an ngai a ni, ngaihtuahpui an ngai a, tanpui an ngai a ni tih kha ka'n sawi duh a. Tin, West Tuipui bialtu zahawm tak khan a rawn haw phei apiangin ka sil vek zel a ti a, ni hnih ni thum chu chhuti lak a ngaih thu te pawh kha a sawi a. Chumiin a entir chu motor a chuanna a insawh nasat lutuk avangin a sil a ni zawk a ni. A sil tawh lohna turin, a rawn thlen tuka hna a thawh theihna turin ngaihtuahna kan hman kha a tul takzet zetin ka hria a. Chu chu thahnemngaihna thilin ka'n sawi a, Resolution hi ka'n support a ni e.

SPEAKER : Kan Minister zahawmtak Pu Lalrinmawia kha a u fapa Aizawl Hospital-ah a boral a, chuvang chuan a chhuak a, House-in hriatpui ila, pawh kan tihpui khawp mai. Tunah Pu Lal Thanzara lo sawm ila.

Pu LAL THANZARA, MINISTER : Pu Speaker, ka lawm e. Member zahawm tak Dr. K.Beichhua Resolution, ‘Mizoram chhunga inkalpawhna leh leihlawn (bridge) chhe ta lutuk hi tun aia chak zawkin siamthar hna thawh ni rawh se,’ tih a rawn thehluh hi kan sawi mek laiin a MLA pui khan tunah khan a rawn siam danglam sak a. Kan bial kawng thenkhat chhe ta lutuk leh leihlawn thenkhat chhe ta lutuk hi tun thal chhung hian siamthat a ngai a ni tihna-ah min ngaih sak rawh u a rawn ti a. A rawn thlak danglam sak a, a lawmawm khawp mai.

Hemi Resolution ang hian kan kawngpui-te leh leihlawn-te hi a lo chhe ta lutuk a, chak zawka siam that a ngai a nih chuan a mawhpurtu chu MNF ministry kum 10 chhung ami kha an nih ka ring. Khatih hun chhung khan engmah siam that a awm lo a. An thawh chhun chu BRTF ta an lak sak Bawngkawn leh Durtlang inkar kawng hi a ni. Tichuan, kan sorkar a, kan term hmasa-ah khan Aizawl khawpui chei nan kan Chief Minister leh UD & PA Minister chak tak ten hma an la a. Vawiinah chuan Aizawl khawpui kawng hi hetiang tluk hian eng ministry hun lai mahin a la tha ngai lo. Tin, a khawpui kawng dung pawimawh lai mai ni lovin, a penhleh te thleng Pu Speaker, vawiinah chuan black topping-a tihthat vek a ni tawh a ni.

Tin, chumi piahlamah chuan kan hotuten an sawi tawh a, kan member pui ten Kawnpui kawng, Sairang atanga kawng te khu tun hmaa kan la hmuh ngai loh a ni. Chuvangin, kan enna tarmit hi kan vuah fuh loh tlat chuan sawi tur te chu a awm lo thei lova.

Tin, PWD hian kan kawng thui zawng hi Mizoram chhungah hian kan record danah chuan km 7548 a ni. Tin, hetah hian Mizoram PWD in a enkawl bik chu km 5870 a ni. Tin, Mizoram PWD in a enkawl zingah hian National Highway a tel bawk a. Tun dinhmunah hian Mizoram kawngah hian tuna member zahawm tak Pu Lalruatkima’n a rawn sawi kha, kan thu lakna a inanglo deuh hlek a ni mai thei a. Ani khan 7800 a tih laiin keinin 7548 a ni a. Engpawhnise, a inthlahna a tam lova. Tin, hei Mizoram pumpuia kawng hi per Sq.Km ah khan anin 37 a tih laiin keinin 35.8 a ni a. Tin, chutih laiin national average chu Sq.km ah chuan km 129 a ni a. Chutih rual chuan national level kan pha lo lutuk hi a han ti a, thahnem a ngai kha a lawmawm ka ti. Kum 20 chhung rambuain min chenchilh a, engmah hmasawanna hna a thawh theih loh va. Chuti chung chuan Congress sorkar term khat kan han sorkar a, tunah kan han sorkar leh a. Tiang taka kan han thawk chaka min han duhthawhpui chho, national average te hial tluk thei tura duhthawhna a han nei thei te kha a lawmawm takzet a. Kha kha Congress sorkar-in kawngpui lamah an thawh that zia tihlanna a nih ka ring a ni.

Tin, Aizawl leh Silchar inkarah hian kal ula kawng a chhiat tan chiah chuan Assam a ni tih a hriat mai. Chutiang zelin Aizawl leh Manipur lamah kal ila, kawng a chhiat tan chiah hian Manipur state a intan tihna a ni. Chutiang zelin nichina kan sawi ang khan khilam chu sipai sorkarna a ni kan ti a nih pawhin Mizoram atangin Burmaah kal ula Burma intanna in hriat theih dan tur chu kawng a chhiat tan chiah khan a ni.

Tin, Tuikum Bialtu zahawm tak khan thahnemngai takin a thianpa resolution kha a rawn thlawp a. Amaherawhchu, hengte hi chu a hre ve thovin ka ring a. Chhingchhip leh Thentlang inkara Tuikual lui inkara leilawn dawh hi remchang hmasa berah ama ho hian hawn kan tum mek a ni.

Tin, kan Home Minister zahawm tak Saitual leh Saichal Tuivawl lei hi bialtu Home Minister a hman hunah hawn tura beisei a ni. Tin, Chhingchhip leh Hmuntha kawnga Tuikum lui leilawn pawh hi zawh tawh a ni a, approach road a la fel loh avangin chuta tan chuan sum kan la hmuh loh avanga la hawn loh mai a ni a.

Hmanniah vanduai thlak takin Tlawng luih leihlawn a chim a. Chutih laiin Darzokai leilawn te dawh chak tura nawrtu pawl thahnemngai fal te an awm avang mai a, vawiinah kawngpui leh leilawn chhe ta lutuk hi chak zawka siamthat hna thawh ni rawh se han tih phahna tur a ni dawn emawni le? Chanchinbuahte kan hmuh ang leh Chanchintharah te an rawn puan tawh ang khan khulai Airport kawnga Tlawnglui leilawn a chhiatna chhan pawh kha mi thenkhatten part pawimawh an lo ruk vang a ni a, chung avanga leilawn kha chim a ni a. Vawiinah hian PWD lam chuan chak takin hma an la mek a. A bungruate pawh an lakhawm vel mek zel a. Tin, chutihlai chuan Tuipui leilawn chungchang kha Bialtu MLA zahawm tak pawhin a sawi tawh a, hei hi first installment chauh kan la hmu chungin an sanction tawh atangin nuai 131.43 hmuh a la nilo chungin sorkarin a ngaih pawimawh em avangin, state plan fund atangin a pek belh nuai 79.89 lai heta tan hian a pukin a pek belh nghe nghe a ni. Chutiang chuan vawiinah sorkar hian Pu Speaker, leilawn chhiate hi a ngaipawimawh a thahnemngai takin hma a la mek zel a ni. Chuvangin tun hunah inkalpawhna kawngpui leh leilawn chhe ta lutuk ti a Resolution hial han putluhna tur chi a ni dawn emaw ni le! tih kha ka ngaihdan a ni a.

He Resolution hi han thlawp theih chi ni pawhin ka hre lova. Kan sawi tak ang khan PWD hian leilawn a enkawl ringawt pawh hi 17 a ni a, PMGSY hnuaiah hian

leilawn 21 vel a enkawl bawk a ni. Tichuan a vai chuan leilawn 38 enkawl lai mek a nei a, leilawn 17 leh PMGSY ah 21. Chung zing ami chu tunhnaiah vanduai thlak takin pakhat a chim a, pakhat thahnemngai fal deuh ten dawh chak turin engtin tin emaw an han nawr a. Hengte avang mai mai a vawiinah hetiang Resolution a rawn lut hi a vanduai thlak hlein ka hria a.

Tin, crore 200, scheme of financing tih hi mi pangngai tan chuan sawi fo chi niin ka hre lo a, hei hi Central-in pek min tiam a, North-East tan. Amaherawhchu sum harsatna vang nge, North-East State tumah hian he sum hi an la dawng lo a ni. Hengte hi chu dawn kan duh em em a keini pawhin, lo dawng ila chuan vawiina Resolution te pawh hi a rawn lut lo maithei a. Engpawh ni sela, kan ngaihthlak tak ang khan Pu Beichhua Resolution chu a thianpa Pu Ruatkima'n kan bial chhunga kawng thenkhat a chhe zual deuh te hi thal chhungin min siam that sak hram teh u, kan tihna mai a ni e a ti a. Tiang chuan vawiinah hian PWD in chak takin hma kan la dawn. Tlawng lei, Bairabi Bridge te pawh hi kan chawlhsan lo, khulai Sihmui Bridge pawh kan chawlhsan lo, hmalak mek a ni tih kha Pu Speaker, he House hi ka'n hriattir duh a. Chuvangin kan member zahawm tak Dr. Beichhua Resolution 'Mizoram chhunga inkalpawhna kawngpui leh leilawn (Bridge) chhe ta lutuk hi tun aia chak zawkin siamthat hna thawh ni rawh se' tih hi chu vawiinah hian han pass pui leh han thlawp thei ngaihna ka hre lova ni. Ka lawm e.

SPEAKER : Pu T. Sangkunga

Pu T. SANGKUNGA : Pu Speaker, ka lawm e. Hei vawiinah hian kan member zahawm tak Dr. Beichhua hi ka lawmpui khawp mai a. First timer kan ni tlang a, Budget Session hmasa berah Resolution move tur a nei tlat mai hi vannei ka ti a, experience tha tak a neih ka beisei a. Kan thianpa bawk Pu Lalruatkima pheih hi chu indah hranna awm hek lo kan Sorkar-ah chuan a Resolution kha kan han pass rup mai lehngal a, mi vannei pahnih an la thuin ka hria a, ka lawmpui takzet zet a. An resolution hi kan Sorkar chak zia an rawn hmuh hian thahnemngaih vanga rawn move te pawh niin ka'n ring a.

Hei vawiinah chhia leh tha hi khawi atanga teh tur nge aw tih te ka lo ngaihtuah ve mai mai a. Kawngpui, tunhma kan kawng awmdan te kha tam tak an sawi tawh a. Thil pakhat chiah han sawi ve ila. Pu Zuia, SDO, min kalsan ta DC Office a mi thin kha Vanbawng

VC ten Vanbawng kawng hawng turin an rawn sawm a. A lo haw chu an lo zawt a, “Ka pu, i kawng hawn chu enge a an?” DC staff te chuan an ti a. “America jeep siam thar hi Gabrielan khalh ta se, Imanuela chuang baw se a tlang ka ring lo ve” a ti a. Chutiang kawng chu a ni a Vanbawng khi. Mahse tunah chuan a bialtupa ka bula hi a thu a Member zahawm tak, ‘enge Vanbawng kawng a an,’ ka ti a, ‘rulngan pa ang deuh zar a ni,’ a ti a. A chhe ta ni lovin hma a sawn zel a ni tih kha a hriat a. Chuvangin, tumah dem tur an awm lova, Gabriela te khalh pawh tlang lo tur kha sorkar lo awm zel ten an siam zel a chutiang chu a lo thleng ta tihna a ni a. Chuvangin, ‘Hma an sawn zel e en ru’ tih hla hi sa awm tak niin ka inhria. Kan kawng te hi hma a sawn zel, a tehna dan a zir hian thil a awm mai mai a ni. Dik taka lak chuan tihthat duh vek sorkar kan nei a, PWD pawh an tang reng a, kan engineer-ten theihtawp an chhuah zel a, chuvangin, a tha chho zel. Duhthawhna avangin, thahnemngaihna avangin ka pu hian a rawn move mai mai a ni tih hi ka rindan a ni a. Nizan pawh phone-in kan inbia a, ‘e, tun term hi chu chhinchhiahtlaka tangrualin i thawk tha ang u’ a ti a, khatiang khan a rawn thahnemngaihna takzet zet niin ka hria a, ka hlim khawp mai a. Tunhma Assembly awm tawh zawng zawng aia tha neihpui tura insawm kan ni a, keini thiandun hi chu, a lawmawm hlein ka hria a.

Tin, kan kawngte hian, tu sorkar pawh ni se, harsatna tawh thei a nihna chhan hrang hrang a awm a. Pakhatnaah chuan BRTF kut atanga state PWD in a han lak khan project thar siam a ngai a, gap a awm tur a ni. Tunah pawh Bungtlang to Farkawn khi an la thar a, ka nawr ka nawr a. Kan Chief Minister zahawm tak pawhin a koh khawmnaah BRTF lo kal te ka sawipui a. PWD kha chuan la la reng se, khi a bul te pawh a la tha hlawm em em a Khawbung-Bungtlang te pawh, Bungtlang atanga BRTF lak a chhiatna chhan khi chu BRTF an chhia pawh ni chuang lovin project an siam a ngai tlat mai a. An project kha an la rawn sanction tlat lo mai a ni, Surface Transport leh Develoment Ministry-in. Kha vang khan tikhian a awm reng mai a, ‘ngawi ru, pot hole leh eng eng emaw khi chu han hnawh teh u,’ ka ti a. Hmanniah ka ngen a JCB Thekte lama mi an rawn tiphei a an truck nen, an hnawh ve a. Khatiang khan sanction a awm tlat loh chuan han tihthat chiam theih a ni lo. Hetiang hun inthlakah hian PWD an ni emaw, BRTF a ni emaw harsatna an tawh thin.

Tin, kawngte chu tunhma ngaihtuah chuan a that zel zia hi ngaihtuah ta ila, England ramah khuan jeep an siam hmasak ber tum chuan mipui khan an ning lutuk a, a rawn kal ve ringawt mai kha. Dan an siam a, an dan siamah chuan darkar khatah mel thum bak a tlan tur a ni lo. A tlanin a hmaah mi pakhat, ‘motor a lo kal e,’ tia au zel tur kha a kal ngei ngei tur a ni an ti a. Tunah chuan kan mamawh em em tawh a, a hmaa mi pakhat kal zel ngaia kha England-ah te pawh an dan siam a ni a. Chuvangin, ka ngaihdan chuan a thawktute tiphur zawng kal hi a tha. Tunah sawisel ta

ngawng ngawng ila kan engineer te, kan Minister te, an phurna kan tihchhiat ka hlau. Housing Allowance dila Delhi-a ka cham reng tumin ka duhthawh lutuk a, Central a confederation hotuten “In MP ruai mai rawh, Parliament-ah pu lut rawh se.” an ti a. Dr. Rothuama kha ka ruai a, a theh lut ngawt mai a. A hmaa min duhsaktu officer zawng zawngte ka va hmu leh chu ‘Parliament question-ah in MP in a pulut tawh, sawi tur a awm tawh lo,’ an ti a. A hmaa min pui nasa em em ho kha an biak theih tawh lo reng reng. ‘Lo kal duh tawh suh. Parliament question-ah a lut, Parliament a kan Minister te chhan dan a ni ang chu,’ an ti a. Pek loh tur khan an chhan tir a, an ziah sak a, biak pawh kan va be thei tawh lova. Chuvangin, a phur zawngin kan pu te, kan engineer te hi ti ila kawng hi chu a tha tial tial ang tih hi kei chu ka ngaihdan a ni a.

Tin, nula hmeltha te pawh hi hmuh a zir a ni. Kha, nichina an rawn sawi ang chiah khan, he Sorkar Assembly term-ah kan MLA te MLA an rawn ni thar a, khawpui an zu fang a, tunhma British hun laia an lo laih tawh ho kawng kha an zuk hmu a, helaiah an rawn sit mai mai a ni. China a han hmu a ka pu pawh khan helai kawng kha a rawn sit tlat mai a ni, a chhan chu kan hmuhte a zir hi a ni a. Ka thianpa Contractor pawhin ka hlawhfa chhawrte chu thlathum Tuikuk rama kan han awm chuan Tuikuk nula zingah khuan phuloh an hmu zut mai a ni a ti a. Chuvangin hmuh a zir hi a ni a. Tin a chhiat leh chhan leh kan chak lohna pakhat chu buai kha a ni a, ka thianpa Contractor in min hrilh chu CPWD atanga deputation Chief Engineer reng reng khan a hmunah an en ngam lo va, dawhkanah estimate an siam a, dawhkanah an bill a, culvert thlawk bo te a tamna kha an rinnaah culvert an siam tawp mai a, bill dawn leh khan an va kal ngam bawk si lova, an bill leh ringawt a. Khu NEC road zawng zawng tetna chhante pawh khu KDZK road te pawh khu buai vang vek a ni a. Returnee-ho kha contractor an ni a, in an sak leh an sawisel deuh leh ka namthla ang che an ti mai a, an pa em em mai a, buaiin a titha tih te chu. Khatiang kha kei chuan a mihring tak pawhin ka la hria a, chuvangin rambuai khan kan hna hi a tichhe em em a ni tih Chiang takin ka hria a. Chuvangin kan kawng thatna tur hian tangtlang ila, lungrual tak hian ti dial dial ila, kha ka thianpa kan MLA zahawm tak Er. Lalrinawma phei chu PWD enkawltu bulah hmanni te pawh thil kan sawi dun a. Kan Home Minister bulah buh a han seng bawk si a, kha leilawn an hawng dun leh dawn a nia, vannehna hian a pawngsual ni ringawt hian ka hria a, ka bialah chuan pakhatmah hi min hawn sak ve lo reng reng a, (Speaker : I hun i hmang zo mai dawn a nia) A tawp tep Pu Speaker, ka bialah hian kan puten, kan PWD changtuten min hriat sak reng ka duh chu Dungtlang to Khuangleng khi chu min han tihthat sak lehzual sela tih ka duh a. A lehzual kha a nia, tunah pawh a tha em em tawh a, khawchhungte an ti deuh vek tawh a, hmasawn zel tur kan ni a.

Tin, a Resolution-ah hian han lut ta ila, hetiang hian ti ta zawk sela, an rawn sawi nak nak atanga ka lo khaikhawm dan chuan ‘Kan sorkar chak tak hmalakna azarah Mizoram chhung inkalpawhna kawngpui leh leilawn te hi a tha sawt hle a, chuvangin helam kawnga hma latu kan sorkar chak tak chungah he House hian lawmthu a sawi a. Duhthusamlo laite pawh siamtha zel turin chak takin hma la se kan ti,’ tih niin ka hria kan sawi dan ka lo khaikhawm khan. Chuvangin Pu Speaker, khatiang deuh khan amend ta ila chuanin kan dinhmun nen hian a inphu tawk awm mange aw tih hi ka ngaih dan a ni, ka lawm e.

SPEAKER : Awle, wawiin hi Private Member’s Day a ni a, dan naranin dar 4:00 ah kan bang thin a, Sorkar business a nih lem loh avangin. Amahrawhchu, kan Leader berin kan discussion kha a la wind-up lova, kan la chhonzawm rih lo thei lo em? Engnge ni House ngaih dan? Dar 4:00 a ri mai dawn a. Aw kan tui tlang a, engpawh ni se, a tha ni se. Tunah chuan kan Leader kan sawm tawh mai ang a, kan discussion wind-up turin.

Pu R. LALZIRLIANA, MINISTER : Pu Speaker, ka lawm e. Wawiinah hian MLA zahawm tak Dr.K.Beichhua resolution “Mizoram chhunga inkalpawhna kawngpui leh leilawn (Bridge) chhe ta lutuk hi tun aia chak zawkin siamthat hna thawh ni rawh se” tih hi a wording, a ziak atang hrim hrim pawh hian a dik lovin ka hria a. ‘Inkalh’ hi chu Block emaw engnge ni lock emaw a nih a inkalpawhna tih tur ni awm tak a ni a. Chuvangin helai atang pawh hian a phusui lo deuh hlein ka hre hrim hrim a, chuvangin kan ngaihtuah chian chu a ngai hlein ka hria a. Chutiang a nih lai chuan sorkar-a beiseina thui tak kan opposition ten an rawn nei hi a lawmawm ka ti a. Resolution pawmpui loh avang hian kan kawng hi a tha ta hle e kan tihna erawh chu a ni lo tih hi min hriatpui a thain ka hria a. Tin, hmannah Sihhmu leh Airport inkalpawhna lei a chim a, hetiang bawh hian sorkar hmasa lamah khan Buichali- Sairang leh Lengpui inkalpawhna lei a chim a. Hetiang hian Resolution hi kan pulut ve rum rum hranpa lova, sorkar-ah vanduin a lo thleng a ni, kan ti a. Khalai pawh khan kan han puhmawh ber chu misualten a kilhna an ruk bo avang kha a ni. Kha kha tuman kan awih loh sak lo, wawiinah pawh hian misualten a kilhna 46 lai an lo ruk bo avanga kha lei kha chim a ni tih kha kan pawm dan ni sela, chu chu thudik a ni bawh a ni tih ka sawi duh a ni.

Kan MLA zahawm tak engemaw zatin an rawn sawi a Resolution hi, amaherawhchu pawmpui a harsa awm mang e an tih khan an bial kawng kha a tha ta em em e an tihna erawh chu a ni hranpa chuang lo tih kha ngaihtlatu bial mipui te pawhin an lo hriat a thain ka ring a. Chuti lo chu kan bialtute hian hetiang hi min lungawipui mai a nih hi an ti thei a ni, khatiang kha thil

awmzia a ni a. Tiang chuan tuna kan han sawi tlangpui kha National Highway a ni deuh tlangpui a, amaherawhchu national highway hian Mizoram khua a chanve pawh a chhun lo a ni tih hi kan hriat a pawimawh a. Chuvangin a vaia kan ngaihtuah tlan hi a pawimawh hrim hrim a ni. MNF sorkar lai nichinah an sawi a, BRO hnen atanga lak a nih kha an zu dil a, an rawn pe emaw, anniin Central lam atangin an rawn pe lui emaw, engpawh kha ni sela khami hnu khan kawng an en tha duh tawh lo va. Tin, helam ami ten dik tak chuan kan lo chak baw si a. Khatih laia Chief Minister-in a sawi ka la hriat reng chu ‘vawiinah hian hna kan ngah lutuk dawn a, contractor tam tak ka mamawh dawn a, contractor mi singkhat ka mamawh dawn che u a ni,’ a ti a ni. Chuvangin BRO ten an rawn pe kha hei chu kan tlin lovang tih lam aiin hlawkpuinan hman an tum lutuk vang khan kan ram kawng hian nasa takin a lo chhiat phah ta a ni tih kha kan pawm dan ni sela a dikin ka ring a.

Tin, a thu hrimin kan ram PWD a ni emaw Department dang a ni emaw, kan thil tih reng reng development kan siam hi mini, state dang aia te deuh, state dang aia nep deuh, tun hmaa kan thil tih hrim hrim hi a dik ka ti lo va. Vawiinah pawh hian kan lei design te, kan kawng design te, a engkim mai hi ton chuti zat chu a phur a, ton 80 chunglam a phur a. Chutiang phurhna tura he kawng hi siam a ni lo tih ang chi te kan ngah lutuk a, hetiang hi a diklo a ni. Khulam Zawlnuam kawng te kan hria a, a phurh zat tur aia rit a phurh vang a ni kawng hi a chhiat hma ni kan ti a, hei hi chhuanlam a tling lovin ka hria a. Vawiinah hian state dang tluk mai nilovin state dang khum kan tum tawh a. Chutah chuan teak tam tak tun hma District Council hunlai atangin kan ching a, MNF hunlaiin hralh theih miah lovin a awm a, vawiinah kan sorkar chak takin hralh theihin a siam a. Chutiang chuan development-in a rah chhiat a ni, kan kawng te hi, chuvangin kan kawng kan design te, plan estimate kan siam te reng reng hi hnam dang tluklo tur nghala siam tawh lo hian hma la ila a thain ka ring a.

Tin, kan kawng siam te reng reng hi kan engineer-te an thiam tawk a, a thawktute an tha tawk a, amaherawhchu, kan leilung hian a zir lo hrim hrim, kan balu a fai tawk lo va, a tha tawk lo va, kan tiau a chang tawk lo va, kan lung a chang tawk lo va, chu chuan state dangte kawng tlo ang hian kan ramah hian a dik takin alkatra leh thil dang a bitumen hi hmang mah ila a tlo dawn lo a ni tih hi chu kan hriat a pawimawh a. Tin, state dang aiin ruahtui kan dawng hnem zawk a, he ruahtui hian nasa takin kawng a thuah thin a, side drain te a hnawhping a, tiang chuan kan kawng hi nasa takin a chhiat phah thin a ni.

Tichuan, kan mipuite hian a hrim hrimin kan hnamzia hi kan kalpel ta lutuk a. PWD in an lak ngai reng reng loh kawng te takte pawh an rawn la a, lawm taka lo puith tak

a ruangin hnathawhpui tum reng reng kan awm tawh lo, kan kawng a lo chhe deuh a, YMA, NGO te an hnatlang a, phut nei ranin, tai nei lam kan tih ang deuh hian kan han hnatlan ve pawhin tute emaw dem nan, tute emaw mualpho nan lo chuan hna kan thawk peih ta meuh lo hi kan hnam zia kan kalsan thui lutuk ta niin ka hria.

Nichinah kan ngaithla tawh a, Darzokai te pawh saw PWD emaw, Mizoram sorkar kut a ni lo, chuti chung chuan a bial mite, kan Chief Minister te, a bialtu MLA zahawm tak ten an hmangaih a, theih tawp an chhuah a, sum awm lo ata sum an siam a, kan sorkarin an dawh ta a, chutiang chu lawma puih a hnekin an tum hunah an zo lo an ti a. PWD hnathawh emaw, hnathawh lian Tuirial Hydel Project te a hunah kan zo em? Kan zawh loh avangin tu nge nuar awm? Helama mite hi engatinge a bial neitute saw hetiang a nuar a Sikul te an khar a, Office te an khar a, NGO inti ten hetiang a ti mai mai hi a diklo hrim hrim, sorkarin a tuar dawn lo, anmahni bial, an khuaten an tuar dawn a ni. Nakin lawka dawh zawh mai tur saw nawrhna te a awm chuan a thawktu hnamdangte an ni a, hlauhna te an nei a an muan phah zawk dawn a, a chawh tur leh a tuar tur chu a bial mipui an ni tih kha ka sawi duh a ni.

Kan sorkar pawhin kawng siam nan PWD hi nasa takin a vulh a, tun plan-ah khan in hmu ang a, sum chu a tam a ni kan neih ang chhun chhunah chuan Department dang aini. Chuvangin, kawng hi he sorkar hian a ngaipawimawh em em a ni tih Pu Speaker, a hriat theihin ka ring a. Chutiang a nih lai chuan Department dang hi kan lo chawl ang e, plan holiday kan nei mai ang e tiin helamah hian ti vek ta ila chu waviinah hian kan opposition-ten an duh ang hian kan engineer-te hian an siam thei mahna. Mahse, Department-ten chutiang chu tuman an phal dawn lo a ni, theihtawp chhuahin kan sorkarin sum a zawng a, central lamah te, NLCPR ah te, NEC ah te, NABARD-ah te a zawn theihna apiangah sum a zawng a, chu mai bakah India ram pelin World Bank-ah te waviinah hian sum a zawng a ni. Kan theih ang tawkin sorkar chu kan tang a, kan theih ang tawka kan tan piah lamah hi chuan tumah hian min phut biklo sela, Pathian pawhin kan theih ang tawka engkim kan tih hi min phut a, kan theih tawk piah lam hi chu min phut bik lo va. Chuvangin, inphut chin tawk te pawh hi awm thei se chuan a tha awm mang e ka ti a.

Mizote kan changkang chak em em a, khawvel ramdangah te kan zin a, an kawng that zia te kan hria a, an changkan tawh ziate kan hria a, State intodelh-ah India

ramah pawh kan zin a an kawng that dan te pawh kan hmu a ni. Amaherawhchu, anni chuan anmahniah resources an ngah a, tuialhtheiah te, electric-ah te, thil dang kawngah ringawt pawh sum an hmu hnem tawh a ni. Chutiang atang chuan a siamna an neih vang a ni. Keini chuan chu chu kan la phak lo deuhhleik a, kan phaktawkah hian lungawi thiam ila. Mahni nihna hre lo, mahni phaktawh hre lova awmte hi an chesual fo thin a ni. Rukruknaah te, tualthahnaah te, mahni insitnaah te hian an kal thei a ni tih hi hre tha leh zawk ila thain kan hria. Sorkar hmalakna hi a tawh e tumahin kan ti hranpa lova, hei aia nasa hian theihtawp kan chhuah zel dawn a ni. Chu kan theihtawp chhuahnaah chuan a ngah hi i peih zawk ang u kan ti a ni. Rambuai te kha hma kan sawn phah a ni ti te kan awm a.

India ram pawh hi independent an sual khan tharum an thawh lova, India chu khawvelah nakin lawkah chuan a chungnung ber te zingah awm kan tum tawh a. Tin, state dang 28 te pawh hi tharum thawh a, independent sual lova state nei vek kan ni. Chuvangin, heng state te changkan zia hi hria ila, rambuai hi kan ram hmasawmna a ni hranpa lo ve ka ti a. Rambuai kan ram hmasawmna anga kan sawi vak chuan, vawiina leader te hian kan tih vak chuan kan thalaite hi hel turin kan encourage a ni. Hel kan sawi mawi tihna a ni ang tih a hlauhawmin ka hria. Chuvangin, kan tawngte hi fimkhur tlang deuh ila thain ka hria a. Pu Speaker, sawitur chu a la tam mai a, amaherawhchu, kan hun kan bawhpelh tawh avangin vawiinah hian Dr. K. Beichhua MLA zahawm tak hian a Resolution hi withdraw mai se thain ka hria a ni. Ka lawm e.

SPEAKER : Khai le, a neitu Dr. K. Beichhua sawm ila.

Dr. K. BEICHHUA : Pu Speaker, ka lawm e. Vawiina ka Resolution ngaipawimawha member 20 in tui taka min sawipui avangin lawmthu ka sawi a. Tin, ka Resolution kha kan House Leader khan inkalpawhna tih kha a dik love a rawn ti a, ka submit-naah chuan a dik thlap a ni. Printing mistake a ni a, a lo tisualtute he House member zahawmtakte hnenah ngaihdam ka dilsak e.

Awle, Pu Speaker, he Resolution ka rilru ah a rawn chhuah hian Party a langlo a, ka rilruah tunhmaa rorelna a langlo a, tun ami a lang lova, naktuka kan ram kal zelna tur ka rilruah a lian zawk a. Vawiina keini party nangni party tiin he Resolution hi ka rilruah hian a awmlo tih ka sawiduh a. Chutih laia kan han sawi a bul phat atanga ka

rilrua lang ka tih deuh chu vawihuih rim nam a, a va uih ve kan ti a, a vawihthu kha chu ngawi hle hle mai selang chuan tuman a vawih tih an hre lo tur, a vawihthu kha ngati nge chutiang khatiang ti a tal hrep te pawh kan va ang ve tih te pawh rilruah a awm a. Engpawh ni se, he Resolution ka rawn putlulh hian nichina ka sawi tawh ang khan tunhmaa mi ka sawi lova, nikum ami ka sawi lova, 'vawiiina kan dinhmunah hian he kan kawng hi a chhe ta deuh zel a, tun dinhmunah hi chuan a chhe ta lutuk deuh a ni lo maw, chak zawkin hma i la teh ang u,' ti a rawtna kha a ni. Chuvangin tu party mah ka sawichhiain ka hre lo. Tin, a mimal angin tumah ka bei pawn ka hre lo. Chuvang chuan vawiiina ka rilrua he Resolution a lo chhuahna chu ka sawi tawh kha, naktuka kan Zoram dinhmun tur kan thangtharte dinhmun tur, leh kan tu leh fate lo la awm zel tur, zoram khawvel hi ka rilruah hian a awm ve tlat a ni. Chutih lai chuan in thusawite pawh kha ka lo record ve zel a, member pakhat chuan 'a lo duhthawh ve hle a,' min ti a ni. Ka lo duhthawh ve hle kha member ka nihna angin ka tih ve tur a ni. Ka tih loh tur te a nih chuan a hriatthiamna pawh ka dil a.

Awle, kan Zoram dinhmun chu a hrechiantu vek kan ni a, kan hotute in ni a, kha in zinkawngte pawh nasa takin in sawi a, Europe-ah te, Switzerland a zuk kal te, khangte pawh kha mahni sum leh paia zuk kal in nih ka ring lova. Sorkar sum leh paia kal thei te in nih ka ring a. Khangte nen chuan tehkhin rual chu kan nilo tih nangni hi a hrechiantu in niin ka hria. Chuvangin vawiiinah hian he Resolution kan sawi khan member tam tak te khan kan han sawi a, kan kawng chhiatzia kha chu in pawmin ka hria a ni. A chhe lutuk ka tih kha a lutuk ka tihna lai kha nangmahniah in inbel deuh a, chuvanga pawmlo mai in niin ka hria a. In rilru tak chuan kan kawng chhiat hi in pawm a, mahse, vawiiinah hian tuboh leh dolung kara awm tam tak in awmin ka hria a ni. Member 20 in kan sawi a, a sawi lo tute kha chu hlah 2 an nein ka hria. Lehlamah chuan bial mipuite hlau baw si, lehlamah chuan helama hotute hlau baw si an nih avang khan an ngaihdan kha an sawi ngam lo niin ka hria a. Kha kha bial mipuite, vawiiina Zoram mipui min entute lo chhinchhiah ta ula, a lehpeka kan hotu atan an tlak dawn nge dawn lo tih te pawh kha lo en ta ula, rilrua in neih a tha hlein ka hria a ni.

Awle, Pu Speaker, hei a tlai deuh tawh a, wind up-naah khan hun sei tak hman ka tum lem lova, ram dinhmun chu kan hre theuh a. Ram dinhmun National Highway kan nei a, National Highway 4 (Internet) a ka hmuh ang chinah chuan kan nei ta a. Chu lovah State Highway 14 kan nei leh ta a. Chu lovah chuan District Roads kan nei a, Town roads kan nei a,

village road kan nei a, chu chu Technical taka thlir kher lo pawh hian non-technical mit atang hian sawtah Tongkolong atanga Vairengte thleng hian kal ta ila a chhe lai hi chu mi pangngai tan chuan kan hmuh ka ring a ni. Microscope pawh hman ngai lovin naked eye hian a hmu thei a ni, kan kawng chhiat zia hi. Technically a teh teh lo pawh hian a chhia tih hi chu kan pawm tlan ka ring.

Nichinah khan member pakhatin 'Mizoram pumpui hi fangchhuak ta se Resolution hi a in-withdraw-in ka ring,' min ti a. Pu Speaker, Mizoram pumpui hi fang chhuak ta ila, kar khat vel chu ka nat ka ring, ka taksa rawl them thum mai hian, in withdraw ai chuan, hei aia chhe lehzuah hian chhe lutuk piah lamah hian word dang belh tur ka ngah ka ring zawk a ni.

Engpawh ni se, member-te a chhiat zia hretute kan ni a, a bik takin nichinah khan kan Minister zahawmtak khan a sawi a. Mizoram piah, Manipur lam atangin a chhe tan an ti a, hetah Vairengte piah atangin a chhe tan a, a ti a, helampang Mizoram chhung kha chu a tha deuhvekin a sawi a. Chhim lam saw han sawi leh ta ila. Chutiang a nih chuan engatinge Lunglei lam atangin a chhiat tan tih kha vawiinah hian ka question a ni, ngaihthah kan ni tih te pawh kha ka rilruah a awm a ni.

Lunglei leh Lawngtlai inkar kan tlan sawn, Lawngtlai lama ka member puite kha engtinge ni in rilruah awm thin ni? Lunglei atanga kan tlan char char sawn Lawngtlai kan thlen chuan enge na ber inti ta ila, a then chuan ka kawng a na ber an ti anga, a then chuan ka taksa a na an ti ang. Ram veina rilru nena chutiang chen kan tlan chuan taksa na te hi chu nep te a niin ka hria. Rilru hi a na ngawih ngawih mai a ni.

Chutiang chuan Pu Speaker, hetia han ngaihtuah mai chuan kei chuanin enge na ber min ti ta se, ka kawngna leh taksa na ai chuan ka rilru hi a na ber a ni. Kan kawng chhe lutuk hi tun dinhmunah hian chumite, khamite a tichhetute hmala lo tute tumah ka mawhpah lo. MNF ka ti lo, Congress ka ti lo, vawiina kan ram kawng hi hawh u kan kut tha tichak ila, chak zawkin hma ila teh ang u tih hi ka rawtna a ni.

Vawiina member zahawmtak tak te, inbial kawnga lungawi in nih chuan inthlan lehah chuan in ngaihtuahawm viauin ka ring a ni. Vawiina kan dinhmun anga lungawi lo va hmalam pan zel tur kan ni. Politic phei chu a awmlo awm tir hi kan tum tur a ni. Vawiina kan Speaker zahawm tak a lehkha zirlai chuan Chapui atangin Aizawl thleng kein a rawn kal a lawm.

Vawiinah erawh chuan nuam takin, motor tha takin a tlan. Chutah chuan lungawi mai se a dik dawn em ni ? A piah lam ram tha zawk pan tura kal kan ni dawn lawm ni tih hi vawiinah ka sawiduh a. Chuvang chuan Member helaia kal khawm te, he ka Resolution hi a party angin khawngaih takin min thlir sak lo ula. Tumah ka mawhchhiat lo ka tih tawh kha. Kan ram tan tiin rilru neiin a chhe lai chu ka mawh a ni, hruaitu a min thlan ve takah chuan tihna rilru nena kan thlir chuan huat tur a awmin ka hre lo, ngaih thiamloh thil ni pawhin ka hre lo. 'Lutuk' han tih kha, tuin nge tichhia, tih ka sawi miah lo. Vawiina ram aiawha Member 40 an thlan khawmte hian tun aia chak zawkin siamthat hna hi i thawk theuh ang u, tih a ni ka rawtna ni. Kan siamthat tumna, a aia chak tih kha a tehfung pawh ka sawi lo. Tun aia chaka kan tih kha vawiinah hian kan kalkawng dungte hi ngaihtuah ta ila sam fai loh kalkawng tam tak a awm ang. Hmanni Champhai Zokhawtharah kan va kal a, a kawngdung kha, a kawng chhiat chu thu dang, hnim pawh kha la sam fai loh a ni tlat.

Engpawh ni se Pu Speaker, vawiina ka Resolution ka lo chhawpchhuah hi, nichina ka sawi ang khan nangni keini inti lovin kan Zoram thatna tur a ni tih ngaihtuah ila. A nihna dik tak ngaihtuah chuan kei helaia a hminga Member junior ber zing ami pawh hian fur a khaw tam taka hnatlanga hna an thawh an thawh hian chuan inthlahrun nachang ka hria a sin, ka rilru hi a inthlahrung ve a sin. Vawiina kan senior member , kan senior Leader tam tak te hian hei hi tha in ti nge ti lo tih hi ka rilruah hian ka ngaihtuah fo a ni.

YMA in chu kawng chu a tha lo lutuk a border lungin an chhungkhat tih te, Truck Drivers Association in kawng an siamtha tih te. Hmanni lawkah phei chuan facebook-ah an lo post a, Kawlchaw kalkawngah phei chuan kawngah tui a tling nasa lutuk a naupang tuicheng lai te an rawn post anih kha, chutiang dinhmunah chuan kan awm a ni. Chuvang chuan vawiinah hian sawi sawi ila mahni mawng hlimte pawh kan ang ang a. A chhiatna lai kha chu kan hre theuh a, a word ka lo hman taka kha ka duh thawh a. Thawk ngei ila tih ka duh avang leh tuna kan dinhmun ngaihtuah hian lungawi loh thlak ka ti a. Kan leihlawn te pawh kha a chhiat avang a ni lawm ni hmanni Tlawng leihlawn chu a chim tak ? tha se a chim dawn em ni ? Khatiang kha la chim lo chim tep te pawh hi tam tak a awm ka ring. Vawiinah a chhe lo kan tih chuan ala chim zel ang. Chuvang chuan, engpawh ni se, vawiina Member zawng zawngte, Member zahawm tak tak te he ka Resolution kan ram tan, kan hnam tan, kan tu leh fa tan, Mizo mipui tan Mizoram chhunga inkalpawhna kawngpui leh leihlawn (Bridge) chhe ta lutuk hi tun aia chak zawkin siamthat hna thawh ni rawh se tih hi khawngaih taka min pawmsak theuh turin ka sawm nawn leh che u a ni. Ka lawm e, Pu Speaker.

SPEAKER : Awle, kan member khanin resolution neitu kha in withdraw mai turin a sawm tawha, a lehlamah a in withdraw duh bawk silova, chuan vote kan lak mai a ngai dawn a. A resolution hi ka lo chhiar chhuak anga, pass remti zawngin remti kan ti anga, remti lo zawngin remtilo kan ti anga, a resolution chu hei hi a ni. 'Mizoram chhunga inkalpawhna kawngpui leh Leilawn (bridge) chhe lutuk hi tun aia chak zawkin siamthat hna thawh ni rawh se' tih a ni a. A grammer lai kha chu engpawh ni sela, hei hi pass remti zawngin 'remti' ti rawh ule, awle, remtilo an tam zawk a, Resolution is defeated.

Chuan kan zo tawh anga, vawiina kan tih tur chu kan zo tawh a, Thawhtan ni 24.11.2014 zing dar 10:30 ah kan kal khawm leh dawn nia.

Sitting is adjourded 4:30 P.M